

萬 有 文 庫

第 二 集 七 百 種

王 雲 五 主 編

西 山 先 生 真 文 忠 公 文 集

(九)

真 德 秀 撰

商 務 印 書 館 發 行



山西先先生真文忠公文集

(九)

真德秀撰

國學基本叢書

編主五雲王

庫文有萬

種百七集二第

集文公忠文真生先山西

冊 九

中華民國二十六年三月初版

撰 者 真 德 秀

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

大

*E六五八

雙

(本書校對者 章德宣 董文淵 楊靜齋 徐培生 尤惠民
華國章 陳敬衡 滕秉全 胡達聰 蔡仲宣)

西山先生眞文忠公文集卷四十八

祝文

鎮江廟祝文

迺者吾鎮秀民歲以上春良日相帥柅薦于神因飲福焉所以答鴻休而迓靈貺也某以持節過蒙獲與斯會敢陳菲奠因控悃忱吁自慶元龍飛以來南宮捷音不聞於鎮人之耳者蓋十四年于今矣豈神無意於此邦之士其寥寥而弗嗣也明天子將復下求士之詔惟神其大芘茲土俾濯纓天池驪首霄漢者繼踵而起豈非神之賜乎仰醫明靈監此誠禱

廣惠廟祝文

乙亥建康

嗚呼江東之民困敝最甚者莫如桐汭旱蝗之裁酷烈最甚者又莫如今歲夫以甚困敝之民而遇甚酷烈之裁幾何其不化而爲餒鬼流而爲餓隸此某之所以朝夕憂危思所以拯救者如其躬之疾癘然而調卹賑濟凡人方之所可爲者有司固不敢辭其責至於均調雨暘銷弭裁沴凡人力之所不到者非神其曷有濟維王自廟食于茲土凡幾百載矣民恃王以爲父母有水旱而必祭今嗷嗷之氓有甚於赤子之待乳哺神之仁亦豈忍坐視其將斃度命幙僚展謁祠下所以赴愬於王者如此惟哀恫斯民而亟救之更千百年其敢忘神之惠

中元水府廟祝文

某自春徂冬三至采石而三謁王。顧豈有私禱哉。以王之威神。歟。硃震耀。能相上帝。而澤下民。故也。今民病劇矣。若冬又無雪。則無麥。春又無雨。則無禾。哀我人斯。將隕溝壑。王其忍聞之乎。迺者。飛霰之祥。效于日至矣。惟神終此大惠。使一臘三白。以祛沴氣。而兆豐年。若乃田事既興。膏澤時至。茲尤農人之所跂望者。王其哀痼斯民。民亦世世事王無怠。

廣惠廟祝文

相廟 廣德

於虜王之神功聖德。衣被天下。而靈響震發。實肇乎此邦。猶日升嵎夷。而燭萬國。江出昆侖。而吞百川也。某自行西方。遇王之祠。未嘗不肅然起敬。況於巍巍炳炳。衆廟之所祖。庠揆日之良。□□□□若其區區爲民致請者。則敬心以禱。□□□□又噉茲誠。皦然可貫白日。

廣惠廟祝文

世以仲春口日爲王始生。四方士女大會于祠下。是非有無。蓋不可考矣。然於此乃見人心歸戴之切焉。夫民視王爲父母。而謂王不以子視斯民者。愚不信也。今江東之民。艱食方甚。亡異於赤子之失乳。惟王以父母之心。哀之救之。以全其生。而塞其望。幸甚。

范忠宣公祝文

維嘉定九年歲次丙子二月甲申朔初四日丁亥。故丞相忠宣范公祠堂成。具位真某。謹率僚屬。以羊一豕一。告祠于公曰。嗚呼。治平之元。公自畿縣來漕江東。曾未數月。入爲御史。故其行事不少。概見獨其所

賦籌思堂之詩。刻石猶在。誠通造化。念其羣生。有德之言。隨寓發見。茲非爲政者所當矜式乎。是用闢堂之東楹。敬祀遺像。以寓高山仰止之意。若夫立朝之大節。行己之大方。誓以沒齒。惟公是則。明靈不泯。實監此心。

廣惠廟祝文

□□□□之爲郡。介乎浙右。而隸乎江東。然厥□□□□甚瘠。則負異乎。江浙之風。以下下□□□□。□上之賦。雖粒米狼戾。且糞其田而不足。況於逢歲之艱凶。旣前驅以旱魃之虐。後繼以妖蝗之銛鋒。環千里皆赤地兮。況望其櫛比與崇墉。赤子嗷嗷而誰愬兮。分捐瘠於溝中。嗟人力其奚施兮。賴神明之哀恫。雪霏霏其三白兮。又零雨之濛濛。旣優渥而霑足兮。獲及時而趨工。顧某之何知兮。屢干瀆乎靈聰。蓋隨扣而隨應。芳嚕呱之鴻鍾。豈某之愚足以動神聽兮。蓋神之愛人。故頤鑒乎微衷。瞻魑魅之被野。森雲濤之飜空。苟兼旬之明霽。卽坐收其全功。神旣加惠於其初兮。顧豈惜委呪於其終。冀燥濕之孔時。俾黍禾之偕豐。易枯藁而昉潤。轉愁慘而春融。某將大書特書以紀神之休應兮。期焜燿於無窮。

諸廟禳蝗祝文

在詩有之。去其螟蠶。及其蝥賊。毋害我田。穉夫。此人事也。乃以屬諸田祖之神何哉。蓋禦菑弭患。在神爲之則易。而在人爲之則難。日者。本道郡邑。以蝻生聞。天子有詔。俾長吏禱于山川百神之周。是亦周先王意也。惟王廟食歲久。陰威赫然。霆奔風馳。山嶽可撼。況區區虫蝗之孽乎。驅之攘之。以升炎火。是直噫欠間耳。虔共致祈。立俟嘉應。

廣惠廟祝文

某間者伏謁祠下。敬以三事。有祈于王。威靈赫然。隨答如響。綸音誕頒。錫以廩粟。爲萬石。□□仰哺之民。賴以無饑。又聞歲除。至於人日。嘉雪頻仍。宿麥蒙潤。非王之慈仁。密賜覆露。其何以底茲。某與二邑十有四鄉之人。同深抃蹈。惟是溪湖之流。尙梗舟楫之運。猶難一雨霈然。使千艘浮動。此尤朝夕之所企望者。惟王其終惠之。

奉安范忠宣公祠堂祝文

故丞相忠宣高平范公。迺者仲春。卽籌思堂東極。以妥公像。雖有以見區區尊賢尚德之心。然其規禱簡陋。氣象卑狹。每欲然爲之不滿也。夏田告登。振廩訖事。旣新貢宇。遂建斯堂。撰日之良。載嚴登奉。冠劍山立。德容穆然。熙寧立朝之英風。元祐當軸之盛烈。凜乎其在目也。九泉可作。吾誰與歸。秋菊寒泉。薦此芳潔。茲誠炯炯。公其鑒之。

辭夫子廟建康

昔者先聖之門。果如由。藝如求。然後許以從政。某也。器凡而學陋。曾未及二子之彷彿。而叨恩出使。遽寄以一道。生靈休戚之命。宜其不足以稱塞也。然節用愛人之訓。拳拳服膺者。未始一日而不敬。奉詔守泉。遂將去此。誓當益尊所聞而行所知。以終無負聖門之律令。尙饗。

明道祠堂

明道先生其年未弱冠。已知誦夫子之遺書。雖一命之士。當存心於愛物。況於乘使者之車。然學力未充。

其愧於民者多矣。叨恩假守，誓當服膺訓言，益求所以用力者。庶幾有以贖今日之過乎。尙饗。

東南嶽廟等處

某書生爲吏，無以瘵人，惟有不欺。皎如星日，賴神之賜。訖遂終更，詰朝有行，不敢不告。尙饗。

范忠宣公

故丞相忠宣高平范公，迺者建公之祠於治舍。□□□□瞻仰而取則焉。今雖去此，然續有遺□□□□書，殆亡異奉香火於左右也。以責人之心責己，恕己之心恕人。誓畢此身，毋忘明訓。尙饗。

劉忠肅公

嗚呼！公生於健水，而沒於金陵。光明秀傑之氣，當已融而爲喬嶽，燦而爲列星。至於論議之崇，德事業之雋偉，播在簡冊者，又將垂千載之儀刑。某以鄉閭晚出，雖不及執經於堂下，然讀公之書，友公之子，猶彷彿其平生。場來江左，屬歲饑饉，鮎背黃髮之叟，誦乙未揀苗之績，往往歔歔而涕零。某之視公，無能爲役，獨於遺訓之炳然者，每拳拳而服膺。其於惠孤恤鰥之政，旣嘗竊取其一二，復刊梓以布之海內。庶幾傳此方挾此藥者，皆足以起沈瘵而蘇醒。被命守泉，謹拜謁祠下而去。繼自今強學力行，益當思所以自厲者，上以無忘於師訓，下以不辱於鄉評。尙饗。

鎮安廟祝文

某不□□恩，列位于朝者凡八年。莫邃於禁林，□□□□史莫重於稽古禮文之事，而某也。獲□□□□□有所復玷使指，可謂幸矣。非神之靈潛□□佑，其何以逮茲。懷紱過家，敬謁祠下。惟神推所以福某者。

而均福於一方。俾珪組蟬聯。嗣是愈盛。豈非衆心之大願乎。不腆酒殺。具將誠意。

辭廣惠廟祝文

某將指二年。無補於民。乃若民瘼。以告而遣。應親疾以愬而旋愈。則皆有賴乎神。神之有大造於某也。蓋與覆燾而惟均。被命守泉。敬謁祠下而去。若夫繕營之需。則已付諸幕屬。豈足仰報於靈休。姑以少酬其夙心云爾。

梨山廟祝文

惟神以唐名賢。膺宋祀典。封爵之崇。極于二等。威德之盛。被于一方。富沙之民。飲食必祭。蓋無異子之於父母也。某承詔守泉。道出鄉郡。誼當躬謁祠下。而迫於午役。遂不克前。敬馳瓣香。恭布誠悃。維今此行。屬當大夏。高堂有母。華髮颯然。走陸浮川。衝暑履濕。人子之心。不無憂虞。伏惟聖靈。密賜擁佑。俾起居飲食。無異平時。壽祿康寧。益受多祉。是神有大造於某也。期以代還。躬伸報謝。茲誠炯炯。王其鑑之。

梨山廟

某復有微悃。于冒聖威。仰惟靈佑。善應廣濟。昭惠王在唐之季。來守建安。實有惠政。故自騎雲帝鄉之後。邦人懷之。廟于梨山。以祀以享。著于唐史。事迹可稽。此學占之士所共知也。惟是詩篇遺文。藏在三館。學者無自而見焉。某願以私錢。刊于廟中。庶永其傳。且俾奉祠祝者。鬻之以爲瘞火之助。惟神其幸聽之。

梅山廟

五顯王惟神封爵之崇。極于二等。威德之盛。被于四方。瞻是仙山。有嚴廟食。邦人欽戴。奉祀尤虔。某承詔

守泉。以下並同
梨山。

又狀

某復有微悃。干冒聖威。某昨在奉常。獲見徽饒二州所奏加封五顯王本末。皆謂神姓曰蕭。伯仲五人。今考之建安誌。神之姓氏。伯仲皆與徽饒廟同。已封至六字。王梅仙之祠。乃尙仍五通。竊所未安。某與郡人同請于漕臺。綸告與婺源德興二廟封爵一體。顯聖靈聿新觀聽。惟神其幸聽之。

謁先聖廟文泉文

某不佞。幼讀先聖之書。至於道千乘之國。敬事而信。節用而愛人。使民以時。未嘗不喟然三嘆。以爲苟得千里之地而爲之。則爲斯言也。真藥石之良規。槃杆之至誠也。今天子不以爲愚且陋。擢守南土。茲非推行所學之日乎。夫一事之不謹。不可以言敬。一令之非誠。不可以言信。錙銖濫費。不得爲節用。毫髮橫取。不得爲愛人。一役之妄興。則非時使之義。顧雖不敏。敢違初心。惟不得罪於此邦之民。然後爲無負先聖之訓。神靈如在。尙監此心。

社稷

某叨被恩除。假守茲土。載惟社稷。民命所依。祇若故常。按行封境。用嚴國典。式對神休。謹告。

諸廟

惟上帝以好生爲心。肆命諸神。以奠方域。聖天子以憂民爲心。故環千里。付之守焉。幽明雖殊。其所以爲

民則一而已。某猥以非材，承乏茲土。凡其職之所當爲，與力之所可任者，不敢不盡其方。若夫均調雨暘，銷弭菑害，則非神乎孰賴，尙惟陰相以康斯人。豈惟民荷寵靈，某亦與受無窮之賜。

東嶽

五方有嶽，祭秩略同。而岱宗之祠，獨周徧于天下者，以其居平秩之方，而主生育之事故也。某猥以非材，來守茲壤，凡可以致力於民者，不敢不盡其方。下同

趙忠簡

惟公以忠正德文，爲中興名相第一。某高山仰止，于茲有年。被命此來，獲踵公武於八十年之後。緬懷遺烈，凜然若存。何以薦誠，惟此卮酒。

韓中令

惟公以景德丁未，來守此邦。盛德格天，實生人傑。是宜父子並祠。至今載瞻儀刑，敢不起敬。

王詹事

瞻是泉山，爲一都會。牧守相望，多時名臣。惟梅溪公，遺愛尤盛。蓋其所以脩身治人者，一出於□□□□□□愈久不替。某自少小，卽嘗誦公□□□□□□詩，仰止高山，于茲有日。敢圖僥倖，□□□□□□四十七年之間，方將朝夕勉焉，以□□□□□□茲誠炯炯，公其鑒之。

蔡端明

惟公以忠言惠政，著于中外。至和之世，實自幾甸。來守此邦，以便親輿之奉。流風善政，人到于今稱之。某

之視公無能爲役。然間者九重假寵之意。明著訓詞。實用仁祖命公故事。顧惟不佞。將何以堪之。惟當仰止高風。以庶幾其萬一。英靈如在。尙聞斯言。

顏尙書 徐都承 程尙書祝文

惟公以法從名臣。嘗鎮茲土。實有遺愛。在其邦人。戶而祝之。迨今未泯。某祇事云始。謁見惟勤。載瞻儀刑。肅然起敬。

姜相公祝文 泉州南安縣

嗚呼。公以鯁亮之資。盡言於猜忌之主。一斥不復。沒于遐陬。然清風直節。千載而下。猶凜凜有生氣。彼脂韋輭美。寵竊一時。而遺臭無極者。未知孰爲得失也。茲因祠事。庸款幽宮。酌以一卮。喟然三嘆。

開溝告諸廟祝文

地之有溝渠。猶身之有血脉也。血脉宣暢。則體安而氣和。一或底滯。則疾疢生矣。某被命來此。考按圖志。則知郡縣之溝。堙闕歲久。蓋自林侯祈之後。未有再議開濬者。淤泥惡水。停蓄弗流。春秋之交。蒸爲癘疫。州人病之。匪一日矣。顧念庸拙。蒞事方新。懼於煩民。未敢輕議。而寓公同僚。交相勸勉。謂將興悠久之利。不可憚信宿之勞。博參輿言。亦以爲便。乃涓良日。命庀工徒。維城與隍。神職是主。威靈赫然。尙克顯相。使畚鋤之下。如掃浮埃。役者不勞。而功以克就。此州人之幸也。某之願也。

到任謁韓魏王祝文

我宋盛時。莫如嘉祐。伊誰輔相。曰韓與曾。惟宣靖公。固爲泉人。若忠獻王。則又生于泉者也。山川之靈。鍾

此人傑。顧不偉與。郡圃有祠。實惟育德孕賢之地。高冠大劍。儼如生存。某祇役云初。敬伸款謁。若夫法公之所以治相治魏者而治泉。顧雖無庸。其敢不勉。英靈未泯。實聞斯言。

開湖祝文

郡東有湖。其來尙矣。在慶元中。守臣劉公穎。實命開濬。平疇萬畝。灌溉所資。其利一也。以固風氣。以壯形勢。其利二也。廣仁聖好生之德。寓臣子報上之恭。其利三也。而二十年間。有司因循。浸不營省。枯涸浸甚。某甚懼焉。捐庫緡以募工。當農隙而舉事。庶幾民蒙其利。而不知勞。仰鑿明靈。尙克陰相。功以亟就。則報其敢也。

修城告諸廟

郡之有城。以藩衛也。比歲守臣。嘗一新之矣。曾未數載。復以圯聞。某自玷州符。卽屬意乎此。而重用民力。不敢輒舉。以至于今。茲因農隙。稍加繕治。力所未及者。則以俟後之人。仰鑿明靈。尙克顯相。俾卽數旬之近。而成百雉之功。某之願也。邦人之幸也。

土神祝文

守臣之職。實曰捍城。城圯不修。咎將誰任。三農之隙。以漸繕完。惟神其相之。幸甚。謹告。

春祈祭諸祠

謹以清酌肺脩之奠。祭于云云。古者春秋祈報之禮。惟施於社稷。載芟良耜之詩是也。今併及於廟貌之神。蓋以水旱蟲螟之禱。於是乎在。有不可得而廢者。若夫先賢之祠。特以寓邦人去思之意。而非爲祈禳。

設也。考諸舊儀。有未安者。不量其愚。輒用釐正。自今以始。釋奠于先聖之明日。則遣官以祠。而繫祈報之禮。庶幾於義爲得。惟神其幸鑒之。

諸廟

春之有祈。故事也。而某勤勤爲民之心。則不敢以故事視也。前者祭饌之菲。旣改而用牲矣。此復申戒攸司。益虔厥事。凡所以盡內心之誠。而冀神之或饗也。然豈有他求哉。雨暘以時。疫癘不作。使民有爲生之樂。而無戚嗟愁恨之聲。吏之所望於神者。惟此而已。洋洋如在。實聞斯言。仰翳明靈。賜以饗答。

慈濟廟

維古之制。捍患禦災。有功於民。始在祀典。神之生也。以和扁之技。妙起死之功。飄遊旣升。靈嚮益著。此邦之民。不幸有疾。求救於神者。如子之懇其親。神亦隨其所苦。救而療之。如親之愛其子。嗚呼。其可謂捍患禦災。有功於民者已矣。歲時當祀。乃未及與。非闕典歟。載念此邦。密邇南土。□□□□疫癘易生。春夏之交。多以病告。斷以今始。著爲定例。一歲兩祠于神。仰惟英靈。監此誠悃。俾民無疾痛之苦。則吏亦免休迫之憂。將千萬年。承事無斁。

慈濟廟祝文

四月二日

某以疎庸。繆膺郡寄。眠民之疾。猶已隱憂。今春以來。二氣均調。札瘥不作。繫神之庇。朝夕不敢忘。乃者閭巷郊野之間。漫有以病告者。與其旣甚。然後有祈于神。豈若及其尙微。亟控斯禱。惟神哀恫庶俗。亦願有以揅之於其初。庶幾民之獲全者多。而神之用力也易。吏旣獲免其責。而民亦事神益欽。豈不美哉。

爲民患痢告慈濟廟文

傳曰。父母惟其疾之憂。言親之於子。惟恐其有疾也。郡之有守。所以父母斯民也。民有疾而守不加恤。可乎。今閭巷之間。以痢下爲苦者衆。守能閱之而不能救之。既有愧於民矣。神能救之而守不以告。其罪當何如哉。肆命元幟。致祈于神。神其救之。使病者有瘳而未病者獲免。豈惟□□□□亦將謂神之德於無窮。

東山南北岸兩渡祝文

間者以渡舟之多溺也。深惟長利。欲聯百艘而橋之。蓋嘗以諗于神矣。而議者不以爲便。夫見其可而圖之。與慮其不可而遂止。凡皆爲民而已。然新路改築。舍迂而近。其鉅舟更創。去危卽安。亦不可謂非悠久之利也。惟神嘿有以相之。俾無風波衝盪之虞。無魚龍噉齧之患。行者濟者。各適其所安。民亦永永戴神之賜。

北山清涼洞祈雨祝文

嘉澤久曠。魃將萎。共惟守土之臣。實掌劭農之政。雖冬而禱雨。蓋往昔之未聞。然志切念民。豈故常之可徇。用殫忱悃。仰扣真祠。山改名願及斯時。亟降蘇枯之澤。庶幾嗣歲。免貽艱食之憂。

北山謝雨祝文

間以旱暵。有禱于神。雲興雨濡。旋荷嘉應。芄芃之苗。將槁復茂。神之爲賜大矣。然自今至于秋成。無非望雨之日。惟神終此大賜。使膏澤時至。卒歲豐年。實邦人之慶也。亦守土者之幸也。

諸廟謝雨祝文

比以甘澤久曠。懇禱未孚。夙夜以思。不勝震懼。維神血食此方。與守土之吏。同任其責。令茲一雨沛然。萬物吐氣。不惟爲吏者。得以少寬其憂。而神亦爲不失職矣。然而焦枯雖解。滲漉未深。若能大赫厥靈。使滂沱之澤。飽足民望。則拜神之賜。有加無已。祇答嘉貺。輒私布之。

忠孝祠堂奉安祝文

具位眞某。謹率僚屬。以清酌之奠。昭告于旌表義闕林公司空忠勇蘇公。某不佞。奉天子之命。來綰虎符。視事之初。考按圖志。則知此邦前哲。有如林公之純孝至行。蘇公之精忠大節。光明卓絕。標準百世。旣祠于郡學。便爲士者知所勸。又祠于通衢。使凡居是邦。與往來之人。皆有所瞻仰。嗚呼。世降俗末。爲人子而不塋其親。與塋而不以禮者。有矣。視林公之躬自陶甕。負土成墳者。何如哉。爲人臣而欺其君。與臨小利害而選。匄畏避者。有矣。視蘇公之舍生取義。以死償節者。何如哉。祠像告新。敬伸款謁。清風如在。嘆仰不忘。

諸廟祈雨祝文

聖經所載。惟麥與禾。今禾旣登場。所至告稔。拜神之賜。渥矣。乃季秋以來。雨不時至。高田之麥。欲種而無水。以耕。下田之麥。已種而無水。以溉。此農人之所甚憂。況夫風高氣燥。則居者用虞。泉枯井竭。則汲者告病。惟神幸哀斯民。而賜之嘉澤。使憂者以愉。虞者以安。病者以息。是一舉手而三患弭也。神其可無意乎。

諸廟謝雨祝文

迺季秋以來。雨弗時至。嘗以三患。有謁于神。荷神之靈。賜以響答。將萎之麥。蒼然勃興。既涸之泉。盆然充溢。而燥炎之氣。又化爲潤澤。眞所謂一舉手而三患弭也。不腆卮酒。持酌于神。維以薦誠。匪敢言報。

張大帝廟祝文

某曩在江東。適罹歲旱。凡所禱請。惟神是依。今在泉南。復值冬旱。躬走祠下。爲民致祈。信宿之間。甘澤隨注。將萎之麥。蒼然勃興。既涸之泉。盆然充溢。其拜賜也。渥矣。不腆卮酒。持酌于神。維以薦誠。匪敢言報。

張大帝 通遠廟祝文

古者春秋祈報。非大神不與。蓋農重事。必其威靈震赫。足以闔闢陰陽。招呼雷雨者。然後可望以豐稔之施。惟王^帝功參造化。澤被生靈。爲日久矣。屬此中春。虔修時祀。惟王鑒其念民之切。而再賜以上熟。豈獨爲吏者知德於王。民亦永永事王無怠。

諸廟謝晴疏文

比者。洪濤山涌之日。雨復甚至。其勢蓋廩廩也。使開霽少遲。則平疇萬頃。皆將卷爲巨浸矣。幸神靈加惠。茲土使雨隨止。而川不溢。芄芄之苗。賴以獲全。厥施豈淺淺哉。不腆樽酒。于以告虔。尙惟相之。迄俾有歲。

辭先聖祝文

昔者。祇謁云初。嘗以服膺洙泗之訓。自列於先聖之前。雖在官三年。恪守惟謹。然其可愧亦多矣。蓋學有所未充。則政有所未善。固其宜也。易鎮江西。責任彌重。將何以稱塞。惟當益尊所聞。庶幾萬一之進。於皇元聖。尙迪其衷。

諸祠

假守是邦于今三載。材踈政拙。有愧前脩。獨惟此心。庶幾膈合。叨恩易鎮。敢不告行。

忠孝祠

祠二公以範風俗。自某焉始。叨恩易鎮。遂將去此。惟當監勵忠孝之節。以無忝於二公。皎然此心。尙靳昭鑒。

遊仙山頂祈雨祝文

昔者真人之始封也。綸告誕揚。固有愛利及物之褒矣。今境內之旱。前所未睹。風日炎煬。良苗將萎。此正真人推行愛利之時也。夫雨暘之數。雖出於天然。上穹仁易以感格。山川百神。儻能爲民致請。未有不。能回造物之意者。況真人列名仙籍。隸職紫清。又非山川百神之比。何惜不爲一方赤子。致其更生之請乎。今旱勢極矣。民命危矣。於此時而不亟救之。後將無復可望者矣。敢以誠告。尙其念之。

周真人祝文

謹以素饌。昭告于勅封冲應真人靖惠夫人曰。有崇斯山。作鎮南浦。真仙宅焉。多歷年所。麻吾一邦。厥施甚普。寶軸繪書。光賁琳宇。實帝令之。俾職茲土。維時常祀。曠典是懼。峩峩儒纓。相帥作古。有饒斯馨。有清斯醑。俶聞其端。日歲壬午。維仙之飲。玉液淋漓。維仙之饗。豹胎麟脯。豈伊區區。可薦尊俎。物雖甚微。誠意攸寓。睠是賓興。敷詔萬寓。得拔其尤。貢于天府。凡茲士類。志在軒翥。維吾真仙。各傳以羽。如鵬之運。如鶴之舉。口如蛟龍。得被風雨。逢辰效奇。立功至主。豈人實能。維仙默助。若甄之陶。若冶之鑄。洋洋文風。視彼

鄒魯英英人才。媿昔伊呂于鄉有光。于國有補。茲願甚宏。非仙疇予。尙惟至赦。仁此覲縷。

北山祈雨祝文

維年月日。具位謹以清酌之奠。昭告于北山之神。傳稱名山大川。能興雲出雨者。始在祀典。溫陵爲郡。以泉得名。有崇北山。實州之鎮。神仙所宅。霧雨所藏。一方仰庇。惟日久長。今歷旬不雨。多稼將枯。羣情嗷嗷。若隕川谷。願以靈源一勺之水。散爲闔郡三日之霖。俛稿苗復興。民命獲濟。此神之職也。亦邦人之望也。謹告。

社神

維社有神。實主我民。曰社與民。厥重惟鈞。歲旱民饑。亦神之疚。願於未然。畢力以救。

勾龍氏

於我惟神。于祀配食。有功于民。故莫能易。雨不以時。民且告瘁。神其揀之。反掌之易。

稷神

維稷有神。所主惟穀。雨暘以時。嘉穀乃熟。芄芄者苗。賴雨以濟。尙哀斯民。俾克有歲。

后稷氏

惟神之生。百穀是殖。更千百年。祀以爲稷。今穀方茂。而雨不時。哀而救之。匪神孰尸。

風師

在易有之。雨潤風散。其於生物。功則一貫。雲氣凝合。雨乃滂注。所求於神。願霽斯怒。

雨師

瀕海之邦。土瘠易稿。潤澤不時。則以旱告。一雨通宵。已拜神賜。願更滂沱。俾卒有歲。

雷神

鼓動萬物。惟雷之功。有神司之。隱隱隆隆。惟霆之轟。雨乃大至。敬共有祈。日夜以冀。

北山祝文

古者諸侯有國。凡境內之山川。必有祀焉。後世祠廟既興。而山川之祀遂廢。徒知像設儼然。而謂神明在是。而不思與雲雨以澤百物者。實山川之功。顧寢而不祀可乎。某蒞事云初。適以旱告。徧走羣望。而北山獨先焉。豈非以其巍峩尊雄。上與天接。雲氣所自出故歟。頃者一雨通宵。已拜神賜矣。邇日以來。旱氣彌烈。神能賜之。而不能終之。殆非某之所以奔走乞靈之意也。敬持瓣香。載控忱悃。與膚寸之雲。以雨四境。使人知山川之功。不在祠廟下。豈不休哉。

清源洞祝文

乃者。中夏以來。農畝告旱。比雖得雨。而潤澤未周。□□□將復就槁。羣情嗷然。如墜鷲炭。仰惟至人。起出世表。與造物游。招呼神龍。噓吸雷電。惟無意斯民。則已。倘誠有意。則爲一方赤子。以請命于天。與膚寸之雲。以膏潤四境。直反掌間耳。惟仁慈其終念之。

東嶽諸廟

某自玷守符。居慚喜最。惟三載極憂民之念。而一毫無營己之私。質諸明神。庶幾無媿。叨恩易鎮。敢不告。

行。奉親在涂。尙靳陰相。

辭清源祝文

某假守三年。蔑焉聲績。惟於斯民。念軫晨夕。十日不雨。以旱爲憂。五日之雨。又虞橫流。區區此心。實貫天日。銷變召和。則媿無術。有崇北山。真仙宅焉。駕風鞭霆。妙用無邊。某以誠求。仙以誠答。有如鼓鍾。應手鏗鏘。百穀穰穰。羣眚熙熙。維仙之功。豈人之爲。旣列于朝。加以顯號。又饒于梓。愆遠是口。今雖去矣。忍忘泉人。願言蔭佑。終古常新。山茗澗泉。薦此芳潔。神交窈冥。則未嘗別謹告。

仙遊山頂祈雨祝文

辛巳五月時憂居

竊聞之天。以雨暘之柄。付之山川百靈。猶人君以刑政之事。付之牧伯守宰也。民有感嗟愁歎之末伸。牧伯守宰不得而專者。當同心以請于朝廷。然後民瘼可蠲。歲有旱乾水溢之不時。山川百靈不得而專者。當同心以請于上穹。然後災變可息。蓋推行天地之仁者。山川百靈之職也。推行朝廷之仁者。牧伯守宰之任也。顧焉有幽明之間哉。夫雨暘之數。雖出於天。然上穹至仁。易以誠格。今境內之旱。可謂酷矣。回造物之意。而救生靈之災。正此斯民有望於山川百靈之物也。伏惟慈仁。毋以定數不移。諉諸天。而以爲民請命者。任諸己。使甘澤蚤沛。而嘉穀獲全。神旣有辭于民。民亦永永事神無斃。謹告。

鰲峯靈澤殿祈雨祝文

勅封靈澤夫人大仙。惟大仙之靈。肇於百丈一方之人。所共瞻仰。于茲有年矣。間者靈澤之封。實定于某之手。夫豈諂大仙者哉。有是實。故有是名。大仙之所不辭。亦某之所不得私也。迺者聞諸道涂。大仙復將

震耀威靈於鰲峯之上。其事甚異。其詞甚夸。人皆信之。某獨疑之。何哉。蓋澹然無作。而雨暘菑疾之求。各以其類應。此正直之神所爲也。以禍福動愚民。而要其不正之享。此淫昏之鬼所爲也。孰謂大仙之正直。而肯要人以奉己乎。此某之不得不疑也。及抵西山。及有以其親覲告者。真若可信。而無疑矣。某之愚。猶恐其出於依托也。蓋大仙之所以信服於邦人者。亡它。惟仁而已。今不恤其民之有亡。必欲其差次出錢。以廣宮室。豈大仙之心乎。若某不審其事之真僞。而謁聽命焉。非惟見嗤於士論。且將變舉於大仙矣。是以未敢卽任勸率之責。而願有謁焉。厥今高下之田。方以旱告。大仙誠能大庇斯民。而亟賜以雨。使穀之將收者。無稅而不實之患。而欲槁之苗。蒼然以興。則環數鄉之民。將奔走稱謝之不暇。某於是時。慨然任勸率之責。亦爲有辭矣。敢布腹心。惟大仙實圖之。

南嶽行宮

某之爲學也。以不欺爲本。雖未能至。而竊有意焉。屋漏之隱。如對神明。不敢忽也。況今作屋乎茲。巍巍靈嶽。雄峙天表。顧盼在目。雖欲自欺。得乎。惟廉惟仁。惟公惟勤。朝夕兢兢。期於無愧。尙惟降鑒。迄用有成。

社稷

維社稷有神。民命所司。涖事之始。職當按視。鞠躬拜謁。不敢不虔。農事將興。尙期陰相。雨暘以敘。俾克有秋。

城隍

城隍之有神。猶郡國之有守。幽明雖殊。其職於民。則一而已。某叨蒙上恩。來鎮此土。深惟責任之重。凡躬

行之當勉。與民瘼之當紓。朝夕兢兢。不敢自忽。至於蠲除舊疹。丕降福祥。則神之職也。尙惟加意。俾寧厥居民。亦永永事神無忘。

附 青詞 (據王胤元重刊詞堂本補)

江東祈雨青詞 嘉定乙亥五月

旱魃爲虐。將貽卒歲之憂。昊天曰明。願軫斯民之苦。敬憑法醮。冀達危誠。竊念江東。實連淮甸。開禧兵燹。流徙最多。嘉定年飢。死亡相踵。屬者豐穰之屢應。居然凋瘵之未瘳。迺自暮春以來。久愆時雨之潤。川源斷港。阡陌揚塵。宿麥旣枯。將奚續食。新秧未莖。敢望收成。靜言整氣之傷和。端自微臣之失政。凡有菑咎。宜加不肖之軀。忍使生靈。重罹莫大之厄。惟妙造斡旋之甚易。幸至仁務憫之亟施。沛然三日之霖。救滋之道之命。控忱以告。得請是期。

茅山祈雨青詞

五月不雨。益深亢旱之虞。百姓何辜。將失有秋之望。敢殫危悃。仰籲穹旻。伏以大江之東。民生素瘠。開禧而後。天變荐臻。旱蝗饑饉者四三年。餓莩流離者千百里。祈高明之專祐。獲豐稔之相仍。然田疇蕪廢之最多。而倉廩蓋藏之甚寡。故雖樂歲。猶或咨嗟。脫遇荒年。將奚振救。公私共患。寢食靡遑。用藏敬於名山。敢祈禱於上帝。殄除妖魃。丕降甘霖。吏之不良。固難蒙乎沛口民焉。可憫。願亟被於至仁。瀝懇興辭。鞠躬請命。

中元水府祈雨青詞

亢旱是虞。誰非望雨。救民無術。惟有呼天。載念常暘爲苗。莫如茲歲之酷。自春徂夏。甘霖未浹。累旬由江暨淮。赤地始踰於千里。種植之工。盡廢螟蝗之孽。將興井無可汲之泉。粟有驟騰之價。皇矣上帝。本垂溥博之恩。今此下民。將履困窮之極。願回哀愍。沛賜滂沱。以全大造覆育之功。以拯羣生朝夕之命。茲爲忱禱。尙冀矜從。

母疾愈醮謝青詞

冀親乎母。實爲命以相依。蓋高者天。惟盡誠而可動。比迎慈壺。就養公庭。屬當垂暮之年。偶得瀕危之疾。嗚呼。未效舉室如狂。一心斬造化之垂仁。百拜望星辰而致禱。願損臣身之筭。以延母氏之齡。鑪熏之盛。味消靈藥之功。已應。豈繫人力。竄荷神庥。是用祇命羽流。肅陳寶醮。以謝再生之造。以祈方至之祥。曰壽。西康。期亦饗春秋之末。爰清爰靜。當愈虔香火之脩。

立冬日祈禳青詞

十月七日也。至十七夜有紫微垣宮室之夢。

民生多艱。莫如所部。歲事不稔。未有今年。始則烈日猷焚。欲耕而莫可。繼則飛蝗荐食。雖種而亦空。于今田野之間。已多溝壑之瘠。張頤待哺。蓋尙餘數月之期。發廩勸分。未足延一旦之命。惟冀上天之仁。愛俯矜下土之困窮。方冬而賜積雪之祥。及春而佈甘霖之澤。使小大之麥。既秀且藩。而高下之田。及時以懇。至於掃除疫癘之氣。蕩滅蠱螟之妖。悉賴至仁。密回洪造。庶幾有衆。咸獲更生。臣猥以鷲材。繆將隆指。自

慚無術。可救元元之舊。獨有竭誠。期動高高之聽。

丙子立春日設醮爲母祈福青詞

天下之樂。莫如以祿而及親。人子之情。尤欲其親之難老。敢瀝由衷之懇。冒干播物之仁。伏念臣母吳氏某。早歷艱勤。晚膺榮養。郊禋覃霈。被恩命者再三。歲曆推移。倏春秋之七十。粗獲康寧之喜。悉由覆幬之恩。今者令佈勾芒。日逢甲子。當萬彙泰通之會。肇兩儀發育之功。惟盛德之主生。實從茲始。爲慈闈而祈福。宜在斯時。載演冲科。肅延真馭。仰冀昭昭。臨下之鑒。俯矜區區。念母之誠。俾壽而昌。長享承顏之奉。及人之老。敢忘錫類之心。

上元節設醮青詞

六沴相乘。雖陰陽之定數。一民失所。豈天地之本心。屬者早曠之餘。繼以蝥螟之孽。蕪廢不耕者凡數千里。困窮無告者逾百萬人。公私之力易殫。振恤之恩難徧。惟賴高穹之悔禍。庶令有衆之更生。今者四序闌端。三微肇始。馨一心而歸敬。爲百姓以致祈。曰雨曰暘。冀均調而不悖。我黍我稷。俾種植以及時。麥秋全載。穫之功。蠶月有倍收之喜。其於造化。不費咄嗟。噓吸之功。而彼生靈。獲免饑莩。流亡之苦。茲下愚之至望。亦上聖之樂聞。敢瀝忱誠。願回昭鑒。

丙子芒種謝麥禳蝗青詞

伏以宿麥登場。方欣續食。遺蝗出土。復慮搃苗。蓋當公私赤立之餘。豈堪飢饉荐臻之苦。幸帝命以來。牟之錫。俾民生均一飽之歡。所期播植之是時。庶保豐穰之可望。儻螟螣蝻賊。或遂番滋。則黍稷稻粱。皆將

殄瘁。此有衆所以驚呼而相弔。而微臣所以恐懼而靡惶。顧人力驅撲之甚難。惟天意轉旋之孔易。願回大造。申勅羣靈。丕降甘霖。坐底驕陽之伏。秉畀炎火。永無遺育之存。瀝懇投誠。鞠躬請命。

太乙醮祈雨青詞

八政所重。食最爲先。一歲不登。民猶告苦。況新糴於大歉。咸共徯於小康。豈虞七八月之間。復有方千里之旱。山川之雲欲合。膚寸卽離。溝澮之水雖盈。斯須已竭。穰將成者稿白。苗方秀者萎黃。詎堪凋瘵之餘。洊失豐穰之望。私室之蓋藏甚寡。曷保生全。公家之儲儲又空。將奚賑卹。夙宵在念。震懼靡惶。非仰祈高穹覆幬之恩。殆立見餓莩流離之禍。敬陳寶醮。肅按冲科。瞻紫微太乙以輸誠。爲赤子黎元而請命。願敷潤澤。亟起焦枯。以昭善救之仁。以解倒垂之厄。

太乙醮祈雨青詞

樂歲可期。遽罹七月之旱。驕陽甚熾。俄爲三日之霖。仰大造之至神。與函生而共戴。惟上下之憂。莫逾於艱食。而古今之患。尤甚於游飢。臣猥奉寬條。適逢大歉。瞻赤子困窮之衆。幾至流離。賴清朝賑恤之優。僅能全活。政需一稔。庶保更生。而自入新秋。久愆甘霖。山川之祠雖徧。雲雷之施敬屯。一心斬洪覆之垂仁。百拜望紫垣而致禱。精誠甫罄。膏澤已敷。掃妖魃於方張。起良苗於將槁。儻非上帝好生之德。孰揀下民。阡陌之苗。敬卜剛辰。載陳寶醮。以謝曲成之賜。以祈終惠之恩。日雨曰暘。願常臻於協順。有黍有稷。俾咸遂於豐登。庶令凋瘵之毗。浸躋富壽之域。控忱以告。從欲是期。且嘉定丙子秋。人情相顧。皇駭。大田龜拆。苗未應。遂以後七月丙戌。用道家法。蘸太乙於賞心亭。是日運明陰。時有小雨。既禱于山川。遙望電卓諸山。雲色瀟瀟。近夜雨稍大。而風力將猛。震撼戶闔皆鳴。雨禁止。越翼日丁

亥。晴色愈熾。夜遊天文生范其姓者。相與仰。星漢。范曰。月行度太高。雨未可冀也。丙
 夜具冠。望紫微垣。齋栗百拜。以祈久。戊子。夙興。少。休。候兵。忽。踰。來。告。曰。雨。作。矣。起。視
 晚。上。香。宜。調。玉。折。神。位。前。默。禱。良。四。鼓。後。益。滂。霈。自。是。頓。大。雨。稿。苗。復。茂。雨。作。矣。起。視
 嗚。呼。以。某。之。庸。焉。何。敢。言。格。天。事。而。戰。兢。臨。履。之。誠。之。交。自。是。頓。大。雨。稿。苗。復。茂。雨。作。矣。起。視
 蓋。自。是。益。知。暗。室。屋。漏。之。不。容。欺。而。戰。兢。臨。履。之。誠。之。交。自。是。頓。大。雨。稿。苗。復。茂。雨。作。矣。起。視

為母醮星青詞

天覆物以無私。福豈容於倖致。子為親而有禱。情益出於可憐。願垂臨下之仁。俯察由衷之懇。伏念臣母
 太宜人吳氏某。艱勤初載。憂患半生。祿雖及而年浸高。未極劬勞之報。疾常多而安日少。每深危懼之懷。
 比諷日者之言。載考星纏之運。謂不無於屯否。當豫至於祈禳。重以微蹤。屬將滿秩。計其行役之際。必在
 祈寒之時。道途有風霧之侵。舟楫有波濤之險。非藉生成之造。曷臻康泰之休。今者節紀下元。日臨甲子。
 肅醮儀而蕝敬。為母氏以控忱。冀誠懇之嘿通。俾壽齡之增衍。承顏順色。永諧定省之歡。登高臨深。悉免
 顛隲之厄。

丁丑上元設醮青詞時已改除泉
州未離江左

伏以天為羣物之祖。本覆育以無私。春者四時之先。乃發生之自始。敢為民而致請。冀錫福之惟均。惟江
 左之承平。素稱饒樂。自開膺而至今日。浸益瘡痍。戶口耗於兵革之餘。財力殫於飢饉之後。都會之繁華
 未復。蚘曰陋邦。豐穰而愁嘆相聞。況乎歉歲。臣自叨將指。每極寒心。所愧鴛材。曾篋拊綏之術。惟祈洪造。
 曲垂矜憫之私。因歲序之更端。肅奏儀而蕝敬。仰祈道蔭。俯拯民躋。三登曰太平。盡銷水毀木飢之沴。百
 樂生治國。漸還家給人足之風。

泉州入宅青詞

伏以便鄉假守叨被君恩將母之官獲修子職敢殫微悃僭瀆至仁伏念臣本以蠢愚曾微能解平生行己不敢爲持祿干進之謀一念通天粗知以濟物及人爲事甫上江壩之節更分海上之符昔者稔聞號稱饒樂之地今焉寢異頗多窮悴之眊當入境之云初已炷香而自誓願堅潔白公勤之操一洗貪婪媮情之風丹衷甚明白日可照然而身健始能任職家安乃可愛人爰卽公庭載陳法醮仰祈赫赫之鑒俯察區區之誠錫慈母以壽康俾盡門之安吉庶幾不肖盡忘內顧之虞當竭菲才一惟民隱之卹有臨在上此志敢渝

太乙醮青詞

長人是職實深憫雨之懷銷變無方但切籲天之懇敬憑法醮祇控忱辭言念溫陵素乏可耕之壤雖當樂歲尙多艱食之民況自頃年以來洊罹積澇之患公私共困愁嘆相望臣猥以菲材甫茲假守志期阜俗方勉效於撫摩政篋召和乃遽愆於潤澤夙宵自省寢食靡寧雖甘霖之屢沾而大田之猶槁肆涓良日載演冲科瞻紫微太乙以輸誠爲赤子黎元而請命仰祈聖造俯鑒愚衷惟望歲所以望霖惟憂民所以憂早救其煩瀆賜以矜憐雨施雲行願亟臻於溥洽家給人足庶共樂於和平

天慶觀祈雨青詞

臨民而思裕民莫急豐穰之願得雨而復望雨實由真切之誠輒貢忱辭僭干洪造伏念臣猥叨誤渥擢守便州初無善政以慰羣情但有過舉以傷和氣故於蒞事之始卽致亢陽之菑朝夕省愆殆如焚灼雲

寬在望。何啻渴飢。亟蒙覆物之仁。洊降及時之澤。平壤已開於沾洽。高田猶慮於焦枯。爰卽真宮。敬陳法醮。冀垂矜憫。更賜滂沱。百谷用成。迄遂有年之喜。烝民乃粒。免貽艱食之憂。

謝雨青詞

伏以累旬苦旱。實深歲事之憂。一雨通宵。均被神功之施。以欣以感。且謝且祈。伏念臣本乏技能。繆司牧養。自慚秕政。致罄陰陽之和。屢罄精誠。冀回天地之鑒。仰蒙赦宥。俯賜矜憐。觸石興雲。俄陰威之亟變。隨風入夜。倏膏液之潛湧。少寬艱食之虞。允荷大生之德。然而旱乾既久。潤澤未深。成始成終。政有祈於妙造。載沾載足。願更賜於甘霖。諒惟覆育之仁。何愛呵噓之力。

上元設醮青詞

節名錫福。敢萌徼福之私。職在長民。當致爲民之禱。仰祈穹昊。俯鑒忱衷。切念清源。夙稱樂土。珍奇畢集。近聯七邑。百萬家。生聚實蕃。遠控重溟。數十國。粵從近載。頗異前聞。稽天之潦。相仍。被災者廣。浮海之商。罕至。失業浸多。臣自玷承流。每勤卹隱。雖摩撫當彈於人力。然幹旋實賴於化工。敬卜剛辰。肅陳法醮。願賜覆載生成之大造。盡除水旱癘疫之口災。舟楫安行。有風后川祇之助。室廬永保。無祝融回祿之驚。庶令凋瘵之疴。復履阜康之樂。

爲民祈安設醮青詞

天令或愆。馴致札瘥之害。民生何辜。重罹天闕之傷。念忝任於撫摩。殆不勝其憂惻。遣醫餽藥。常切關心。遺粟散緡。曾無虛日。雖勉修於人事。終未弭於天災。是用虔扃丹誠。仰於淵聽。以仁救厄。願推慈憫之恩。

變口爲和。亟賜噓呵之力。

太夫人誕辰設醮

天覆物以無私。固豈容於徼福。子爲親而有請。庶可冀於垂仁。敢慮一喜一懼之情。庸致三沐三薰之禱。伏念臣母吳氏。早罹憂患。晚被寵榮。烏哺雖勤。未報劬勞之德。駒陰甚迅。浸驚遲暮之齡。顧華髮之蕭然。每丹衷之惕若。屬新元之肇始。且誕日之載臨。肅口真科。虔祈道蔭。增壽祺於有永。膺福祉於無疆。居口高聽卑。願鑒惓惓念親之悃。舉此加彼。敢忘老老及人之心。

捕獲海寇設醮青詞

海邦寧謐。忽驚劇寇之侵。天道昭明。旋告戎功之捷。妖氛頓掃。鴻覆何窮。伏念臣自玷藩宣。每勤綏撫。方欣庶俗。共由於安靜之中。豈意羣兇。猝至於防閑之表。聯舟艦幾千人之衆。距城闔纔百里之遙。亟遣兵師分屯川陸。威聲旣震。吉語踵聞。首惡當懲。用正鯨鯢之戮。脅從可貸。忍爲玉石之焚。曷非獲助於穹昊。豈易收功於旬浹。肆憑法醮。祇控謝忱。尙祈遺孽之悉平。庶俾後虞之永熄。四郊按堵。各安耕鑿之餘。萬賈連檣。如行枕席之上。

中元節清源洞設醮

中元令序。實惟數宥之辰。上聖至仁。不厭爲民之禱。敢因祇謝。載控忱辭。伏念臣猥以迂愚。獲司牧養。有民有社。常獨抱於隱憂。曰雨曰暘。乃幸臻於時若。高下之田。咸稔公私之慮。少寬豈云昭格之能。端自曲成之造。肆陳淨醮。祇薦微衷。尙惟晚種之頗多。更賴化功之垂軫。自今以始。冀獲屢豐之穰。所欲必從。敢

辭三瀆之誼

生日青詞

母恩甚大。欲報何窮。天聽雖高。惟誠能動。輒抒丹素。僭瀆穹昊。伏念臣繇一介之至愚。賴二親而有立。悲深陟岵。徒追慨於父慈。禮謹循陔。幸粗諧於母養。茲臨誕日。載惕微衷。念長育成就。以至於今。豈保抱攜持。可忘所自。載陳寶醮。祇按冲科。華髮高堂。願增畀耆齡之固。春暉寸草。庶永處子職之共。臣無任

清源洞祈雨青詞

歲口以稔聞。已拜高穹之賜。雨弗及時至。又聞下土之咨。輒特至仁。敢陳微悃。臣聞詩播貽牟之頌。史嚴無麥之書。蓋於五穀之中。此爲最重。必備四時之氣。乃克有成。儻乖呂令之期。難擬崆峒之熟。今者仲冬將屆。嘉澤尙愆。未耕者旣阻於翻犁。已種者又虞於焦巷。秋收百畝。僅醫眼下之瘡。夏秀兩岐。殆類中流之楫。此而失望。誠可深悲。仰祈大造之慈。俯拯細民之苦。寸雲觸石。冀頃示於威神。三日爲霖。庶均沾於膏潤。控忱以請。從欲是祈。

清源洞設醮祈雨青詞

愆陽頗甚。慮二麥之失時。法醮載陳。爲三農而致禱。方虔恭而俟命。俄震霖以通宵。豈愚誠足以動天。繇聖造存乎濟物。然而旱乾頗久。旣又潤澤未敷。下田雖幸於沾濡。高壤尙遲於播植。敢辭再瀆。游控一枕。沛甘霖以及時。願終大賜。貽來牟而率育。共載洪恩。

雲榭祈雨青詞

月紀仲冬。宜寒而燠。氣臨大雪。欲雨而暘。繇郡政之多疵。致天行之失序。恹忱雖切。霈澤尙愆。雲屢合而輒離。風漸休而旋作。麥苗將槁。井汲復艱。近而有炎場之患。遠則有札瘥之患。惕然朝夕。殆若燬焚。用瀝懇於高穹。冀興憐於下土。瑞霰積地。非所敢祈。甘露連朝。願言遄應。使有衆安生而可望。則以身寒谷而弗辭。稽首投誠。鞠躬聽命。

清源洞謝雨青詞

冬而禱雨。蓋前此之罕聞。誠則通天。賴至仁之易感。初霏微而潤物。旋霽霈以通宵。百井泉甘。溢於既涸之後。千畦麥秀。蔚然將槁之餘。儻非上聖之興慈。孰俾下民之蒙澤。載沾載足。已式慰於羣情。成始成終。更有祈於法力。

太夫人誕辰設醮青詞

天鑒非遙。惟盡誠而可格。母恩甚大。愧欲報而未能。輒恡愚衷。僭干穹聽。伏念臣母大恭人吳氏法名。早更憂患。晚被恩榮。養泊千鍾。粗謹清溫之職。年逾七袞。實深喜懼之懷。念非控請於叢霄。何以導迎於景。賈惟春令。閭端之始。肇陽和生物之功。祇祓瑤壇。宣揚藥笈。仰冀慈仁之造。俯垂覆幬之恩。俾壽而臧。長享承顏之樂。及人之老。敢忘錫類之心。

安奉離明殿青詞

承流宣化。所期庶俗之安。消變弭苗。全仗高靈之祐。顧此阜蕃之郡。且居炎燠之方。每終夜以深思。懼融風之易煽。雖人爲當勉。已相謹於隄防。而天意難知。冀潛回於溟漠。爰卽棲真之宇。載新執法之宮。涓良

日以奉安。灑丹誠而叩懇。仰祈妙造。大庇函生。擊壤相歡。均被簡簡穰穰之祉。聚廬託處。永無謫譴出出之驚。

東嶽清源祈晴青詞

臣聞民之可憫。無若良農。物之難成。莫如嘉穀。自始秧而至既穗。非膏澤無以滋其生。迨垂穎而及登場。非烈日無以堅其實。惟均節而不忒。斯順成而靡虧。越從春夏以來。幸適陰陽之敝。今歲將大熟。而雨則過多。溪壑至於溢流。町畦幾於冒沒。嗷然待哺。不勝田野之情。壞於垂成。必非穹旻之意。敢抒誠懇。虔懇高靈。伏望憫其終歲之勤勞。賜以兼旬之明霽。百里口口九十。俾末路之獲全。甫田之取十千。庶豐年之可必。

寺觀設醮謝晴青詞疏語

雨以潤物。過乎度則爲苗。天維子民。哀其窮而必救。疏云。甘霖本以潤物。過而爲災。諸佛切於念民。窮則必救。比以連陰之沴。凜乎害稼之憂。奔走有祈。須答如響。劃重雲而見白日。六合清新。弭駭浪而爲安流。百川順聽。仰至仁之易感。戴鴻施以何窮。屬當收穫之期。不厭晴明之久。崇墉新積。願克保於歲功。擊壤均權。其敢忘於帝力。疏作佛力。

寺觀謝晴青詞疏語

嘉穀告登。既卜有年之慶。連陰不已。遽爲積潦之苗。不勝朝夕之憂。亟扣乾坤之造。賴神功之密運。疏云。林道之情。亟扣慈悲之。俾霽景之遄開。波漲平疇。昔幾壞於垂成之頃。雲屯高廩。今獲全於將失之餘。疏云。賴威神之密運。

愁嘆頓舒。歡欣相告。用是肅陳淨供。觀云淨祇薦微忱。曰雨曰暘。願益臻於時若。有稷有黍。更期遂於秋成。

代料院作生日設醮青詞

年開八袞。迫暮景於西山。誠竭一心。扣至仁於北極。敢憑法醮。庶達愚衷。伏念臣資稟甚庸。志念多雜。義利雖嘗早辨。而私欲易以移人。學問非不究心。而踐履未能中道。越繇近載。浸悟昔非。仰蒙善貸之恩。俯賜曲成之造。無攝生之術。而獲晚景之粗安。無教子之方。而叨世科之相襲。祠館竊罔功之祿。郎闈陞同正之員。靖循僥幸之原。悉自穹窿之覆。肆當誕日。肅按真科。至敬無文。庸假蘋繁之薦。隆慈易感。冀全莊樸之生。□□運之潛消。而餘齡之增衍。臣當力圖新善。期補襄愆。味太上至道之言。不忘朝夕。踐昔人方便之戒。以訓子孫。臣無任

仙遊山謝雨詞

輕生嗜鬪。莫如南浦之民。足食安居。尤切西成之望。嗟亢旱歷時之甚久。幸甘霖入夏之甫均。方力穡之惟勤。俄兼旬之不雨。平疇雖種。恐立致於焦枯。高壤未耕。幾盡成於蕪廢。惟鄉俗人情之易動。殆山川風氣之使然。斗粟之價稍騰。奪攘且起。百畝之收或失。愁嘆奚堪。方共啓於微忱。欲抑祈於大造。深仁易感。美澤遽敷。阡陌相望。化龜坼而爲膏潤。室家胥慶。易狼顧而爲歡忻。爰卽仙山。肅陳法醮。以謝曲成之賜。以靳然惠之恩。二氣均調。迄底豐登之樂。四民咸裕。漸還醇厚之風。

仙遊山建醮青詞

指湖湘而分闡。深愧非材。瞻霄極以陳情。冀蒙宏覆。伏念某。奮由寒賤。本極凡庸。敢圖坯冶之恩。疊冒科名之寵。入聯禁從。出奉詔條。論功會篋於錙銖。積贖已逾於丘阜。致嬰慘變。奄及慈闈。念咎畏威。惟日虞於譴罰。貪榮倖進。敢復覬於恩光。詎意公朝。未忘孤跡。口之次對。付以名藩。茲涓日以戒行。敢籲天而控懇。川塗云遠。況當栗冽之期。覆載何私。願昇安全之幸。俾早祇於職守。當虔奉於官箴。上焉赫赫之皇穹。照臨孔邇。下則巍巍之靈嶽。顧盼可瞻。誓堅對越之誠。益勵首公之節。庶獨民瘼。少答國恩。更斬佞善之仁。終成及物之志。

潭州上元建醮青詞

三元紀節。茲臨錫福之辰。十國爲連。適際牧民之始。敢殫誠而有禱。冀蒙覆以均安。伏念臣。猥被宸綸。叨分楚服。披圖案牒。昔雖號於富饒。問俗觀風。今實多於愁嘆。以非材而臨涖。將何道以撫摩。方弛櫜之云初。已炷鄉而自誓。凡躬行之當勉。如對神明。苟民瘼之未紓。若拯焚溺。期少伸於志願。以無負於選掄。若雨暘寒燠。之以時。與水旱札瘥。之不作。惟化工之是賴。匪人力之可能。是用嚴三齋七戒。以陳儀爲一道。九州而控請。仰覬好生之大德。俯矜難保之小民。富有倉箱。俾遂西成之樂。聲無桴鼓。庶寬南顧之憂。

湘春堂建醮青詞

藩維寄重。懼勝任之惟艱。覆載恩深。願控誠而有禱。伏念臣。甫離憂患。遽被恩榮。旣莫遂於忱辭。遂冒當於隆委。自數千里封陞之廣。有百萬戶生口之蕃。林岫錯居。每難帖服。營屯列峙。可後拊循。凡而九郡之威休。皆是一身之舉厝。疚心思治。殆寢食之靡遑。節用愛人。敢圭銖之自奉。雖爲仁由己。而成功則天。仰

祈生育之恩。俯賜安全之幸。使身無苗疾。而家用平康。庶無私慮之牽。一惟民隱之卹。誓竭公勤之素志。迄成惠利於此方。上焉赫赫之皇穹。鑒臨孔邇。下則巍巍之靈嶽。顧盼可瞻。苟畔斯言。敢辭于罰。

祈雨建醮青詞

職玷撫摩。難勝二千石之寄。民憂旱暵。莫如七八月之間。敢瀝丹衷。冒于洪覆。睠此湖湘之凋瘵。異乎江澗之富饒。本乏蓋藏。況加科配。故雖豐稔。猶或嗟咨。或惟一穀之弗登。立見郡生之告病。幸自春而徂夏。蒙賜雨之以時。早稻既收。晚苗亦茂。正需嘉澤。庶迄全功。粵繇邇日以來。忽苦常暘之沴。懇祈雖切。感格未能。雲未合而條離。雨方沾而隨止。夙宵自省。震懼靡遑。卽吉旦以陳儀。籲高旻而致請。願垂矜憫。亟解焦枯。當白露之將臨。俾甘霖之盪應。實穎實粟。遂爲上熟之年。成始成終。敢忘大造之力。

謝雨建醮青詞

一念在民。惟豐穰之是願。歷旬不雨。則忱惕以靡寧。矧自入秋以來。幾有常暘之慮。遐想溝塍之涸竭。不勝肺腑之悵焚。輒籲告於九旻。每凌兢而百拜。祇荷穹窿之覆。屢垂沾溉之恩。觸石興雲。變陰威於炎赫。隨風入夜。回膏潤於焦枯。仰戴天慈。敢稽醮謝。然早暵之期頗久。而涵濡之澤未深。嘉穀方華。正須護養。驕陽孔熾。豈易堪任。冀上帝之好生。憫下民之無告。載霑載足。迄成上熟之年。旣庶旣安。侵還近古之俗。

生辰建醮青詞

歲月推移。復值始生之旦。夙宵震懼。難酬罔極之恩。輒露微忱。冒塵穹聽。伏念臣慙愚寡識。樸鈍非材。不自意於遭逢。迺積叨於榮顯。惟覆載生成。實乾坤之造。而鞠育教誨。繫父母之仁。惕若省循。篋焉稱塞。蓋

克肖其德。然後爲弗失其性。而不辱其身。然後能無忝其親。臣之於期。固常有意。年已幾於知命。學猶愧於反躬。屬當初度之臨。深切愚衷之感。劬勞莫報。方懷俯仰之慙。宴樂是娛。敢惟世俗之徇。爰假道家之典。肆陳法醮之儀。備罄精誠。冀蒙福祐。脩身進德。獲爲名教之全人。尊主庇民。望究平生之素志。自餘私禱。不敢僭。

下元節天慶觀建醮青詞

伏以十國爲連。濫膺南服之寄。三時不害。迄遂西成之功。繄庶俗之小康。皆至仁之廣被。伏念臣憊愚寡識。樸鈍非材。叨九重擢之榮。付一道撫綏之責。兵民兼總。旣負荷之維艱。蠻獠雜居。尤服馴之匪易。所期一稔。以弭百憂。曰雨曰暘。荷天慈之昭答。有黍有稷。俾歲事之獲全。豈微臣感格之能。繇大造幹旋之妙。卽下元之令節。按太上之冲科。以謝殊恩。以祈來貺。降福祥於有永。銷菑沴於未形。三登曰太平。常底豐穰之慶。百樂生治國。再還淳古之風。臣無任

甲申上元醮青詞

三元紀節。茲臨錫福之辰。千里分符。實任宅生之寄。敢爲民而控請。冀蒙覆以均安。伏念臣猥奉邦條。倏周歲籥。顧慙菲德。每深曠敗之虞。獨荷至仁。倍費生成之造。雨方祈而輒霈。年幾歉而告登。瑞霏滂降於嘉平。麗景有華於元日。仰戴穹窿之施。益深祇懼之誠。爰卽公庭。載陳法醮。冀精忱之昭格。獲景貺之遄臻。調二氣以孔時。復五兵而弗試。祝融回祿。無煙燄鬱攸之災。湘江洞庭。無風濤覆溺之害。閭里清淨。溪峒晏寧。末路壁全。豈獨守藩之幸。遐方枕奠。式寬當宁之憂。臣無任

建醮青詞

甲申四月十一日。時有白氣出於鷓鴣吻。恐爲兵災之象。故致禱焉。

職叨作牧。慚非守土之材。志切爲民。爰控籲天之悃。伏念臣猥蒙推擇。繆任撫摩。幼學壯行。但欲寸功之及物。夙興夜寐。未嘗一念之謀身。每務廣於上恩。期亟還於舊觀。而臣材能淺薄。智識乖疎。雖懷憫俗之至情。愧乏召和之善政。里閭憔悴。城邑蕭條。歲非不熟。而穀價反騰。斂非不輕。而民財轉乏。凜然終日。抱此百憂。況陰陽或舛於運行。而災沴間形於兆朕。直惡切。賦上。皆繇不德。其敢自文。惟仰懇於上穹。冀垂憐於下土。誕錫和平之福。潛銷變故之虞。雨暘寒燠。之以時。迄臻大稔。臯疾裁兵。之不作。咸遂小康。第令民命之獲全。何異臣身之蒙施。臣無任

祈雨建醮青詞

爲政而宜於人。媿乏召和之術。不雨而至斯極。敢忘省咎之誠。瀝血書詞。鞠躬請命。伏念臣猥慚迂陋。繆任藩宣。明不足以察物情。惠不足以蘇民瘼。歎愁怨恨。豈無隱伏。而未知寒燠雨暘。致使連行之或□□。今之旱。職此之繇。已備舉於祈□□□□□□□□。臣之臯有衆何事。况難安者田里之生。而易動者湖湘之俗。縱令豐稔。猶費撫綏。脫或饑荒。將奚拯拯。凜然億萬姓之命。繫此一二日之間。不勝疾首而痛心。殆甚履冰而蹈火。仰祈大造。俯鑒危衷。霈甘霖於久亢之餘。活嘉穀於垂成之際。庶幾亦子獲逃溝壑之菑。願以微軀。獨被雷霆之譴。

青詞甲申六月二十一日天慶觀

旱方千里。繇繆政之傷和。哀籲九天。爲黎元而請命。載念湖湘之凋瘵。覓殊江浙之富饒。頻年皆稔。則毗俗粗安。一日告饑。則事變雜出。在昔固嘗深病於今。尤可隱憂。蓋當糴貴之餘。正切食新之望。億矣百鈞之重負。日冀息肩。惴然一葉之漏舟。共期脫險。儻或乖於所擬。復何恃以自存。每殫朝夕之思。不知涕泗之集。敢載陳於法醮。用備列於危衷。仰祈穹昊之仁。亟拯生靈之厄。敕羣龍而並起。霈一雨以滂流。遂作甘霖。盡活嘉穀。若微臣之有臯。豈顯罰之敢辭。鑄爵秩而削年齡。悉惟大造之命。全妻孥而安隴畝。願保細民之生。臣無任

太一醮青詞

恭以亢旱爲災。嗟赫赫炎官之虐。至仁可愬。仰煌煌紫極之尊。嚴三齋七戒。以投誠爲百姓羣黎而請命。伏念臣受材至陋。竊寵過優。雖存濟物之心。愧乏召和之政。當祝融之用事。俄妖魃之肆行。不勝朝夕之憂。深念公私之計。平準之儲甚乏。況已空賑糶之餘。大家之積幾何。復告竭勸分之後。欲脫窮民於久困。惟斬新穀之倍登。殆猶痼疾之思痊。更甚縲囚之獲赦。左饗右粥。望或失於垂成。寒耕熱耘。功遂爲於徒費。旣絕可生之路。是擠必死之塗。雖下吏之愆尤。有以召此。豈上天之仁愛。忍使致斯。肅寶醮以陳儀。瞻璿霄而瀝懇。或生靈有過。幸務宥其愚冥。或分野當災。句密回於造化。條起寸雲之蔭。霈爲三日之霖。盡活枯苗。迄成豐歲。庶幾鴻鴈之衆。各保安居。願以螻蟻之身。獨當顯罰。臣無任

南嶽正殿建醮青詞

清朝假寵。濫司十國之連。繆政干和。致貽千里之旱。敢抒丹懇。仰冒蒼旻。晻是湘郊。實維楚服。厥壤少腴。

而多瘠。其民易動而難安。年雖屢登。尚虞佩犢之警。歲或小歉。立有狼顧之憂。粵絲季夏以來。忽苦常暘之沴。近則長沙資陽之境。遠則零陵瀟水之間。綿數郡之相望。越累旬而不雨。夙宵自省。寢食靡遑。比雖潤澤之數霑。尙慮邇遐之未徧。載瞻喬嶽。密接層霄。旣雲氣之所藏。且神靈之攸宅。爰卽祠庭之邃。就陳醴席之嚴。冀赫監之下臨。獲精誠之上達。祝融天柱。變陰鷲於須臾。屏翳豐隆。奉神威而奔走。俾列城之均泱。庶一稔之可期。眈俗相安。無匹夫之弗獲。牧臣有臯。豈顯罰之敢辭。臣無任

太一醮謝雨青詞

六月二十七日醮。七月初二日夜占。蒙許秋前賜雨。初八初九皆大雨。中元謝且祈十八十九兩。二十四日雨。

寶穡將成。俄苦悞焚之虐。璇穹非遠。輒殫哀籲之誠。旣霈澤之維時。敢涓辰而控謝。伏念臣自罹亢旱。每極隱憂。齋居幾及於五旬。露奏豈惟於三瀆。蓋荆楚荒涼之有素。而里閭貧悴之孔多。職在長人。當任牛羊之芻牧。志期阜俗。忍令鴻鴈之流離。故切切於禱祈。殆皇皇如饑渴。洪慈垂憫。密回造化之機。膏潤應期。大慰雲霓之望。粟直爲之浸滅。物情賴以少紓。適中元令節之來臨。舉太一冲科而載演。豈曰仰禱於大造。所期游瀝於微衷。惟眈庶之來陳。與官僚之歸報。雨或多而或寡。未遂均霑。苗有秀而有枯。尙虞難保。更冀甘霖之相續。庶幾晚稼之獲全。以終上帝好生之仁。以裒下民垂絕之命。敢伸虔請。願賜恩憐。於立秋處暑之間。亟臻渥洽。俾衡嶽湘江之境。共樂豐登。

南嶽青詞

早太甚以如焚。備馨禱祈之悃。天不言而善應。迄垂沾勺之仁。仰戴隆恩。敢忘祇謝。伏念臣猥絲推擇。繆

任撫綏。旣分圖外之顧憂。常軫民間之休戚。顧慙舛政。上干二氣之和。馴致常暘。幾遍三湘之境。極夙宵而省咎。如疾疢之在躬。誕卽靈宮。肅陳醮席。爲列城而請命。賴洪覆之垂休。自入孟秋以來。屢沾時雨之潤。苗將枯而復茂。粟方貴而浚平。雖遐邇不同。或有全虧之地。然盈虛相補。尙饑下熟之年。旣荷殊恩。敢祈終惠。蓋頃屬悒焚之際。嘗嘿思賑卹之宜。欲殫一己之勞。期建百年之利。必也豐穰之不失。庶乎規畫之可行。冀皇天后土之有臨。亟成微志。俾赤子黎元之得所。盡出洪鈞。臣無任

天慶青詞

旱太甚。以如焚。備馨祈禱之懇。天雖高而聽下。迄成沾勺之恩。仰戴隆慈。敢忘祇謝。伏念長沙之境。越遜季夏以來。蓋愆亢者久之。亦焦槁之極矣。臣恭任口靈之寄。不勝朝夕之憂。屢控懇於穹旻。遂獲臻於口潤。始焉不雨。所以示儆戒之威。終則有秋。又以昭仁愛之意。仰化工之至妙。訴民命之獲全。願已幸於蒙休。尙有蘄於終惠。蓋頃屬歎泮之際。嘗嘿思惠養之宜。在其闡閣。則欲做張詠賑民之法。若時郊野。則欲遵朱熹置廩之規。不辭一己之勞。期建百年之利。必也豐穰之不失。庶乎規畫之可行。冀皇天后土之有臨。亟成微志。俾赤子黎元之得所。盡出洪鈞。

生日建醮青詞甲申

年幾五裘。嗟老景之易侵。身在三湘。倏誕辰之載值。當常情宴樂之日。實微生悲痛之時。敢瀝丹誠。仰干穹覆。伏念臣猥繇庸惰。積有僥逾。每蚤夜以兢兢。殆淵冰之凜凜。念天地賦臣以此性。必盡性然後無慙。而父母生臣之此身。在立身豈容有愧。顧年齡之浸迫。迺德業之未充。旣莫報於劬勞。詎能安於戴履。屬

當初度。尤惕愚衷。爰仰叨於高旻。冀俯矜於末路。俾自今而攸往。凡有志以必成。居無疾恙之侵。動寡悔尤之累。操修合道。粗無慊於前賢。功利及人。不虛生於斯世。

黃籙正醮青詞乙酉三月。自長沙歸。未赴召命。

涓辰藏事。有嚴金籙之科。踴地投誠。冀徹璇霄之聽。伏念臣曩罹艱棘。復值災沴。嘗於壬午之春。誕卽西山之麓。肅陳法醮。哀籲高靈。用追福於慈親。且祈安於私室。仰蒙道蔭。密佑孤踪。兩載于藩。旣兵民之胥悅。一門被澤。復子姪之均霑。除書荐下於听庭。愍册增光於幽窅。竊省僥踰之幸。悉繇覆載之恩。屬暫還蓬蓽之居。用敬修蘋藻之薦。瀝肺肝而有禱。冀穹旻之垂仁。國步方艱。願亟臻於綏靖。聖圖有永。期益底於延洪。忠賢進而公道顯。行德政脩而人心順。聽邊疆寧謐。海寓清夷。但令斯世之舉安。時乃微臣之至願。干名慕利。敢爲私己之謀。尊德庇民。斬遂平生之志。尙惟妙造。賜以曲成。臣當勉竭丹衷。力行素學。夙宵一念。常如上帝之臨。夷嶮百爲。悉賴神明之助。

西山設醮青詞乙酉自禮部奉詞

入參侍從。莫裨訪落之謀。歸返田廬。甫遂退休之志。敢據誠懇。僭瀆穹旻。伏念臣器識凡庸。行能淺薄。屬龍飛之有作。叨駟召之最先。累疏辭榮。旣難回於成命。一忱思報。其敢徇於私謀。肆當奏對之初。首陳狂瞽之論。主上嘉其忠讜。許卽施行。臺臣指其臆愆。句加譴斥。迄從寬典。仍假寵章。凡微蹤獲保於安全。皆洪覆曲垂於庇佑。方息肩於弛擔。正思過以杜門。仰冀慈仁。密回大造。俾臣身無災疾。家用平康。早窺至道之精微。盡滌平生之疵吝。危機弗作。姑容安跡於山林。拙守難移。終願酬知於君父。

西山再醮青詞乙酉

星躔密運。固定數之莫移。天道至仁。惟微誠之可籲。輒控凌兢之恟。仰祈覆育之恩。伏念臣賦性顛蒙。乘心慙拙。平生行己。但求無愧於幽明。一意愛君。其敢留情於寵利。緣憂思之太過。致言論之失中。上雖亮其無他。衆爭指其有辜。皆繇迷繆。自取顛隳。旣被譴以來歸。每省愆而思改。迺曆家之推步。謂乾象之加臨。尙據挺災。未能集福。凜然終日。方恐懼以自修。考之古人。尙祈禳之不廢。矧惟薄德。敢後投誠。仰祈大造之照臨。俯鑒微衷之忱惕。赦其往咎。許以後圖。潛銷坎險之虞。誕錫泰亨之吉。孤忠直節。早見察於朝廷。弱質衰蹤。獲自安於林藪。

粵山入宅青詞丙戌九月

蝸廬甫就。冀臻居處之安。鴻覆無邊。輒控生成之禱。伏念臣越自近歲。廬于先塋。比緣齒髮之日侵。每懼陰嵐之易染。平時漫仕。未嘗爲豐培囊橐之私。一旦投閑。安得有營創室廬之力。姑徹移於舊宇。用補葺於新巢。輪焉奐焉。敢効管大夫之侈。有矣美矣。庶幾衛公子之規。雖無百堵之雄。幸挹兩山之勝。厥維吉壤。界自高穹。旣諏日之惟良。遂攜家而托處。潔誠一念。祇謝三靈。願垂燾載之仁。誕錫和平之福。杜門省咎。早見察於清朝。講學脩身。獲預聞於至道。教子粗傳於忠孝。生孫適迓於休祥。誓畢此生。勤行衆善。庶無負聖賢之訓。以此酌天地之恩。

母夫人祈壽青詞

高堂華髮。將臨誕育之辰。寶笈冲科。預控壽昌之禱。凌兢望賜。俯伏陳詞。伏念臣母大恭人吳氏某。蚤歷

艱勤脫膺榮養七十春而復四實惟喜懼之年九五福之備全正賴生成之造敬涓元日祇扣高真冀延耆艾之齡永享清溫之奉昭昭在上願不靳於垂慈老老及人詎敢忘於錫類

保安設醮青詞

居官無補懼獲隨於幽明赦過有祈敢投誠於穹昊伏念臣猥慚愚劣積冒清華雖戒謹自將粗守不欺之節然操持或戾豈無可錄之愆竊自省循每深震恐惟上聖以好生爲德而中元乃宥罪之辰肅藏醮筵敬陳忱禱冀蒙覆護俾這憂虞上奉親慈願延口壽下將擎指均遂燕寧但無非意之災卽是殊常之福自餘僭悃不敢妄陳

春祈設醮青詞

春者四時之首實肇化工食爲八政之先最關民命卽殊庭而歲事控忱懇以致祈三登曰太平願格豐穰之應百樂生治國漸遠熙洽之風

中元節祈安設醮青詞

伏以譴材無取誤分千里之符善最未聞幸畢二年之戍獲全狐跡端藉鴻私伏念臣本乏吏能繆膺郡寄雖清白一節粗無愧於幽明然勤勞百爲終自慙於疎拙仰賴穹窿之施曲垂覆露之仁兩暘若時歲以屢稔盜賊屏跡人亦僅安訖遂終更實踰素望是用肅陳淨醮祇謝高真念受代之非遙將戒行之有日偏親華髮適當喜懼之年遠役修涂願錫康寧之祉下至闔門之壯穉均祈洪造之生成但無非意之虞卽是殊常之福自餘僭悃不敢妄陳

黃籙醮青詞

璇霄雖邈。惟精誠可以感通。金籙載陳。於科教至爲嚴重。敢干威譴。僭露忱詞。伏念臣本以蠢愚。奮由孤口。荷洪造甄陶之厚。叨皇家爵秩之榮。學雖篤而至道之未開。德弗充而虛名之徒竊。稔成過咎。罔自覺知。連年骨肉之挺災。凋零已甚。一旦庭闈之弃養。痛悼奚堪。方朝夕自省於愆尤。復父子俱嬰於疾疚。凜淵水而知警。懼覆載之莫容。敬發丹衷。跪陳寶籙。果蒙矜宥。亟底痊平。亶繇再造之恩。畀以安全之幸。屬正月始和之際。實天官賜福之辰。祇演冲科。用近景貺。惟先妣劬勞之未報。冀道力以超昇。惟全家長穉之相依。丐天慈之曲被。更推餘澤。併逮含靈。俾溥天率土之間。咸安生聚。暨泉曲幽扃之下。盡釋沉淪。茲上聖好生之本心。亦微臣及物之素願。控誠以請。從欲是求。

太乙醮青詞

違南陔孝養之樂。悵莫報於母恩。瞻東極瑞相之尊。願虔依於道力。輒瀝衷摧之悃。冀蒙矜憫之仁。伏念臣亡妣某。性稟惠慈。行全懿淑。事姑盡孝。早彰刲股之高風。教子成名。無愧剪鬢之盛節。一念惟勤於嚮善。千金不吝於濟人。謂宜膺五福之具全。迺僅止七旬之有四。攀號靡及。荼毒奚堪。長夜杳冥。恍不知其如往。慈顏彷彿。空儼若於生存。欲濟拔於營魂。用仗依於聖造。伏望青華注籙。黑簿銷名。或仍生福德之門。或徑列仙真之籍。茲爲忱禱。允賴洪恩。更祈寶林蓮座之光。普及泉曲。酆都之識。念愚氓之蒙昧。或墮沉淪。變火翳爲清源。悉歸超度。此上聖好生之大德。亦微臣控懇之至情。瀝懇有所。鞠躬而俟。

母夫人愍忌設醮青詞

昊天罔極。莫報劬勞之恩。春露既濡。豈勝忱惕之念。惟歲元之不日。實母氏之誕辰。綵服稱觴。記每歲歡娛之舊。緜裳捧奠。愴于今變故之新。驚華誕之重逢。想慈顏之如在。茫茫長夜。念邇返之無期。浩浩蒼穹。幸歸投之有路。肆陳淨醮。追拔營魂。冀蒙被於天慈。蚤超躋於仙籍。載念送終之重。無踰治墓之先。異夢有聞。既類牛眠之兆。遠期是卜。將營馬鬣之封。更祈列真覆幬之仁。誕受二氣冲和之正。庶幾體魄獲安。固於九原。抑俾子孫蒙休祥於百世。

黃錄十王表

母恩莫報。徒切蓼莪之悲。聖力無邊。輒陳蘋藻之薦。載披悃愾。虔叩叡聰。伏念臣亡妣吳氏。性稟惠慈。行全懿淑。事姑盡孝。早彰刲股之高風。教子成名。無愧剪髮之盛節。一念惟勤於奉道。千金不吝於濟人。謂宜膺五福之具全。迺僅止七旬之有四。攀號靡及。荼毒奚堪。長夜杳冥。恍不知其如往。慈顏彷彿。空儼若於生存。欲濟拔於營魂。用歸依於真宰。恭惟十王真君殿下。職司地府。德合天心。願獨已往之愆。甄錄平生之善。或列仙真之籍。或生福德之門。仍冀慈仁。偏加凡庶。念愆冥之冒犯。致墮沉淪。變幽暗爲光明。悉歸超度。此列聖好生之本意。亦微臣控懇之至情。瀝懇有祈。鞠躬以聽。

十王表

伏以十真列位。雖嚴地府之司。一德主生。實體天心之運。敢殫忱悃。冒瀆威神。竊以民本秉彝。疇非好善。情因逐物。乃至失真。皆緣一念之差。致墮九幽之苦。業報雖由於自作。愚冥實出於無知。共惟十王真君殿下。聖德高深。神功浩博。願垂慈憫。俯徇懇忻。推上穹覆育之仁。拔下土沉淪之衆。瓊章寶錄。俾乘超度。

之緣。火翳劍林。化作清源之境。

仙遊山第一會黃籙醮青詞

天心溥博。至仁常軫於黎元。道教修崇。勝會無逾於黃籙。肅殊庭而不葳。馨忱悃以有陳。竊以下土茫茫。夤無邊際。衆生擾擾。多積愆尤。或三災八難之縈纏。或六道九幽之輪轉。孽雖自作。情有可矜。儻非祈赦宥之恩。何以度存亡之厄。是用卽眞仙之勝境。演太上之冲科。連晝夜以陳儀。合幽明而控禱。今兩淮荆蜀之壤。兵革方興。五嶺劍汀之間。疫癘大作。凡賦形之有衆。多隕命於無辜。深虞變故之未銷。以致流行之浸廣。仰斬仁聖。俯念生靈。敷太極二五之酥。潛祛沴氣。轉陽九百六之運。邁格不平。生者有耕鑿飲食之安。死者無沉滯煩冤之苦。匪但此方之蒙福。併令率土之皆春。咸賴至眞。密回妙造。兢兢一念。不勝對越之誠。赫赫九旻。願降高明之監。

太乙救苦天尊青詞

伏以按冲科於黃籙。方葳殊因。瞻瑞相於青華。敬陳忱悃。維下民之賦質。皆上帝之降衷。繇因物以有遷。致積愆而罔悟。一念顛迷之莫返。墮入九幽。百年歡樂之幾何。受報千劫。孽雖由於自作。情本出於無知。仰太乙之至仁。實羣元之司命。願垂慈憫。俯徇懇祈。現寶林蓮座之光。旁通幽隱。化火翳劍山之苦。同作清源。

西山先生真文忠公文集卷四十九

祝文

潭州謁先聖癸未正月

昔某之治泉也。惟節用愛人之訓。是服是行。其去之日。不獲辜於泉人。賴此而已。今者。叨蒙上恩。作屏南楚。委寄之重。又非泉比。將何以免責哉。惟於所謂節用愛人者。益勉其所未至焉。某始祇謁于庭。爛焉丹誠。尚冀昭鑒。

先賢祠

濂溪先生周元公。明道先生程純公。伊川先生程正公。武夷先生胡文定公。五峯先生胡公。南軒先生張宣公。晦庵先生朱文公。聖學不明。千有餘載。數先生相繼而出。遂續孔孟不傳之統。可謂盛矣。惟時湖湘淵源最正。蓋濂溪之生。實在春陵。而文定父子。又以所聞於伊洛者。設教於衡嶽之下。張朱二先生。接迹于此。講明論著。斯道益以光大。然則天之生數公也。所以幸天下與來世。而湖湘之幸。抑又多焉。頻宮有祠。其來尚矣。某雖不敏。然於數先生之學。蓋嘗用其力者。而庸鶩之質。欲進未能。叨恩假守。用敬謁于祠下。緬懷遺風。當益自勵。冀於斯道。或有聞焉。施之有政。庶乎寡過。惟先生其相之幸甚。

漢高帝

漢太祖高皇帝。太宗文皇帝。惟漢之興。縣祀四百。深仁厚澤。肇於高祖。而成於太宗。威神在天。實相下土。若時楚服。廟貌在焉。惟二帝之心。今之嘉惠湘民者。亦無異於昔之愛漢赤子也。某叨恩假守。敢不告虔。尙惟嘿佑。俾克用乂。

漢長沙文王 長沙定王 長沙陶公

傳曰。君子賢其賢而親其親。小人樂其樂而利其利。是以沒世不忘也。夫爲政而使民沒世不忘。斯亦難矣。王之受命國于茲土。蓋千有餘祀。而民奉嘗之。如一日也。嗚呼。此豈可以智力求哉。某叨恩假守。敢不告虔。尙惟嘿佑。俾克用乂。

三閩大夫忠潔侯屈公

某之後先生也。蓋千有餘祀。而於離騷九章。一讀一興嘆焉。甚哉。先生之忠於國也。世降俗末。媚佞成風。過其祠者。可以泚厥頰矣。某雖無似。願師其人於千載之上。視事之始。敢不告虔。履潔含忠。益當自勉。

賈太傅

某之後先生也。蓋千有餘載。而於太息流涕之書。一讀一興歎。甚哉。先生之忠於國也。下同忠

端潔譚公

譚端潔公。昔新莽氏。欺天誣衆。盜有神器。時則龔大夫凜然抗節。不食而死。著在青史。至今猶有生氣。靖康之難。古昔所無。而在廷之臣。甘心屈膝於僞楚之庭者。不可勝數。惟公秉志之死靡渝。橫流滔天。中屹砥柱。易名曰潔。與龔同稱。某叨領守符。偶在公里。顧瞻頻水。祠像在焉。清風襲人。千古不泯。酌以卮酒。慨

其永懷。

忠節十位

昔者王厚之難。晉氏危若綴旒。惟時賢王。實刺此州。慨然倡義。志殲兇逆。羣英協輔。共圖厥助。事雖蹉跌。而一時臣子。知有逆順之理。卒以滅賊。其功豈不偉哉。爰暨本朝。間關南渡。蠢茲孽虜。蹂我湖湘。卓哉四君。寧死無辱。明綸誕布。錫以嘉名。與晉諸賢。實同廟祀。激勸之指。厥惟深哉。某竭來殿藩。獲瞻祠像。酌以卮酒。慨其永懷。

春祭諸廟祝文

春之有祈。豈惟故事。民之望歲。蓋出至情。矧以非材。甫茲假守。慨念長沙之故國也。非樂土之舊風。將勸庶俗之均安。豈宜一穀之不稔。肆陳菲饌。用敬靈聰。曰雨曰暘。顧協四時之敘。多黍多稌。迄臻百室之盈。

祭太守禮部朱公山長監簿周君安撫忠肅劉公院

岳麓書

五閨搶攘。六經掃地。人文尙闕。學校闕如。美哉朱公。來守茲土。以經術導民。而書院之教。以興賢哉。周君繼長是山。以德行見褒。而書院之名。以著中更。圯廢亦既有年。維忠肅公。丕振厥緒。自堂而序。輪奐一新。教養之際。於焉大備。三君子相去二百餘年。而尊經勸學之心。前後如一。祠像並設。豈不宜哉。某以非材。繆膺分闈。顧惟涼德。何以長民。教化所先。敢不加意。肅容祇謁。如拜下風。勉紹前規。庶幾弗墜。謹告。

祭胡給事墓

故武夷先生文定胡公之墓。自熙寧以還。新學孔熾。春秋一王之法。闢而弗章。公聞道伊洛。慨然以尊君

討賊自任。著爲訓傳。大義炳然。使洙泗之道復明。而荆舒之禍以熄。其有功世教。可謂盛矣。某自少讀公書。考觀行事。高山景行。仰慕何窮。九原不作。竊用興嘆。茲叨上命。來鎮三湘。惟公生於武夷。而老於衡嶽。旣鄉閭之先哲。又道德之宗師。有墳其丘。實在寓里。屬拘印執。謁拜無從。爰遣祠官。敬陳菲薦。仍禁止其樵牧。且訪問其後人。興起士風。庶其在是。英靈未泯。尙鑒此心。尙饗。

祭胡侍郎

昭告于故致堂先生侍郎胡公之墓。惟公早侍家庭。實聞至道。壯登侍從。屢進昌言。正章蔡弄權之誅。斥汪黃誤國之辜。英風勁氣。獨立不回。旋觸權臣。遠擯嶺海。方且心潛魯語之大訓。臆誦溫公之遺編。著爲二書。垂耀千古。某以晚出。幸同鄉邦。顧瞻丘塋。適在郡境。往致一酌。慰其子孫。歿而不忘。鑒此誠意。尙饗。

祠部

故祠部郎中胡公之墓。公以賢哲之嗣。得家庭之傳。著通旨一書。亦旣有功於聖筆。對權臣數語。尤足深拆其姦心。興言高風。仰止惟舊。往陳一奠。用表寸誠。尙饗。

五峯

故五峯先生胡公之墓。昔者洙泗之門。高弟甚衆。獨曾子傳之子思。而子思傳之孟子。爲得其真。自餘源遠末分。散爲異端。其亦多矣。某嘗竊謂子思之功。在聖門爲最盛。蓋上能大其師學。而下能授之英賢。卒昌斯文。孰與之匹。維兩程氏。講道河南。曰謝與楊。得其要旨。文定早歲。俱從之游。旣誠其身。復以教子。公之生也。氣稟特殊。玩心神明。不舍晝夜。優游自得。抱道以終。友畀其徒。曰子張子。斯文有託。誰之力焉。仰

視子思庶幾無媿。某以晚學。緬懷遺風。敬遣官僚。往致一奠。尚惟嘿相。於道有聞。尚鑒。

祈晴諸廟祝文

東作方興。惟雨是仰。此豈禱晴之時也哉。蓋氣數乘除。最爲可畏。羸於今則或縮於後。此守臣之所甚懼也。今溝瀆川源。在在充溢。譬之飲食。屬糜而已。一或過度。則反爲菑。此又守臣之所甚憂也。況積澇則麥爲之傷。食濕則蠶爲之病。休戚所關。皆非細事。是用齋心潔慮。禱于有神。埽除陰霾。丕煥霽景。在神直易。爾以神之所易。解吏之所憂。惟慈仁其亟念之。幸甚。謹告。

嶽麓湘江祝文

祭法有之。山川丘陵。能出雲爲風。雨曰神。又曰。非此族也。不在祀典。嶽麓湘江之爲山川。可謂能出雲爲風。雨者矣。而春秋之祀。顧弗之及。非曠典與。屬茲霖潦。惕然興懷。方念卽爽壇之地。以望而祈焉。熙陽遽升。天宇清霽矣。是用易祈爲謝。且繼今以始。與祈報之禮焉。郡計少紓。又當立之壇壝。永爲嚴事之地。神其大芘茲土。錫之有年。俾人知山川之功。章灼不可誣如此。豈不休哉。謹告。

社稷祝文

凡禱祈之事。必先社稷。禮也。屬者霖雨過度。幾於靡神不請矣。而獨未及於土穡之神。此某不知禮之辜也。媿懼之念。方惕然于中。而雲陰劃開。霽景呈露矣。是用躬拜壇壝之下。旣以爲響答之謝。顧自今至于秋成。其爲日尙遠。而所望於神者益深。惟時其雨暘無過與不及。俾年爲有年。則土爲樂土。其敢忘神之。大惠也哉。謹告。

諸廟謝晴祝文

迺季春以來。雨澤過度。輒抒誠悃。禱于有神。朝夕嚴恭。以俟嘉命。果蒙響答。若鼓應桴。甲子之朝。垂霽沐矣。清風既發。羣陰劃開。宿麥將登。庶幾有望。穉苗日茂。抑又可期。嘉與斯民。共拜靈貺。尙惟矜憫。迄畀有年。謹告。

諸廟祈雨祝文

俗以仲夏再挾。爲分龍之日。曰雨曰霽。歲之豐歉。於是而占焉。儲粟之家。亦必俟是日之雨。然後肯泄其所藏。以惠閭里。其利害豈它日比哉。載念湖湘。實爲凋俗。歲雖告稔。民食尙艱。一有不登。立見擠壑。是用先期三日。以奔告于有神。惟神愛民之心。不減於守土之吏。幸哀而憐之。賜以滂沛之澤。則一稔可卜。百憂以寬。拜神之賜。寧有紀極。謹告。

諸廟謝雨祝文

比以龍會之辰。膏澤是望。輒殫忱悃。禱于有神。荷神之靈。甘霖隨降。有禱有謝。惟禮之常。爰飭有司。肆嚴昭答。然壬戌欲雨而遽晴。甲子欲晴而小雨。繇稅政之多有。且愚誠之未孚。退自省循。敢不祗懼。尙靳矜宥。變沴爲酥。迄俾有年。庶全民命。尙饗。

諸廟祝文

六月之雨。聖人筆于麟經。其不厭數也。明矣。惟潭之爲郡。實瀕大江。雨未彌旬。則怒濤歎薄。下田之稼。凍乎其可憂。況益水之陽。爲山之源。以汎溢告。而湘陰人以澇聞矣。則某之所以奔告致祈者。其庸敢後乎。

惟神至仁。早賜開霽。庶全一稔。以惠我民。謹告。

諸廟祝文

乃者。分龍之望。雨神既幸惠之矣。兩足而慮溢。又惟霽之望焉。求之於人。且厭其數。況神而可瀆乎。然區區之誠。方動於中。而杲杲之日。已赫乎其上矣。嗚呼。神之格思。不可度之如此。繼自今。其敢不愈敬之哉。尊酒告虔。匪以爲報。尙饗。

祈雨祝文

七八月之間旱。從古以來病之。蓋良苗之將穉。猶嬰兒之欲長。膏澤之弗繼。猶乳哺之失時。命之存亡。於是焉在。其忍安視而弗以告乎。惟神不愛須臾之勞。以揀其垂絕之命。使民獲有年之賜。則吏其敢忘神之功。謹告。

祈雨諸廟祝文

昔者。呂氏之書。以秋行夏令爲舛。漢人論兌離之治。亦各有其時焉。自履素商。月有半矣。而蘊隆之虐。方熾。膏潤之澤甚微。誰謂九秋。乃如三伏。陰陽失敘。莫甚於斯。稅政干和。敢不自省。惟神赦吏之臯。憫民之菑。油然而雨作。非特洗歎煩之氣。抑以全豐稔之功。稽首投誠。立俟嘉應。謹告。

祈晴祝文

乃者。穀方華而旱。某以爲請。而神畀之雨矣。今者。穀既成而雨。某又以爲請。神其可無意乎。蓋前日之旱。猶嬰兒之失乳。今茲之雨。猶飽而將疾。二者俱危道也。然吏知其危而憂之而已。若夫憂之而又能揀之。

非神其孰望乎。今事勢亟矣。一日之雨。則禾有一日之傷。如拯溺然。不可緩也。惟神毋愛須臾之勞。而賜以旬日之霽。使民不失終歲之望。神亦無廢前日之功。謹告。

謝晴祝文

秋大熟未穫。方興銓艾之功。雨三日爲霖。懼失豐穰之望。爰潔齋而有請。荷慈憫之亟從。開靈麓之崑雲。煥扶桑之麗景。霽逢甲子。獲寬傷稼之憂。時近孟冬。行畢滌場之役。敢申祇謝。仰答殊恩。尙靳爛月之晴。迄保有年之慶。臣某無任激切感荷之至。謹告。

祈雪祝文

考諸傳記。雪爲五穀之精。故盈尺之瑞。可占豐年。非苟然也。比者。涓選剛辰。將有所於祠下。而誠意甫啓。嘉應遽形。王雲繽紛。疇不欣覩。是用易祈而謝。因謝而祈。願於臘前。錫以三白。拜神之惠。其曷敢忘。

祈晴祝文

迺自季春以來。霖雨過度。頗聞田里之間。穀已播而厄於寒。蠶方育而病於濕。二者皆民之大事。一或失望。將何恃以爲生。況穀價未平。物情正鬱。而陰霖弗止。憔悴可知。此某所以憂愧怵惕。而有所於神也。惟神之威靈。揀此宜無難者。回淑氣於暮春。闔新晴於甲子。使憔悴者頓釋。而憂愧者亦以少紓。其敢忘神之。大賜。謹告。

祈雨祝文

詩曰。芃芃黍苗。陰雨膏之。言苗之方盛。非雨無以滋之也。況仲夏之月。其節曰芒種。其候曰分龍。必潤澤

以時則豐穰可卜。農書之占。厥有常驗。此某之所以奔告於神。而不敢後也。自春以來。民困貴糴。今數月矣。吏雖百方以救之。未能大有濟也。惟入梅之後。與分龍之日。膏澤應期而至。則民之蓋藏者。盡出糴賈。不抑而自平。此在神一舉手之功爾。於民生之久困。察吏術之已窮。惟明神其垂意焉。幸甚。謹告。

謝雨祝文

比以農書之占。曰芒種。曰分龍。於望雨爲尤切。用敬禱于有神。迺丁未。遂雨。甲寅之後。三日之間。又連錫以雨。鉅室之藏。於是乎稍出。而豐年之應。於是乎可期。荷神之施。腆矣。維嘉穀之方苗。猶穉兒之仰乳。願神不倦于賜。而有以終之。使久困之民。早遂一飽之樂。則吏之所以圖報者。其曷敢有忘。尙饗。

仰山祝文

惟山之威靈德澤。肇於太江之西。而延及於重湖之南。有衆恃之以爲司命。屬者。征行厄於風雪。過袁之日。有謁于王。霽景遽開。遂以善達。惟時湘土。離宮在焉。賴神之休。自此焉始。鞠躬拜謁。其敢不虔。

真武殿祝文

於皇上聖。威神在天。誕降福澤于民。俾有寧宇。某之祇事。爲日久矣。叨恩分闕。而靈宮在焉。眎事之初。敬伸謁款。江湖之間。沴氣易作。尙惟慈憫。弭於未然。區區之誠。仰祈昭鑒。

祈晴祝文

比以霖雨過期。煖氣弗効。用祇謁于明神。荷神之仁。不以爲瀆。煥晴光於甲子。回淑氣於暮春。凡某所求。厥應如響。顧何以得此於神哉。惟時細民。方苦貴糴。併蘄於憫。密運化機。俾氣序之不愆。則蓋藏之畢出。

惟神其終念之。

諸龍潭祈雨祝文

迺者甲寅以後之雨。距今甫半月耳。炎風烈日。相爲煽薄。故雖下田之水。亦有竭告者。況高邛之地乎。吏有從田間來者。以爲數日不雨。則多稼可虞。自聞斯言。膺肺如灼。蓋民之窘於貴糴于茲半載矣。盼盼焉。惟早稼登場是望。以紓其困。以揅其急者。非常歲比也。今嘉穀方苗。而膏澤弗繼。一或失望。其將柰何。此某之所以痛心疾首。而有禱于龍君之靈也。郡絀所糜。不克躬詣。而遣官以前。惟龍君之神變迅速。興雲雨以澤萬物。直一噓吸間耳。以一噓吸之勞。而可以救數十萬生靈之命。龍君其肯靳乎。敢再拜以竢。

上封雷池祝文

迺者尉掾之行。已控忱詞。請命於龍君矣。區區悃誠。尙慮未徹。謹洊追簿。正以前。蓋信宿以來。旱氣熾熾。益甚。前日大田多稼。凜然可虞。龍君而不亟揅之。則後雖賜雨。將無所及矣。幸哀而憐之。不惜一噓吸之勞。而全數十萬生靈之命。龍君之功之德。所以簡於上帝者。又將如何哉。敬再拜以俟。

請水祝文

間以旱勢可憂。遣官致禱于靈湫矣。小州曰。祠所。今旱氣日熾。其爲可憂。又甚於前。念非躬禱不可。印綬所糜。願莫之遂。是用恭迎靈湫之水。安奉于郡庭。中洲曰。恭迎神位。伏願章示威神。使油雲鬱興。陰風慘變。從車蓋而來。崇朝之頃。霈爲大雨。則龍君之有大造于茲土也。其可以限量計哉。某謹帥吏民。敬共以俟。

零陵王廟祈雨祝文

惟王之威靈著于湘土。某知所敬仰久矣。歲時禱祀。諉諸有司。而不以身親焉。則某之臆也。今旱勢甚酷。羣情嗷嗷。學校之士。以爲王於旱潦之求。無不響答。特未嘗顯有請而已。某是用矍然。爲愧且懼。俯伏祠下。控誠而拜禱焉。幸哀斯民。亟賜以雨。使歲事獲全。而人無流莩。其所以圖報於王者。其曷敢有忘。

西濟王後殿祈雨祝文

維聖母有池。靈變甚異。見於崇寧間。守臣李闕之記。屬茲亢旱。羣情皇皇。而此邦之民。乃有以刻文來告者。某甚恨知之不蚤也。謹命幙僚。恭伸禱請。伏惟慈仁。亟彰嘉應。使膏澤隨霈。嘉穀獲全。則某所以答靈休而侈神貺者。其曷敢不虔。敢再拜以請。

南嶽火德星君祝文

比因亢旱。虔致禱祈。恭遇南方火德執法星君。正臨軫宿。下照長沙。臣已卜日。躬修醮謝。冀蒙福佑。潛弭旱災。而臣適有瘡瘍之疾。未敢祇謁高真。謹令儒林郎武安軍節度推官趙希憲。先詣殿庭。代陳忱悃。伏望聖慈。俯賜矜憫。推旱魃於熾張之際。霈甘露於愆亢之餘。俾歲事獲全。民命可續。嘉與閩境王靈共拜更生之恩。謹俟疾平。亟酬忱願。仰祈聖察。

社稷風雨雷神祈雨祝文

天久不雨。良苗將稿。嗷嗷下民。大命近止。肆陳菲薦。力請于神。膏澤沛然。恭俟嘉應。

岳麓湘江祈雨祝文

諸侯之職。當祀山川。岳麓云。靈麓麓嶽。湘江云。湘江洋洋。此土之望。肇新壇壝。亦旣訖工。屬茲亢賜。敬伸禱請。雲興膚

寸澤洽一方。願彰厥靈。以拯民命。

諸廟祝文

在詩有之。早既太甚。蘊隆蟲蟲。又曰。旱魃爲虐。如憐如焚。昔蓋聞之。今乃親見。咎由牧守。民焉何辜。以神之仁。非無意於濟物者。而懇祈屢矣。迄未之應。毋乃天數流行。有非神所得專者乎。采諸衆言。惟碧王之醮。功力最大。已涓良日。祇按沖科。螻蟻之誠。懼難上達。願神哀此下土。亟控請于昊穹。庶幾回眷佑之仁。而膺潤澤之賜。使大田多稼。不至甚損。而生靈之命。尙或可全。所以圖報於神者。其曷敢有已。

祠山忠靖祝文

維王^帝威靈。蓋已受命穹昊。爲百神之宗。其於掇旱乾。致雨澤。非難事也。迎奉以來。幾兩旬浹。嘉應屢口而膏。施尙屯。意者。公庭煩渫之地。非神之所安。是用還于靈祠。就伸禱請。

諸廟祝文

自龍君之來。境內之雨者。屢矣。然潤澤則有之。而霑洽則未也。或謂龍之爲神。動則升霄漢。靜則安江潭。公庭之煩渫。非所樂也。是用還于靈湫。五龍安濟云。靈祠。就伸禱請。今旱勢極矣。蚤稼之傷者。已不可復全。而下田晚稻。苟得一雨。霈然充溢。則尙庶幾中熟之望。龍君亦何靳一噓吸之勞。而不以掇千萬人於溝壑乎。菲薦肅陳。以寓誠意。尙惟歆饗。亟副所期。

洞陽橋 昭潭祝文

問者。早曠爲虐。旣靡神不舉矣。采之衆論。乃白威靈之章灼。莫^{洞陽}昭潭若。顧未嘗致請焉。此某不敏之臆也。

是用誠僚屬以往拜于庭而遣之區區此心蓋已飛馳於靈湫之上矣今旱氣如焚耗斃已極而奔霆走電大霈甘雨在龍君之力爲無難願以一嘯吸之勞而救千萬人溝壑之難非惟斯人蒙澤吏亦與受賜焉圖報之典不敢忘也謹再拜以俟

社稷以下祝文

城隍山川同

聞者將用道家法致禱于紫微太乙之尊念螻蟻之誠未易上達也則有謁于神願爲請命昊穹亟賜之雨越孟秋戊戌陰雲鬱興膏澤密布實維明神陰相之力然早乾既久滲漉未深雖槁苗少蘇而溝塍之水則涸竭猶昔也立秋之期近在旦暮事勢亟矣及今而雨足則早稼之未損者猶可全一或少遲則晚苗之方茂者亦告病矣危機交急莫甚斯時是用不避瀆煩復伸懇請以神之仁必不忍爲賜之不竟也敢踴躍以俟

五處龍王 上封雷池祝文

比繇舛政召致旱災有謁於龍君之靈龍君數不以爲瀆曰是知過而能自儆者也入秋以來屢賜之雨雖早稼或虧而晚苗甚茂儻白露之前更賜一再之雨則歲功畢矣謹命僚屬且謝且祈龍君之仁其尙念之

祭龍壇祝文

比以時澤未浹古之雩祀有所謂象龍致雨可考蓋三代之禮也乃立壇壝將徧象五方之龍而致禱焉自北而東雨已隨之嗚呼其亦可謂靈也已肆命邑長祇謝于神白露之前更祈甘霖迄爲有年則某將

廟而祀之。不敢忘龍君之德也。

諸廟謝雨祝文

比以亢旱。有禱于神。入秋以來。屢霑甘澤。雖蚤稼少損。而晚禾勃興。神之爲賜大矣。不腆菲薦。予以告虔。尙惟終惠。迄遂中熟。

諸廟祈雨祝文

乃者。蚤稼將登。既厄于夏旱矣。今晚苗方盛。而雨復不時。是猶尪羸之人。一疾未癒。而再疾隨之也。嗚呼。此豈明神之所忍邪。甘霖沛然。一洗枯槁。在神特指顧之力。而民免溝壑之憂。再拜以祈。上俟嘉應。

諸廟謝雨祝文

比以嘉穀將登。雨弗時至。用有謁于明神。誠意甫殫。孚答如響。霑然膏澤。高下均霑。神之爲賜盛矣。今距收刈之期。尙隔旬月。惟無暴風無淫雨。則晚稼有十全之功。斯民遂一飽之樂。神其終惠之。幸甚。

佑聖祝文

欽惟佑聖。芘此一方。雨暘之祈。邇應如響。一新殿宇。庸答霖麻。工役方興。不無震動。惟神密相。迄用有成。保安赦祭諸廟祝文

聖皇臨御餘三十年翼翼小心對越無媿茲愆調豫率土驚欽憂奉祭書禱于靈嶽

諸廟云願言降監

格云密佑聖躬即遂清寧以福方夏

起夢筆書堂告土地祝文

某惟此山得名。自江憲公始。先正楊文莊。又嘗讀書于茲。某也不材。敢望前哲。屬以屏居窮巷。思得山林閒曠之地。以爲藏修息遊之所。而僧以是告。捐田數畝。質而爲草堂。揆日之良。肇庀工役。朽材腐瓦。苟以集事。惟神默相。亟臻厥成。謹告。

祭大仙祈雨祝文

嗚呼。噓風靈。噴雨霧。變化倏忽。莫如南臺百丈之山。而普照靈澤。實以帝念典司其間。夫以佛道之尊。仙道之大。固萬靈之所聽命。而巖洞之幽邃。湫淵之深窈。又神龍之所蟠。宜其百數十年。以旱致禱者。莫不猶響之斯答。未嘗有如今日之艱。豈佛與仙之仁。無意於拯此土之厄乎。抑天時之當爾。而天意之未還。嗚呼。昔歲之饑。民病極矣。雖去冬一稔。曾未蘇其痲癢。儻或再歉。則顛連於溝壑。歎呼於山谷。殆將何所不有。豈容一日之少安。然則今茲之豐凶。乃民命存亡之決。而賜雨之淹速。則又豐凶之所關。此某之所以望雲霓而涕泗。瞻原野而辛酸也。吾佛與仙之仁。於此而不亟拯。則是真斯人於度外。而坐視其塗炭。昊穹至仁。必不忍以萬物爲芻狗。吾佛與仙。儻爲斯人而力請。則天意一回。化驕陽而爲霖雨。殆猶反掌之非難。嗚呼。事勢迫矣。民望極矣。吾佛與仙。真之拯。不可不亟矣。是用寫哀誠而嘯懇。敢罄竭其肺腑。與玄雲之鬢鬢。沛大雨之瀾漫。起禾稼之將枯。洗瘡痍而復完。則某將大書深刻于巖石之上。昭聖功之不刊。嗚呼。謹告。

再祭大仙祈雨祝文

嗚呼。旱勢酷矣。三日不雨。則高下之田。蚤晚之稼。皆無遺育矣。方來之禍。將無策以拯。而生民之命。不可

以復續。夫以普照靈澤之仁。寧顧愆然于此。今翠峰龍君之來。衆聖咸集。豈不能力回造化。而爲一方生民之福。敢殫誠以致祈。冀響應之遄速也。謹告。

三廟祝文

某奉祠竊粟。無補秋毫。茲叨誤恩。復臨舊郡。控免弗獲。涓吉問涂。惟神默相此行。俾長幼均安。道路無虞。到郡之日。舉措適宜。利澤及物。前有粗立之效。鄉閭寧謐。災沴不生。後無卻顧之憂。則拜神之賜大矣。不腆酒殽。具將誠意。

武濟廟祝文

昔者。漢室龍興。王實舉百粵之師。佐寬仁之主。滅強暴之敵。措天下于大安。功烈偉矣。廟食閩中。垂二千祀。而護國之忠。庇民之惠。益有加焉。比歲盜起汀樵。一道震駭。盪除兇孽。雖王師致討之力。而默扶陰佑。賴神之賜爲多。駿騎騰山。紺蜂螫賊。靈應彰灼。有不可誣者。某猥以非材。分符舊服。維泉爲郡。實王統臨之下。是用虔脩謁款。控露寸衷。尙惟慈仁。密垂鴻覆。俾封域晏寧。苗害寢息。或有爲民禱請者。當北鄉祠庭而扣懇焉。一念之誠。當蒙昭答。不腆牲醴。維以薦忱。

五龍堂祝文

五龍之祠。於祀典爲最重。某之至也。嘗命官僚分謁。而未克躬拜于庭。屬以霖雨過度。惕然不敢寧。訊之。輒屬謂王神靈變化莫測。所當先禱焉。用敢齊心有請。願王以一嘯吸之間。豁開陽明。屏除陰沴。留此嘉澤。以時施焉。庶幾稗苗獲全。豐歲可望。某與邦人。將戴施於無窮。其曷敢忘報。

洛陽橋祝文

某蒙恩分符。再涖南土。適當凋瘵之極。未知振起之方。唯當誠意正心。克己勵行。拯民如飢溺。遠利如垢汙。期以基年。盡銷愁嘆。儻或有渝斯志。不敢復度此橋。

又

某之始至。嘗有矢言。在官基年。刻勵唯謹。雖煩苛粗省。而惠利未周。回省初心。媿負多矣。叨恩有行。未離本道。苟可以芘吾民者。不敢不力。惟神其終相之。

西峽江祝文

某攜家之鎮。宵濟于江。若時之春。風濤方壯。惟神嚶相。如席之平。不腆醪羞。將此誠意。

蓋竹廟祝文

某叨恩出守。舊郡是臨。道于靈祠。敢陳菲薦。惟王嚶佑。俾征涂之間。災疾弗作。到郡之後。舉措適宜。民俗妥安。舊觀以復。庶無負朝家起廢之意。異時代還。謹當俯僂。以謝靈貺。

南劍州判官廳土地祝文

某少遊幕府。實藉神庥。由此登朝。浸叨華賁。十有六年之間。兩守泉南。皆謁款於神。示不忘本也。不腆牲酒。于以告虔。神其聽之。介以景福。

水口鎮廟祝文

某抵戍泉山。道出祠下。將就舟楫。以達于大義之津。惟神威德。被于遠邇。願垂洪覆。俾順風安流。無有驚

阻則蒙施大矣。不腆牲酒。于以告虔。明威赫然。尙其顧享。

泉州謁先聖祝文

某昔歲守泉。慚無善狀。茲由間散。被命復來。或謂舊政則易。乎。舊民則易治。嗚呼。聖門之教。一曰敬。二曰敬。況以千里提封之廣。萬民宅生之重。而可以易。眡之乎。先儒有謂近世之臨舊鎮者。政聲率不逮前。由其有易心也。矧某之愚。其敢少忽。競競朝夕。若履春冰。庶幾萬一。或免于戾。於皇元聖。尙式教之。

東嶽祝文

某昔者守泉。首末三年。年穀洊登。寇攘寢息。公私少事。遠近晏然。豈某之智力能致是哉。實神大芘斯民。而錫之福也。今復被命此來。惟廉惟仁。惟公惟勤。所以自勉者。不敢不用其至。若乃人力所不及。神其嘿佑之。俾二氣均調。百嘉咸遂。田野安妥。蟻塵不驚。豈惟某之踈拙。獲免厥愆。斯民實被如天之施。

朱文公祠祝文

某不佞。自少讀先生之書。知理之與事。同出一源。而明德者。固新民之本也。二十年間。存更磨節。亦知勉乎此矣。然窮理未精。故應事多舛。明德之功未至。而求民之新得乎。被命重來。益深祇懼。尙思自勉。庶有進焉。

忠孝祠祝文

某昔者試郡。立二公之祠于此。慕而效之。蓋將終身焉。去之某年。而執親喪。不敢忘致哀之誼。入踐近班。兼陪經幄。亦思盡責難之益。忠孝大端。粗知自勉。揆之前修。可魏實多。被命復來。式瞻遺像。高山景行。有

慨于中。酌以一卮。凜然興敬。

蔡忠惠公祝文

惟公兩牧是邦。德政在氏。至今未泯。某實何人。亦叨再至。緬懷遺跡。可效可師。朝夕恪恭。庶幾萬一。

王忠文公祝文

公之守泉。才閱歲爾。而德政在人。有百年之思。間者。祠宇之修。某爲之記。蓋嘗妄論一二矣。茲由間館。再玷守符。緬懷清風。益加敬慕。九原可作。非公誰歸。

附

青詞

(據王胤元重刊詞堂本補)

上元設醮青詞

千里分符。洊任宅生之寄。三元肇序。適當錫福之辰。端一意以致祈。爲羣黎而請命。睠清源之吉壤。本南土之富州。爰自邇年。頓非舊觀。七邑而二爲煨燼。十室而九乏蓋藏。番舶罕來。市廛之失業者衆。舡粟弗繼。軍民之仰糴者艱。矧更旱暵之餘。彌覺歎愁之甚。臣起從祠館。復玷州麾。雖懷及物之深誠。未得裕民之要術。屬臨令節。虔籲高穹。耒耜方興。願霈及時之澤。釐甍將實。冀全率育之功。融風息而閭井奠居。駭浪平而舳艫交集。俾斯人浸有於生意。則微臣均荷於至仁。銷沴致和。端有蘄於造化。奉公履正。當無愧於神明。

丁亥生日設醮青詞

微生多幸。敢忘美地之恩。大造難酬。惟極晨昏之感。肆陳愚悃。冒瀆明威。汎觀六合之間。以及萬殊之衆。人貴乎物。而臣獲爲人。士首乎民。而臣叨爲士。力學者豈能必第。臣則荐玷於科名。從官者鮮或遇。知臣則誤塵於禁近。若臨政之悔尤謹寡。與立朝之本末粗明。罪當重以反輕。身幾危而復免。凡茲僥倖。悉荷曲成。竊自省循。若爲克稱。爰卽始生之旦。僭殫祇謝之忱。方仰戴於至仁。敢妄希於多福。但祈覆露。俾脫災危。得於閑靜之中。究乃聖賢之蘊。子方嚮學。冀性識之日明。婦未生孫。期冲和之早畀。其他志願。久矣監臨。惟益堅平日之心。以敬聽高穹之命。

戊子生日設醮青詞

肅然華髮。已開六秩之期。保此頽齡。正賴九霄之覆。敢據丹悃。祇叩鳴鈞。伏念臣猥以妄庸。居然僥倖。蚤玷兩科之選。已愧非材。晚陪六職之聯。更虞過分。故任職必期盡力。而立朝不敢阿容。謬戾旣多。悔尤難免。幸逃深譴。獲遂苟安。顧頂踵之蒙恩。豈涓埃之能報。將臨誕日。豫葺醮儀。冀露衷忱。懇祈造化。星躔未順。冀厄運之潛銷。年事浸衰。願微軀之長健。教子粗明於忠孝。生孫早協於休祥。仰觀慈仁。密垂廕佑。樂天安土。當恪守於舊聞。尊主芘民。或少酬於晚節。

生日設醮青詞

父之愛子。惟疾疢之是憂。天之愍民。苟籲號而必救。旣拜更生之賜。敢忘造化之恩。伏念臣好善雖勤。省思有愧。賤齒已逾於四十。弱息僅止於一人。實爲命以相依。且應門之是賴。頃緣迤否。幾困沈綿。不勝舐犢之情。尤切傷弓之懼。呼醫餌藥。慮人力之難施。請命祈哀。知天慈之可訴。燔寶薰於清夜。瞻璇極於層

霄百拜投誠。一心控懇。果蒙矜宥。旋遂痊安。茲臨初度之期。仰戴至仁之造。肅陳淨醮。祇控謝忱。臣男某。伏望穹昊垂光。聖真敷佑。堅其脆弱之質。俾克永年。開乃滯蒙之資。俾知向學。不敢妄希於福祿。惟蘄粗保於戶門。其在微臣。實爲至足。誓當父子相勉。惟好事之力行。天日實臨。敢斯言之自畔。

仙遊安奉北斗青詞

緬瞻圖覆。唯璇璣之獨尊。爰肖睟容。卽琳宮而薦事。于以作千古山川之鎮。豈特嚴一方香火之脩。涓良日以奉安。按冲科而募繹。願令合境悉爲富壽之民。敢曰私門獨覲生成之造。

求孫設醮青詞

暮景將臨。日俟生孫之慶。高穹可籲。敢干育物之仁。稽首投誠。鞠躬請命。伏念臣譚庸無取。忝幸獨多。所當勉務於操修。其敢復懷於僥覬。惟念續承之重。每深蘄望之私。幸化工垂溥博之恩。俾子舍有發萌之漸。根莖旣兆。正須雨露之功。坯冶將成。允賴鈞陶之妙。爰卜春元之令序。仍涓天喜之佳辰。肅寶醮以致祈冀。璇霄之嘿佑。獨其災害。收十月之全功。貸以冲和。備五行之正氣。庶傳家之有託。實被德之無窮。願寬僭瀆之誅。俯賜生成之造。

己丑設醮青詞

天威孔邇。居懷祇畏之誠。歲序更端。冀輯和平之福。敢據丹悃。仰瀆皇穹。伏念臣以一介顯蒙之資。荷兩間覆載之德。昔者叨榮而竊寵。敢忘鈞播之至仁。今焉負罪以投閑。亦佩玉成之深意。每洗心而思咎。期進德以脩身。所慮隱微之間。不無差忒。或犯幽冥之譴。弗自覺知。屬履新元。載涓良日。敬露禳除之禱。願

垂貸宥之恩。自微臣犬馬之身。逮闔門螻蟻之聚。各獨災沴。咸迪吉祥。俾當杜門退處之時。而有玩志討論之益。庶幾於道。或竊覩於萬分。誓畢此生。常堅持於一念。

祈雨青詞

大田將稔。忽罹旱暵之災。上帝至仁。忍弃生靈之命。爰共殫於忱悃。冀仰徹於穹旻。瞻茲浦城。僻在閩嶠。山谷多而膏腴之壤狹。陂渠少而灌溉之備疎。里居難甚裕之家。蓋藏有幾。鄰粟無可通之路。轉販尤艱。故於歲事之成虧。尤切民生之利病。粵從季夏。久苦常暘。雖攘膾之具修。顧感通之殊邈。雲方凝而復散。雨欲作而驟休。儻霽霈之澤少稽。將飢饉之虞立至。載念戚休之同體。殆如焚灼之切身。爰卽道宮。敬陳法醮。頭下雷霆之詔。申勅山川之神。三日爲霖。亟救倒垂之厄。百穀皆熟。遂爲大有之年。

仙遊謝雨青詞

歲功在望。俄示罰於常暘。天道好生。旋垂恩而霈澤。憂虞頓解。訢戴何窮。竊念此邦。粵繇季夏。時屬當於三伏。雨弗至者累旬。旣衆心所共隱憂。豈微臣獨能安視。思饑由己。本素志之所存。憂國頭豐。敢閒居而遂替。念旣徧求於羣祀。尤當控請於上穹。爰卽眞宮。敬殫愚悃。荷至神之降格。俾茸霑之屢霑。叢爾寸衷。安有勤天之實。大哉元造。實垂揀物之仁。今蚤稼旣幸復全。而晚苗亦方漫茂。敢因祇謝。併露忱祈。白露將臨。頭時賜滂沱之雨。黃雲彌望。庶迄成豐稔之秋。

祈晴設醮青詞

陰霖過度。方重隱憂。洪覆至仁。遽開霽景。生成莫大。訢幸無窮。維粵故區。實閩壯邑。然瘠土多而膏腴之

壤狹。愿民少而爭鬪之俗蕃。頻年屢登。僅爾帖泰。一穀不熟。遽已咨嗟。況鄰邦紛擾之秋。正羣情惶惑之際。共期一稔。以弭多虞。乃自首冬以來。忽罹淫雨之害。歲功儻失。將立至於凶荒。氓俗易搖。懼或從而騷動。方蠲穀旦。虔籲高旻。俄陰翳之屏除。覩陽明之呈豁。敬陳醴禮。祇控謝忱。仰干上帝之好生。俯宥下民之多辟。雨暘寒燠。俾無失序之愆。臯疾裁兵。潛泯未形之患。獲保生靈之命。悉由造化之功。

生日設醴青詞

我生之辰安在。幸適際於嘉時。帝降之衷有常。懼難全於正性。敬修法醴。虔露微忱。伏念臣蕞爾顛蒙。居然僥倖。歲行在戌。與震位以協和。命宿於辰。有陽明之臨照。凡半生之忝竊。皆大造之埏鎔。材乏寸長。積玷朝廷之寵。咎盈百譎。乃保山林之安。顧在臣已極叨逾。豈外此敢萌希覬。惟靳道蔭。俯逮愚蹤。無疾癘以殃厥躬。無災害以撓其志。優繇問學。俾深究於精微。持養身心。獲漸臻於純一。期無悖聖賢之訓戒。庶不孤天地之生成。是爲罔極之恩。敢控由衷之持。

庚寅保安醴青詞

微生多幸。夙蒙化育之恩。新序載臨。冀錫康寧之福。敢殫忱悃。僭瀆威神。伏念臣本出單寒。早居華顯。雖口年退處。曾罪戾之未銷。然舉室粗安。荷生成之特厚。居每懷於思省。敢妄意於僥踰。屬此新年。旣以寅而易丑。加之大運。將自卯而遷辰。顧災祥未易測知。在愚拙惟深戒懼。爰肅陳於淨醴。用祇籲於皇穹。願垂矜憐。拯濟之仁。俾免艱險屯危之厄。儻一宗百口之衆。俱保聚廬之安。凡勺水粒米之甘。無非造物之賜。當勉修於寸善。期仰荅於三靈。

立春日仙遊安奉玉皇青詞

璇霄有赫。夙蒙徧覆之仁。寶殿肇新。爰舉慶成之禮。併陳忱悃。仰冒穹威。維時神景之祠。翔于嘉定之歲。雖琳宇之規模粗備。寶號名區。而玉虛之館。御未嚴。殊爲闕典。叶衆誠而共建。卽元朔以奉安。一境山川。旣從茲而增重。萬年薌火。將燕及於無窮。言念去冬以來。適有鄰封之警。雖道里頗相悠邈。而里閭未免震驚。日須蕩定之期。共享和平之福。惟好生者上帝之大德。而喜安者下民之至情。願軫鴻慈。密回妙造。俾遠近氛埃之頓息。而生靈壽命之獲全。雞犬之聲相聞。浸底阜康之俗。蟲魚之性各遂。悉陶化育之恩。

生日設醮青詞

年齡向晚。適臨誕育之辰。氣運迭移。正值舊新之會。實深祗懼。輒露忱祈。伏念臣猥以妄庸。居然僥幸。學問未優。而竊科名之寵。材能可取。而汙侍從之班。積有愆尤。畧無稱塞。雖投閑之滋久。願揣分之誠宜。方屏迹以杜門。庶飾躬而補過。茲控籲天之請。敢萌徼福之私。獨虞星曜之照臨。未臻協吉。重慮陰陽之衝激。或至召災。爰祗叩於洪鈞。冀嘿回於厄運。家和身健。併骨肉以俱安。盜息兵銷。與鄉閭而共慶。此惟至願。仰勾曲成大造無疆。夫豈微生之能報。餘年有幾。尙期衆善之力行。

辛卯生日設醮青詞

道與貌。天與形。夙賴甄陶之化。乾稱父。坤稱母。敢忘覆載之恩。爰屬誕辰。敬據忱悃。伏念臣藐然凡陋。奮自孤寒。德薄而竊虛名。材微而叨顯秩。靖言僥倖。每切兢慚。茲虔扣於高靈。敢妄希於多福。世途方梗。願早開寧謐之期。年事浸衰。冀粗獲康疆之吉。教子知承家之學。生孫無乏祀之憂。仰紫極以投誠。斬鴻慈。

而從欲。至仁涵貸。曲全螻蟻之生。晚節保持。益勉駑駘之力。

粵山入宅設醮青詞

地德主靜。懼手犯以罹殃。天道好生。敢虔共而請命。仰斬大造。俯賜曲成。伏念臣曩以舊廬徙于茲土。雖蔽風雨而避寒暑。相適厥居。然奉齊祭以接神明。則無其所。不思量力之義。詎爲庀役之謀。半載于茲。衆工交舉。闕地雖寡。在方隅寧免有妨。閱月既多。於時日豈能俱利。慮觸幽冥之禁。莫逃譴罰之威。載念孤蹤。奮由寒峻。陋哉環堵之室。固已有餘。巍然數仞之堂。豈其當作。悖孔氏求安之訓。違孟軻弗爲之言。嘿自省循。實深愧怍。敬涓良日。祇按真科。踣地有陳。冀至仁之垂宥。聚廬並處。俾永世之無虞。嗣續之生。日蕃。忠孝之傳。弗墜。屋廬幸有。敢同韓愈之誇。車馬可容。誓勉于公之德。

壬辰上元設醮青詞

三元紀節。莫如春孟之先。五福錫民。願被天官之施。輒伸丹悃。僭瀆蒼穹。惟粵山柘水之較。自己丑庚寅之後。始焉鄰警。殃恐及於池魚。繼以歲凶。危殆同於幕燕。仰蒙妙造。俯芘含生。旣大田嘉穀之告登。復近境妖氛之頓熄。豈伊人力。悉出天恩。爰卽琳宮。肅陳寶醮。祇謝曲成之德。更祈徧覆之仁。二炁均調。潛銷旱溢之變。五兵寢息。各安耕鑿之常。蠶麤得以倍收。虎豹爲之遠屏。家給人足。俾獲覩於升平。天施地生。其敢忘於化育。

上元設斗醮禳虎青詞

生靈何辜。重罹猛獸之害。昊穹是愬。願垂洪覆之仁。窩念此邦。比更多故。歲事饑荒之後。雖一稔而未蘇。

鄰氛震擾之餘。幸羣情之少定。豈謂負嵎之暴。至有啗人之凶。老幼驚呼。嗟籲天而莫救。骨骸零落。痛委地之可哀。田野爲之膽寒。樵蘇幾於路絕。懼傷殘而未已。豈禳禱之可稽。仰祈造化之恩。亟拯黎元之命。神功嘿運。遂除南山白額之妖。害氣自銷。不待東海赤刀之祝。

中元仙遊建醮青詞

孟商令序。適當宥罪之期。神景殊庭。實維集福之地。敢憑淨醮。祇達衆誠。伏念臣某猥以塵凡。居然曉陋。霞裾星弁。旣獲玷於道流。琳館瓊臺。復嗣居於法席。惟謹焚脩之職。少酬覆載之仁。屬中元三五夜之臨。環諸里數百人之衆。並齋心而潔慮。冀赦過以除愆。或以士農工商。蘄安生業。或爲祖先親屬。追拔冥途。厥志甚廛。所求尤切。旣難拒卻。謹爲奉行。伏望穹昊垂憐。神明敷佑。俾生者獲五福康寧之祉。而歿者無厄幽沉滯之悲。凡有所祈。各如其願。旱乾極矣。尤爲切近之災。雨澤沛然。□□登之慶。庶安樂土之歡。實戴高真之恩。

謝雨青詞

旱爲災而屢禱。旣沐恩憐。澤甫洽而復愆。益深危懼。敢因祇謝。併控忱祈。臣等昨屬亢陽。數干洪造。旋被沾濡之施。少寬炎赫之憂。早稼雖傷。幸僅存之猶有。晚苗甚茂。尙小稔之可期。方共戴於殊恩。欲恪修於報禮。夫何不雨。忽又兼旬。老稚皇皇。日俟穎金之秀。晨昏切切。停聞炊玉之香。儻所望之復乖。將其生之莫保。流離俶擾。何者無之。危急存亡。孰甚於此。臣等比扣蒼旻之聽。豫陳黃籙之盟。敢於福祿以有求。但欲鄉閭之無禍。願矜誠悃。亟弭亂萌。惟一雨之霈然。則羣情之安矣。若風雹霜蟲之害。冀悉賜於蠲除。諒

天地父母之仁。必不厭其煩瀆。

生日設醮青詞

歲月之運易流。又臨初度。天地之恩難報。恐負宿心。輒殫懇懇之誠。仰干赫赫之監。伏念奮由孤冷。本極凡庸。敢圖大造之矜憐。俾以一生之僥幸。材非可用。迺竊寵之時。優罪有當。誅復蒙恩而苟免。祠館甫還。於故秩。州符遽祈於舊封。嘿自省循。若爲答塞。念昔立朝治郡之日。每以尊主庇民爲心。豈以末塗而忘素守。所願始終而策勵。祇虞衰病之浸陵。莫克有爲。真成自負。肆當誕日。虔告高真。俾臣得衛養之宜。令臣無憂患之撓。筋骸強健。可任國事。以驅馳耳目。聰明能察人情之幽隱。少施薄效。有補明時。奉身而歸。訖全靖退之節。傳家有訓。勉循清白之規。

玉皇三清殿祈雨青詞

伏以旱而望雨。不勝迫切之情。窮則呼天。輒扣穹窿之聽。比以累旬之愆亢。深虞多稼之焦枯。幾遍禱於靈祠。迄未臻於嘉應。今赫炎已極。在高田旣祥。口全儻霑。既少稽。雖平壤亦將可慮。維此億萬人之命。繫在三五日之間。非仰懇於高穹。懼莫回於大造。卽仙山而齋宿。瞻帝極以懇祈。仰冀至仁。俯矜忱悃。或災臨分野。願密賜於轉移。或罪在生靈。句曲垂於赦宥。起龍神而奔走。屏妖魃以退藏。三日以往。爲霖大慰。雲霓之望。八政之首。曰食廣全溝壑之生。

北斗真武殿祈雨青詞

伏以凡民有生。莫切豐年之望。不雨斯極。豫懷艱食之憂。惟上聖之至仁。爲羣元之司命。恭伸禱請。願賜

矜憐需甘露於久曠之餘。全嘉穀於將枯之際。庶獲成於中熟。實仰戴於殊恩。

謝雨青詞

早當七月。苗欲稿以可憂。山起寸雲。雨崇朝而遂徧。獲解倒垂之急。端由兼覆之恩。嗟是窮鄉。夙稱瘠土。三隅斗絕。粟可往而不可來。百室罄垂。歲宜豐而不宜歉。屬夏秋之方接。蔚禾稼之相望。蓋數日以須成。猶調饑而待哺。實穎實粟。共忻樂歲之可期。如悵如焚。豈料亢陽之爲虐。望雲霓而隕涕。睇原野以傷心。用赴愬於高穹。冀興憐於下土。果蒙孚答。屢賜霑濡。式寬旦暮之憂。仰戴乾坤之施。念晚稻收成之尙遠。而秋陽赫烈之可虞。願深軫於至仁。俾時蒙於嘉澤。百里而半九十。庶全末路之危。甫田之取十千。終遂有年之望。

仙遊山設醮青詞

叨恩起廢。俾游牧於清源。歷吉問塗。敢虔祈於紫極。伏念臣昔嘗疆仕。嘗玷專城。粗殫撫字之誠。莫著藩宣之績。邦人亮其疎拙。或至去思。朝家滌其愆尤。復加選任。旣懇辭而弗獲。將竭蹙以有行。脩程渡迫於嚴寒。暮齒更虞於多病。顧惟瑣質。愧乏他長。獨其一意於斯民。時乃平生之素志。兩邑創殘之後。正急拊摩。羣生憔悴之餘。尤須拯救。願夙宵而盡瘁。猶疾痛之在躬。庶息呻吟。少蘇疲瘵。冀天造賜保扶之力。使微軀免災眚之憂。長幼均安。川塗無阻。早達明山之境。以慰瀕海之眈。潔白公勤。誓益勵昔年之操。安平富樂。期漸還故國之風。

泉州入宅設醮青詞

起廢復來。獲撫吏民之舊。授才非稱。惟靳造化之恩。睠此溫陵。昔稱名鎮。內環七邑。生齒寔蕃。外控重溟。風濤難測。禁旅尤嚴於節制。蠻商貴有以招懷。凡御衆牧人之方。與悅近來遠之道。儻非強敏。詎免垂疎。伏念某曩玷專城。時方彊仕。夙宵勉竭。曾微政事之長。始末保全。悉賴神明之力。敢謂十六年之久。荐叨二千石之除。憂患屢更。已迫衰殘之境。瘡痍未復。可嗟窮悴之疇。志雖切於撫摩。力恐難於負荷。仰祈覆燠曲借。生成俾某身無疾疢之憂。家有平康之喜。庶專一意。恩濟羣生。迪以清明。炤幾微而罔失。錫之強健。嬰繁劇以有爲。施爲允愜於物情。惠利亟蘇於民瘼。公勤廉白。誓愈勵於初心。富樂安平。期早還於舊觀。

上元設醮青詞

葦三百六旬之日。適換新春。知四十九年之非。浸驚暮齒。敢殫悃悃。僭瀆威神。伏念臣本以凡姿。加之陋學。荷生成之特屋。慚忝竊之大優。材匪適時。繆享無功之祿。德非足已。更叨過實之名。積有愧於幽明。致自貽於譴責。既投閑而置散。每思微以省愆。屬新律之載更。懼餘災之未弭。爰寓誠於寶醮。用請命於皇穹。仰冀慈仁。俯垂矜赦。獨除殃咎。誕降吉祥。俾身健而家安。庶心寧而志一。杜門屏跡。獲靜處於丘園。教子讀書。共講明於道義。茲爲志願。敢復他求。

春祈紫極宮青詞

春令平分。農功肇始。當舉祈年之禮。況逢閔雨之時。卽太紫之眞宮。脩上清之法醮。匪僅循於故事。實深後於殊恩。蓋今羣忙憔悴之餘。正切百穀豐登之望。非亟被滂沱之澤。何由施播殖之工。仰覬天慈。俯矜

民命載寤載足。不愆東作之期。實好實堅。迄遂西成之慶。

清源洞三清殿設醮青詞

方春告旱。實關終歲之憂。濱海爲州。素乏上腴之壤。矧自冬而至二月。凡不雨者幾數旬。比雖嘉澤之屢敷。猶苦高田之未洽。柰何開霽。又復浹辰。瘠土易乾。加盛陽之輝赫。稗苗欲長。乏積水之涵濡。正當種蒔之時。乃有焦熬之意。猶方孩而失乳。將何道以能生。臣是以疾首痛心。祈恩請命。冀至仁之務惻。回妙造於須臾。三日以往爲霖。俾溥臻於霑足。八政之首曰食。庶可必於豐登。

州治設醮青詞

農功最急。莫如春夏之交。雨澤不時。倍切生靈之望。歷丹衷而控請。冀洪覆之興憐。惟此邦夙號於樂郊。至近歲遽成於凋俗。公私耗竭。上下煎熬。租簿弗登。旬月之儲何有。商舟罕至。斗升之直尙騰。自載忝於州符。每勤求於民瘼。嗟撫摩之無術。獨抱百憂。欲愁歎之少紓。惟蘄一稔。豈虞種殖之際。迺有乾亢之災。高壤未耕。旣成稿白。稗苗方秀。浸覺萎黃。無陂渠可以灌輸。有風日爲之炎爍。比親行於原野。實痛切於肺肝。若爲銷變以召和。但有祈哀而請命。皇矣上帝。仁恩普及於昆蟲。今此下民。生意將危於絲髮。當窮途而亟拯。豈大造之所難。願軫隆慈。嘿回哀眷。霈然甘霖。膏此大田。穡事以時。庶豐穰之可必。牧臣有罪。奚譴罰之敢辭。

設廳謝雨青詞

民以食爲天。莫切豐登之望。守視民如子。居惟疾之憂泣。嘉澤之弗時。而首種之不入。一歲收成之計。將

墮渺茫。萬人饑饉之虞。近在朝夕。臣是以履郊原而震惕。瞻雲漢以悲傷。欲靳紆患於生靈。惟有祈哀於穹昊。被嚴公宇。敷列醮筵。藁笈琅函。正宜揚於清夜。玉漿瓊液。俄飛洒於層霄。甫及兼旬之間。數蒙澍雨之應。大矣曰生之德。揅此垂絕之人。既拜殊恩。敢稽祇謝。願惟瀕海之地。土脉易乾。重以盛夏之時。炎威有赫。願俾梅霖之相續。庶幾穡寶之用成。和氣致祥。不爽陰陽之序。富歲多賴。寢興仁遜之風。

離明殿設醮青詞

煌煌執法之星。威靈有赫。奕奕明離之殿。欽奉素嚴。屬當炎煥之時。敬飾祈禳之典。念茲南服。實曰溫陵。地處盛陽之方。常多燥烈。海有颶風之害。每懼煽揚。欲期比屋之奠居。惟仰高真之敷佑。願垂道蔭。溥及黎元。既庶既安。永熄祝融之警。時暘時雨。併銷旱魃之虞。

雲榭設醮祈雨青詞

農方望歲。幸蚤稼之告登。政有干和。致陰霖之爲沴。洗心思咎。頓首祈恩。伏念臣再忝郡符。屢周月琯。曾微惠利。俾民瘼之昭蘇。獨有愆尤。煩天威之譴告。始則示常暘之罰。今焉召淫雨之災。皆薄德之自貽。豈至仁之所欲。早幾成而復挽。既荷曲全。穀已熟而可收。忍令遽失。願軫生靈之命。俯垂化育之恩。宣陽曜以破昏霾。揚清風而散蒸鬱。錫以兼旬之霽。保其終歲之功。若其獄訟之滋繁。與夫刑罰之乖戾。幽枉之情。豈無未達。歎愁之氣。或有未伸。初非有衆之辜。時乃微臣之臬。恐懼修省。誓殫朝夕之誠。覆載生成。永賴乾坤之造。

雲榭設醮謝晴青詞

曰。雨曰暘。洊拜璇穹之賜。有祈有報。用嚴寶醮之陳。頃值陰霖。懼傷嘉穀。爰卽侵雲之榭。敬修請霽之儀。寶炷初升。虔叩九霄之聽。烏輪有赫。遶騰六合之光。開麗景以彌旬。收全功於一稔。厥惟大幸。敢昧隆恩。更祈覆簾之仁。俯矜凋瘵之俗。五穀熟。民人育。婁錫豐年。百室盈。婦子寧。長爲樂土。

秋賽紫極宮設醮青詞

再命爲州。每深憂於黎庶。一誠望歲。知幾瀆於神明。旱方熾而嘉澤隨。潦未收而晴光煜。敢云薄德。能感人於帝心。獨賴至仁。寔哀矜於民命。錫之一稔。活此羣生。公私之計。少寬覆育之恩。莫大敬陳菲報。併露忱祈。無風雨蟲螟之苗。以全晚節。有黍稷稻粱之慶。迄用康年。

生朝設醮青詞

覆載無私。豈待求而降福。天壽不貳。惟自勉於脩身。屬此始生。敢云妄禱。念荐分於符竹。已浸迫於桑榆。獄訟昔簡。而今繁。非精力莫能劇決。財計昔充。而今匱。非智慮不可斡旋。一日弗勤。則弊易滋。一事弗親。則情易瘳。懼微躬之難強。冀大造之嘿扶。俾常強健而清明。庶克從容而醅酢。矧爲仁由己。而成功則天。臣之此來。豈有他念。凋瘵者望其蘇息。愁歎者欲其歡愉。雖殫朝夕之勞。期還舊觀。匪賴神明之佑。曷遂初心。三農已幸於告登。二氣更斬於不忒。海無駭浪。里絕驚塵。用足而志以成。刑清而人自化。粗收薄效。不徒垂老之重臨。少慰羣情。卽獲奉身而蚤退。

離明殿設醮青詞

視民由己。每慮患於未然。脩祀以時。冀蒙休之有永。惟泉爲郡。在閩最南。炎燠之氣。在四序以常多。震蕩

之風。或連朝而弗息。儻非賴上聖高真之佑。何以免祝融回祿之災。爰卜季商。敬修淨醮。仰祈赫赫之鑒。俯芘林林之垠。比屋相望。各遂和平之樂。聚廬託處。永銷謫出之虞。

黃籙醮青詞

歲獲豐穰。祇戴璇穹之施。禮嚴報謝。敬修寶籙之科。誼至日以陳儀。爲邦人而輯福。伏念臣職叨作牧。志切念民。昨屬莫春。久罹亢旱。嘉種尙難於入土。大田敢覲於有秋。載瞻雲霓。若隕淵谷。蠢蠢黎元之衆。將何以生。皇皇上帝之仁。必非所忍。願霈及時之澤。迄成大有之年。果徇誠求。始猶響答。天地之裕萬物。豈以爲恩。臣子之荐寸忱。亦云寓敬。當黃宮之紀節。卽琳宇以告虔。三日九朝。用道家最盛之典。一封七聚。冀天覆無窮之休。陰陽之敘靡愆。旱溢之苗弗作。天吳效職。護舟楫以安行。回祿戢威。保室廬而聚處。矧鄰疆之相屬。有狡衆之未馴。懼或致於蔓延。句亟臻於綏靖。四境之塵不動。復見大平。百蠻之貨畢徠。重爲富國。臣雖叨易鎮。敢有遐心。閩粵之壤本同。均在十連之域。造化之功無外。願回一道之春。

普度青詞

遭民何辜。橫罹鄰寇之殃。舊郡重臨。思拯冥涂之苦。用伸追祓。各冀超昇。歲在丑寅之間。盜作汀樵之境。承平歲久。旣武備之弗脩。醜類日蕃。致妖氛之浸廣。惟時德化。以及永春。密連竊發之區。旋被侵陵之禍。兵戈匪練。誰知禦賊之方。官吏相先。自作全軀之計。委羣氓於鋒鏑之下。舉二邑爲煨燼之餘。游魂蕩於太空。枯骨暴于曠野。淒風急雨。諒多號噉之悲。厚地重泉。更抱幽沉之歎。念此淪亡之衆。皆膏撫字之人。豈憫惻之亡情。幸歸依之有路。屬修崇於黃籙。敢籲告於紫皇。凡厥同時。暨于諸郡。有隸名於黑簿。悉度

命於朱陵。北都鬼羣。無復久淹之繫。西方淨土。舉爲極樂之游。

甲午仙遊設醮青詞

奉藩弗績。誤蒙九陞之知。賜召使還。猥與六官之選。懼莫酬於主眷。庸祇扣於天慈。伏念臣昨在初元。嘗參近侍。屬值權姦之顯政。惡聞讜直之盡言。一斥七年。始叨牽絃。載更兩鎮。方效撫摩。適公朝盡起於名流。而孤迹亦塵於華貫。控辭靡獲。圖報惟艱。既不敢矯激以近名。亦不敢低徊而徇利。惟厚集精誠。庶幾於感格。而密陳忠益。冀見之施行。上有俾於國家。下有澤於民物。臣之願也。天實臨之。仰句至仁。默垂洪覆。獲清衷之洞照。俾素蘊之盡伸。得時則行。肯負平生之自許。奉身而退。終期晚節之蚤休。

告斗祈雨表

伏爲臣等所居建寧府浦城縣。久闕雨澤。虔伸醮告者。旱而望雨。不勝忱迫之情。窮則呼天。冀徹穹窿之聽。臣某等誠惶誠恐。頓首頓首。乃陞浦城之境。越由季夏以來。甘霖久愆。元陽遂極。協公私而共禱。雖潤澤之屢沾。泉乾而土弗濡。未幾涸竭。日炎而風亦燥。有甚灼焚。既高原下隰之皆枯。將早稼晚苗之俱瘁。望雲霓而蹙額。瞻田野以傷心。痛惟貧窶之毗。甫遭饑饉之厄。幸去冬之一稔。猶瀕死而復蘇。正須保養之功。庶有安全之望。儻重罹於凶歉。必立至於顛隕。靖言何辜。遽至斯極。矧民情自古以難保。且鄉俗在今而易搖。苟生理之或窮。恐禍機之遺作。蠢蠢黎元之命。殆幾絲髮之危。皇皇后帝之仁。忍視塗炭之酷。期嘿回於造化。用哀籲於聖真。恭惟大聖北斗七元尊帝君。斟酌一元。紀綱七政。念此土藹傷之未久。而斯人瘡痍之尙新。申敕羣靈。大敷渥澤。使欲稿之禾復活。而垂成之穀獲登。寔與函生。均蒙再造。臣某等

切循平昔。積有愆尤。顧省己之多慚。甘以身而受罰。若蠢愚之罔識。靳赦宥而勿誅。普推滌蕩之恩。俾道流行之數。賜以樂歲。悉爲全人。臣等祇荷曲成。誓當加勉。神明森列。敢萌自昧之心。貧富相資。深戒不仁之習。臣等無任瞻天仰聖。激切屏營之至。

祈雨醮詞

伏以萬民之天所仰。莫如稽事之艱。六月之雨不時。深懼田功之失。控誠以禱。從欲是求。睠茲百里之區。寔在七閩之首。山崇川駛。粟可去而不可來。民悍俗頑。歲宜豐而不宜歉。昨緣霜隕。有害秋成。一朝而攘奪並興。殆幾撻變。纍載之蓋藏。悉罄僅足。球饑幸禾麥之繼登。與里閭而肯慶。然穀直之騰未減。而民力之困自如。非大有之屢書。豈小康之可冀。迺蘇季夏。驟苦常暘。多稼垂成。猶日望嬰童之長。甘霖弗續。是頓虧乳哺之功。儻拯救之少稽。將危亡之立至。不勝震懼。有甚灼焚。爰率籲於上穹。冀興憐於下土。救羣龍而並起。掃妖魅於方張。大雨時行。願弗愆於月令。烝民乃粒。實共戴於天恩。

仙遊告斗表文

伏以自夏及秋。久被亢陽之虐。維北有斗。實司元氣之權。敢干再瀆之誅。冒控一純之請。臣等誠惶誠恐。頓首頓首。竊以運行之數。歲無常豐。謹告之威。天有定命。所當恭德。其可用陳。曾未越於浹旬。輒游干於霄極。蓋誠有甚切。而勢有至危。念自叨將指以來。嘗數任救荒之責。常平可以振廩。鉅室可以勸分。或請命公朝。有分頒之錢粟。或告糴鄰境。有畢湊之舟車。故雖逢歲之甚艱。尙克拯民於垂死。乃如敝邑。實謂窮塗四事。一無將奚相卹。頻年屢稔。始幸苟安。當去載之告饑。尙宿藏之可仰。茹草齧衣。已弗忍聞。培鎖

劫糧幾莫能遏。豈容今日更值凶年。此微臣極朝夕以隱憂。而壹意幸神明之垂憫。今早稻之存無幾。而晚苗之損亦多。願一再信宿之間。亟蒙大霈。庶十萬生靈之命。猶獲少延。恭望大聖北斗七元尊帝君。嘿運璣衡。潛移氣數。乘立秋處暑之際。敕興雲致雨之神。敷降甘霖。俾成中熟。臣等以憂國願豐之素志。加與民同患之至情。故寧九殞觸雷霆之嚴。冀或萬分回穹昊之聽。救災解厄之惠。苟衆共以獲全。奪祿減算之刑。雖獨當而無憾。臣等無任瞻天仰聖。激切屏營之至。

祈雨醮詞

亢旱爲哉。由下民之多罪。洪恩敷宥。仰上帝之至仁。口念鄉邦。久愆時澤。田疇枯涸。蓋幾千畝之相望。父老驚嗟。謂數十年之未覩。公私交禱。朝夕靡皇。至涖貢於綠章。以冒十於紫極。雲蒸雨降。幸數獲於感通。虹斷風醜。輒復爲之霽止。外里間聞於沾足。近郊仍苦於焦熬。泉乾而井汲甚艱。川竭而機舂俱廢。粟直騰踊。人情憂危。今蚤稼多傷。已非上熟。而晚苗未稿。猶望曲全。用僭瀆以再三。冀興衰於衆庶。赦其必死。予以更生。賜之三日之霖。徧及一同之境。臣等夙緣恐懼。積負愆尤。瀝血書詞。庶徹神明之聽。洗心思咎。敢忘覆載之恩。仰冀穹慈。俯從卑悃。八月後雨。晚禾獲全。次年不歉。

紹定三年庚寅正月天慶觀祈禱弭盜疏文

伏爲汀邵之寇。近犯長平等處。爲大軍迫逐。皆已出境。又聞南劍管下官兵獲捷。生擒賊首。謹詣三清寶殿。虔神懇禱者。歲當登稔。方忻庶俗之安。吏失拊循。忽告隣邦之警。始臨汀而及邵。武延將樂。以迫沙陽。甫更半歲之閒。遍擾數州之境。生靈何罪。多荼毒於干戈。老幼相攜。或顛仆於溝壑。北由間道。遽越近封。

幸王旅之鼎來。致寇兵之潛遁。然而狡謀叵測。虐燄未衰。儻非聖造之密扶。曷底戎功之克□□□宇。哀籲高靈。願垂天地之恩。嘿借神祇之助。俾羽林熊渠之衆。得奮機謀。雖風聲鶴唳之聞。亦皆震響。盡熄鯨鯢之擾。復安鴻鴈之居。耕稼及時。不失厚生之望。里閭安堵。潛消幸變之心。

告斗醮青詞

性均物則。本由帝之降衷。吏失威懷。致陷身而爲賊。始以捕鹽之峻。繼之賞盜之非。汀寇先搖。邵寇從而扇動。劍民既擾。建民亦以震驚。甫逾半載之間。遍蹂數州之境。莽爲丘墟者。殆千餘里。戕於鋒刃者。知幾萬人。流血幾於成川。僵屍至於盈野。雖曰下民之孽。有以致茲。仰惟上帝之心。夫豈忍此。吉涓良日。哀籲至真。願軫慈憐。俯垂芘佑。或生靈有罪。特推蕩宥之息。或分野當災。嘿賜轉移之造。上俾師徒之克捷。下令醜類之服馴。潛銷好亂之風。亟歸嚮化之俗。豈惟南浦。訖免穢塵之驚。坐使全閩。俱還樂土之舊。

黃籙建壇青詞

綠林煽禍。嗟隣境之罹殃。黃籙薦誠。冀高穹之垂憫。屬舉告盟之禮。敢殫哀籲之辭。惟時汀邵之民。本非好亂。況值聖明之世。皆欲安生。祗緣牧御之乖。宜致使披猖而爲患。兩邦相接。半爲煨燼之餘。萬姓何辜。殞於鋒鏑之下。虐燄既延於劍水。妖氛幾及於建陽。泉壤幽沉。痛矣銜冤之鬼。道塗顛踣。傷哉失業之人。深虞厄運之未消。惟賴皇穹之可懇。願嘿回於造化。以普救於生靈。遠而閩部之八州。近則浦城之四境。兵戈頓息。寇虜弗侵。田里相安。耕稼自若。凡彼失身而從賊。亦皆悔過而爲民。本業爭趨。有渤海雞豚之樂。舊汙悉變。無崑岡玉石之焚。

黃籙祈晴青詞

民命獲全。端賴神天之造。醮儀將舉。豫惟陰雨之憂。蓋玄元大教之相傳。維黃籙真科之最重。方肆筵設席。期昭格於神明。儻霏服失容。惟有虧於禮敬。矧招魂而施食。乃除地而爲壇。欲普洽於幽冥。尤深靳於澄霽。仰冀高明之監。俯矜懇切之忱。敕賜谷以騰暉。命雲師而卷袂。晴光炳煥。相望七八日之間。曠典圖成。式慰千萬人之願。

正醮青詞

事機方急。共伸哀籲之誠。造化密移。亟霈更生之澤。既漸臻於寧晏。其敢陳於曲成。恭修黃籙之科。僭瀆蒼旻之聽。臣等昨緣鄰寇橫逞。兵鋒近騷。武陽劍水之間。遠矚臨汝盱江之境。塚慮豺狼之罔測。或伺鄉邦。不量螻蝻之至微。輒干穹昊。深仁憫惻。妙道幹旋。麻沙方燬。而王旅適來。樵城雖陷。而賊徒遄返。諸將奮貔貅之勇。捷奏踵聞。羣盜卽鯨鯢之誅。兇威頓屈。昔慮滔天。燎原之莫制。今猶摧枯拉朽之匪艱。竄緣天意之嘿回。故使人謀之克濟。凡父子弟兄之相保。與比閭族黨之俱安。自頂踵皆出生全。豈毫髮所能報寒。屬當令節。敬踐舊盟。以謝殊恩。以祈終惠。今江淮千里。有未熄之妖氛。而汀贛兩邦。有僅存之餘孽。願垂眷佑。亟遂救寧。俾國勢逾磐石之彊。而民生獲奠枕之樂。歲功告儉。更虞溝壑之流離。兵餉甚絀。日望干戈之寢息。仰冀上帝好生之德。俯救下民阡死之菑。風雨均調。載錫婁豐之慶。乾坤清晏。復見升平之期。

太乙青詞

至仁無外。共瞻東極之慈尊。妙力所加。能拔北艷之幽苦。輒釋忱悃。僭瀆獻聰。言念比年。實爲多難。荆淮川蜀之境。旣警備之未寧。江湖福建之間。忽姦偷之迭起。嗟兇渠之不道。歎醜類以成羣。虐燄薰天。妖氛翳日。莽爲丘墟者。凡數十縣。戕於鋒刃者。知幾萬人。視生靈如草菅。以殺戮爲嬉戲。白骨枯骸之狼藉。魂魄將何所依。孤兒寡婦之噉號。鬼神亦爲之泣。痛沈寃之無告。憂滯魄之難升。敢因黃籙之殊科。爲懇青宮之上聖。願軫大慈大悲之念。亟推普濟普度之恩。望慶雲飛蓋之光。悉超幽暗。被甘露神漿之滴。盡獲清涼。更斬憐兆庶之生。爲潛消百六之厄。災虞盡弭。亟臻平治之期。存歿均安。悉拜涵濡之澤。

十王表

民生可憫。或罹凶橫之災。聖力無邊。能拔沈淪之趣。輒殫忱悃。僭瀆獻聰。言念比年。云云至鬼神亦爲之願推慈念。普及冥塗。凡濫死之亡辜。俾超生而得所。西方佛國。並爲極樂之游。北都鬼神。盡釋久幽之苦。

仙遊山謝斗青詞

蠢蠢萬民之命。實制於天。煌煌七政之樞。獨尊者斗。非以儻邦之俶擾。致茲鄉井之震搖。接彼封疆。深懼池魚之及。紛然道路。殆猶穴蟻之移。念事勢之至危。恐禍機之過作。惟有籲號於穹昊。庶幾全活於生靈。爰卽仙山。肅陳醮席。陰威慘澹。方嗟積雨之霖淫。氛曠豁開。忽覩列星之明概。仰上魁杓之象。燦然霄極之中。一心跂望於垂仁。百拜凌兢而請命。旋獲安平之兆。知蒙覆幬之恩。甫涉期年。果戡大難。日涓首甲。月近上弦。拔壇壝以致虔。爲里閭而祇謝。邊兵未寢。尙勤宵旰之憂。民食正艱。復慮溝隍之厄。冀亟平於多壘。且大獲於有年。朝野無虞。浸還近古之俗。山林雖老。終酬致主之心。

天慶觀釀火青詞

赫赫南方之曜。夙仰威明。林林下土之居。均依覆育。睠此一同之聚。殆逾千室之繁。爰自邇年。實爲多故。鄰氛甚惡。旣更流徙之餘。歲事弗登。重罹饑饉之厄。北間形於兆朕。更竊懼於災虞。方嗟擠壓之氓。未能自活。設有燎原之變。將復奈何。茲誠存亡危急之憂。惟賴造化生全之力。敢控忱於上聖。冀垂憫於下民。潛祛回祿之妖。仍弭畢方之祟。聚廬託處。無謗謔出出之驚。擊壤均歡。有簡簡穰穰之慶。

天慶觀祈禱青詞

患深擠壓。屬當饑饉之餘。誠切籲天。願賜豐穰之慶。嗟惟去歲。驟失有秋。始由積潦之過多。重以嚴霜之早隕。陰沴侵而陽弗兢。旣以奸和。殺氣盛而生不蕃。莫能遂物。茲皆人事之所感。夫豈天心之欲然。越繇春夏以來。艱食彌甚。于今田野之衆。殍死相望。困倉之積旣空。薇蕨之根亦罄。欲極斯人於瀕殆。惟蘄多稼之倍登。爰瀝懇於上穹。冀興哀於下土。當其危急存亡之際。賜以復露生全之恩。二氣適均。無苦雨疾風之害。百嘉獲遂。隨高原下隕之宜。皆旣好而旣堅。且實穎而實粟。豈惟俾赤子之得乳。是將起白骨而成人。天地至仁。庶一誠之能動。里閭相勉。惟衆善之力行。是歲大稔。

仙遊設醮青詞

八月十二日常山寇破江山。道
近鄉邑。九月十一日設醮。

伏以足食安居。實民生之至願。弭災銷患。豈人力之可能。借于造化之仁。庶保黔黎之命。睠言敵境。爰自比年。始則虞鄰警之侵。旋復被歲凶之厄。迄遂安恬之幸。悉由覆幬之恩。今大田多稼之告登。正茲刈獲。

而近郡羣兇之方擾。未卽蕩平。冀稽事之獲全。而兵氛之早熄。卽仙山而致禱。瞻帝極以投誠。句穹昊之垂慈。俾鄉閭之蒙福。無風雨霜蟲之害。無寇戎兵火之災。百室充盈。共樂如茨之慶。四封寧晏。不聞橫草之驚。

代男正追薦母青詞

母子恩深。劬勞莫報。死生路隔。哀慕難窮。敢竭至情。僭于洪造。伏念臣母楊氏。頃緣嬰疾。遽致沒身。享年僅及於三旬。抱恨遂成於千古。靈魂炯炯。固自不亡。長路茫茫。果將焉往。惟清夢或窺其彷彿。而私心恐墮於幽沈。痛念平生。實鍾善性。救人之急。則雖傾囊以弗辭。遇姑之疾。則不解衣而親侍。精勤以繇內典。齊潔以奉高真。蓋出至誠。匪由外飾。惟天地以好生育物爲德。惟聖賢有赦過宥罪之言。是用敬據危迫之衷。冀動高明之鑒。俾臣母楊氏。早憑善果。獲遂超昇。願雖駒犢之至愚。永佩乾坤之大賜。

代祈嗣青詞

伏以休戚相關。莫如伉儷之義。安平是望。敢干覆育之仁。伏念臣妻室某。幸出忠勳之門。粗閑閨壺之則。然氣形稟受。本孱弱以弗強。而運數推移。復災虞之或值。旣連歲妊娠之屢失。且平時疾苦之居多。匪虔叩於聖真。懼難回於譴咎。屬季春之誕日。卽神景之名山。肅按冲科。用伸忱禱。仰覬穹窿之大造。俯矜么麼之微生。銷三災九厄於未萌。永獲康寧之祉。賦一氣五行之至正。早鍾誕毓之祥。俾慈父適意於抱孫。而愚臣顯精於嚮學。豈獨闔門之被賜。實惟永世之蒙休。誓堅忠孝之誠。毋負生成之德。

己丑外舅生日設醮青詞

將耆而耄。倏臨八秩之期。既壽且康。冀錫九疇之福。逃瞻層漢。虔露寸忱。伏念臣蕞爾微生。居然多幸。決科甚晚。名早脫於銓曹。入仕數奇。官亦叨於元士。年浸高而免支離之苦。祿雖薄而無寒餒之虞。糟糠之老。獲借椿桂之榮。相踵凡茲僥倖。皆非始望所期。揆厥本元。悉出大生之賜。屬當初度。祇按真科。顧上天加厚於微臣。不勝至足。在今日有求於造物。敢復無厭。惟祈北極之至仁。俯照西崦之末景。獨其舊疾。衍厥壽祺。子舍掀騰。各遂榮親之願。孫枝孕毓。益綿繼世之祥。誓畢餘齡。勉修正道。

庚寅外舅設醮青詞

老將至而耄違。常切寅威之念。天雖高而聽下。願垂覆幬之仁。僭以悃忱。形于奏請。伏念臣迂愚何取。忝竊實多。每當誕育之期。載念穹窿之造。養生甚拙。已逾古來稀有之年。從宦雖艱。粗享人間無事之樂。輒陳菲薦。以謝高靈。屬自仲春以來。適有鄰邦之警。亟攜家而遠避。致曠禮之弗脩。幸王旅之沓來。俾寇徒之少戢。修塗于後。迄逃風露之侵。故里來歸。不改山川之觀。拊摩卉木。瞻顧棟楹。昔惟捐棄之是虞。今乃存全之如舊。皆自天而錫佑。願何地以醊息。敬涓荐七之辰。恪興純一之念。萃霞裾之清侶。按雲笈之冲科。敢曰禱祈。更希無妄之福。但期赦宥。獲弭未形之災。盜早息於潢池。民相安於田里。俾闔門百口之衆。永保聚廬之居。凡勺水粒米之甘。無非造物之賜。

外舅生日設醮青詞

父生母鞠。難酬罔極之恩。日往月來。永感賤生之旦。非假演冲科之妙教。何以寓追遠之寸心。謹竭丹誠。肅陳清醮。伏念臣晚叨末第。幸脫選坑。宰邑黃巖。臯愆叢積。分司列院。斥罷不容。摧頽三黜之餘。閑散十

其之久。雖自譏言之。萋菲實由己德之輕浮。幸皇天開改過之門。而列聖垂遷善之訓。臣敢不省愆責己。滌慮洗心。赦其言行之悔。尤原以取舍之差。失桑榆晚景。期體道以康強。桃李春風。保餘生之清逸。

辛卯外舅設醮青詞

伏以無德而壽。倏開九秩之期。不勞而官。將冒三階之寵。顧臣庸昧。奮跡單微。早學古人。妄意寸功之及。物晚叨朝籍。止斬一命之榮親。雖中歲之險艱。而未塗之僥倖。迨衣冠之已挂。乃綸綍之屢頒。論議名官。行廟漢庭之千口。子男錫號。猥聯周爵之諸侯。雖朱轡畫鹿之莫醜。而紫綬垂魚之亦寵。凡茲命數。俱非始望之敢期。況是年齡。遠過古來之稀有。自揆瘞口之質。曷勝覆育之恩。爰卽誕辰。謹修法醮。但知敬謝。何敢多求。視聽俱全。願保微軀之健。子孫浸盛。更全暮齒之榮。

庚寅代蔡宰設斗醮祈晴青詞

蚤稻大成。迺逢霖雨。積氛小解。未快全晴。控百里之危。瀆七元之聰。聽伏念臣濫膺煩劇。實愧眇縣。或政刑之頗偏。致陰陽之乖戾。儻茲歲不登於一稔。則斯民益重於百憂。欲祈天意之回。更藉斗真之力。敷誠玉笈。歸命璇璣。伏願飈馭博臨。帝車下格。洗出虞淵之燄日。盡掃陰霾。陶爲柘水之豐年。少蘇民望。

代楊和甫作賽醮詞

伏以有室有家。未免妻孥之累。載生載育。實依造化之仁。既獲遂於全安。詎敢忘於大賜。敬陳淨醮。祇控微誠。伏念臣猥以塵凡。夙叨蔭佑。頃緣荆布之賤。乳蓐有期。重以羔豚之微。疾疢爲苦。輒披丹悃。虔叩蒼旻。顧私情仰瀆於高真。蓋嬰譴罰。而洪覆靡遺於小物。曲借生成。免身既幸於無虞。勿藥入臻於有喜。屬

春物萌芽之始。正化工發育之時。爰擇剛辰。肅迎眞馭。以謝曲成之造。以祈滋至之休。惟雙親耆艾之齡。各登七秩。而百世繼承之託。僅有一人。仰賴慈仁。俯垂矜憫。益介壽康之祚。更膺蕃衍之祥。臣敢不思滌愆。尤恪修志行。終身自勉。期爲善人。君子之歸。方寸不欺。庶答皇天后土之賜。

代周道珍黃籙醮普說

竊惟道家之法。以清淨無爲爲本。修齋設醮。特教中之一事耳。然自漢以來。傳習至今。不可廢者。以其用意在於揀度生靈。蠲除災厄。而開人悔過自新之路故也。世之闢道教者。或謂上帝至尊。惟國家可以郊祀。而以臣庶行之。則幾於僭。或謂禍福有命。不可以求而致。不可以倖而免。今之齋醮。其名曰穰災集福。是福可求。而禍可免也。則幾於妄。此皆儒者正大之論。安得而非之。然非國家不可以祀天者。禮之正也。若臣庶之微。精誠迫切。有動於中。則往往籲天地。扣神明。以自救。故曰。人窮則呼天。又曰。惡人齋戒沐浴。則可以祀上帝。道家醮法。特以伸臣庶哀籲之誠。而非郊祀之比也。然既有禱有穰。則必須章奏。而後達。必藉科儀。而後行。故自漢至今。其法益詳。其禮益備。然惟臣子爲君父。官府爲民庶。士夫爲鄉黨。以公請。而不以私求者。則其應如響。若僥倖以求福。矯倭以□□。出於私求。而不以公請者。則亦神明之所不聽。道家之所不許也。由是觀之。道家齋醮之法。安得謂之僭。且妄哉。夫弭裁兵。遠臯疾。寧風旱。祈豐年。具載於周禮之書。有國遵行。未之或廢。況於盜賊甲兵之釁。驟發於鄰壤。如燎原之火。有蔓延之勢。當是時也。非籲天地。扣神明。何以弭災於未萌。銷患於冥冥乎。是以里居官某官等。以紹定二年十月二十七日。相率有祈於道宮。且許修設黃籙大齋醮一會。爲一方生靈請命于昊穹。蓋里居爲鄉黨。邑宰爲民庶。其請

以公而不以私。故自時厥後。王師大集。捷奏日聞。兇渠束手。以就擒。餘黨望風而遁散。儻非天地好生之仁。神明助順之意。安得數月之間。其效遽至此哉。今黃籙大齋。官道衆莫不咸集。道珍不材。誤蒙推擇。使主醮事。法當演法。不敢支離曼衍。以煩衆聽。獨以儒道二教。其說略同。僭陳其一。二蓋詩有之。上帝臨女。無貳爾心。又曰。皇矣上帝。臨下有赫。又曰。神之格思。不可度思。矧可射思。禮記亦云。洋洋乎如在其上。如在其左右。凡此皆言上帝。神明近與人接。不可斯須之不敬。不可一念之不誠也。道家則又推言居處宮殿之名。冠冕車服侍衛威儀之列。又謂衆真百靈皆有形象。其爲宮觀則擬而效之。至於醮事之脩。俯伏拜跪。儼然如風馬雲車之來下。雖其說似與儒者異。然其爲教。不過欲啓人肅敬之心。使見者凜然知天地神祇之臨其上。則邪意妄想自然消弭。善端正念自然感發。亦豈爲小補哉。今者寶醮將陳。伏願齋官道衆。凡預此會者。各體前聖垂戒之言。與道家設教之指。清淨其身心。端一其志慮。毋謂高遠爲可欺。毋謂杳冥爲可忽。夫古人之於祭祀。必三日齋。七日戒者。蓋非誠敬之極。不可以交於神明。所謂戒者。肅然警懼之謂也。所謂齋者。湛然純一之謂也。故易曰。齋戒以神明其德。而宗元吳先生著元綱論。亦曰。非齋戒則真不應。今日但以不飲酒。不茹葷爲齋戒。而不知齋戒之義。非止於此。方其散齋七日。則肅然警懼。猶履薄臨深之可畏。及致齋三日。則湛然純一心。如止水。寂然不動。無思無爲。如是而後爲精誠之極。神之聽之。介爾景福。庶乎其可必矣。不然。雖修飾於禮文之末。而不致謹於心術之微。欲冀神祇之格。福應之臻。則非道珍之所敢知也。若夫星弁霞裾。號稱方士。尤當清淨以對越。內而存念。無一毫之雜。外而行禮。無跬步之差。表裏渾然。終始如一。庶幾無負吾祖師之教。而免於幽冥之罰。此道珍與衆所宜共勉者。

也。不然則三官有罰。九府有刑。凜如斧鉞。甘心背違。自取誅譴。道珍竊懼焉。事大體嚴。輒敢縷瀆。伏惟孚察。

西山先生真文忠公文集卷五十

祝文

諸先賢祝文

某昨叨守符。慚無善狀。茲由間館。被命復來。惟公德愛在民。如古循吏。緬懷遺範。可效可師。朝夕恪恭。庶幾萬一。

韓忠獻。

改云

惟公以有宋元臣。實生此土。

趙丞相。

改云

惟公以中興元臣。實生此土。

游御史。

改云

惟公道盛德尊。嘗居元幘。

社神祝文

惟神五行之主。百物所生。邦之羣祀。莫此爲重。維春之戊。祗薦吉蠲。歲稔民安。緊神是賴。謹以后土勾龍配。

稷神祝文

惟神實生百穀。育我羣黎。爰以仲春。恪修常祀。田功方舉。土脈夫膏。澤洽歲豐。願垂嘉應。謹以后稷氏配。后土勾龍氏。

惟神平易九州。功垂萬古。其在郡國。典祀有常。敬共以陳。豈云故事。併祈靈貺。膏潤下民。
后稷氏

惟神播種百穀。粒我烝民。配天之功。振古無匹。恪共修祀。敢曰故常。俾歲大豐。于神是望。

北山祝文

按祭法。凡山林川澤。能興雲雨者。謂之神。有崇北山。實應斯典。某昔叨假守。凡有禱請。未嘗不先焉。曰。雨曰。暘。殆猶響答。今自首春以來。雨不時若者。幾四旬浹矣。田事方興。而膏潤未洽。某日夜念此。如惓如焚。惟神屹然尊雄。爲一州之鎮。歎雲泄霧。噓吸雷雨。直反掌間耳。是用修舉舊典。以有謁于神。願矜其誠。亟賜嘉澤。使耕稼以時。而豐穰可望。豈獨邦人。道溝壑之厄。某亦與被丘山之恩。謹告。

祠山祝文

昔某之在江左也。值王誕彌之日。必致敬焉。今者。再守溫陵。祇事之初。蓋嘗遣官代謁于祠下矣。而未果躬造也。仲春上弦。時維陽中。毓聖降神。實在此日。庭訟方殷。展謁未皇。敬以瓣香。肅將誠意。農方望雨。王其念之。俾清明之前。膏澤霑洽。于耜舉趾。得以及時。某當涓日以拜王之賜。其敢不虔。謹告。

春祈諸廟祝文

古者。祈報之禮。社稷而已。後世徧及於山川百神之祠。蓋有幼于民。固不容略也。惟神廟食茲土。亦既有年。方春致祈。專爲農事。甲申之夕。雷雨作解。固足慰三農之望矣。自今以往。曰雨曰暘。必以其時。然後豐穰之慶可卜。惟神其幸。惠之不腆。醪羞具將。誠意。

社稷神祝文

古者諸侯之祭。惟社稷而已。蓋稷非土無以生。民非稷無以農。重社稷所以重民。某叨恩來守。禮當祇謁。其敢弗恪。尙惟嚶相。俾大有年。

風師

某入郡之初。嘗謁于社稷矣。而未知風師之有壇也。立春之後。方修祀事。而國有郵典。不及躬陳盥獻。而以官僚代之。每靡然不自安也。謹涓穀旦。按視壇壝。且庀工徒。稍加繕修。惟神當此春和。扇溫厚之仁。以成生育之化。吉蠲之報。其敢弗虔。謹告。

雨師

某入郡之初。嘗謁于社稷矣。而未知雨師之有壇也。茲涓穀旦。躬修按視之禮。且命僚屬。稍加繕治。惟今農事方興。而嘉澤未應。某竊懼焉。願神賜以霖沍。繼以優渥。且霑足焉。俾歲大豐。而民有生意。則吉蠲之報。其敢弗虔。謹告。

雷師

某入郡之初。嘗謁于社稷矣。而未知雷師之有壇也。茲涓穀旦。躬修按視之禮。且命僚屬。稍加繕治。惟今啓蟄既久。而霆聲未發。某竊懼焉。惟神當此大壯之月。誕推作解之仁。俾百果草木。無不奮張。而泉源之竇。流通衍溢。耕稼以時。迄成豐歲。則吉蠲之報。其敢弗虔。謹告。

聖妃宮祝文

某猥以非材。再守茲土。實惟神芘是依。今者凶狡之徒。方舟南下。所至剽殺。重爲民旅之害。某旣調兵以逐捕矣。於惟聖靈。丕赫振耀。凡航海之人。仰恃以爲司命。是用祇遣官僚。敬伸忱禱。昔者戊寅之役。蓋嘗賴神以有濟。今舟師追賊。行且相及。正仰資聖力之時。惟神繫之維之。使不得遁。王師大捷。一網弗遺。鯨波晏清。如行枕席之上。皆神之惠也。某之報謝。其敢弗虔。謹告。

海神通遠王靈著王祝文

大海之神。比者溫明之寇。來自北洋。所至剽奪。重爲民旅之害。舟師致討。稍挫其鋒。而餘孽尙蕃也。儻弗卽撲除。則其縱橫海道。未有窮已。某旣大集官民之兵。俾往迹捕。然鯨波浩渺。實爲危道。非神力助順。豈能必濟。是用一誠遙祝。且委官僚。致少牢之薦。以乞靈于大神。伏惟擠狂寇於立敗之途。導王師以必勝之機。使一網盡獲。庶幾萬舶安行。羣生嘉賴。某之所以圖報於神者。其敢弗虔。

通遠王靈著王

但改委官僚一句云。且委邑令。致禱于祠下。伏惟云云。

社神稷神 后土勾龍氏 后稷氏 風雨師 雷神祝文

社稷穀雨之雨。閱日幾何。高田已乾。良苗將瘁。是用震懼。奔告于神。瀕海之邦。土脈剛燥。一雨十日。霧然溢流。滲之漉之。庶克有濟。造化之妙。咄嗟可能。神其哀恫。是拯是救。謹告。

諸廟祝文

田之甚畏者。莫如旱。而旱之可畏者。尤莫如春。蓋播殖之功。於是乎始。雨不以時。則種不得入。豈非甚可

長者乎。泉爲瀕海之邦。厥土剛燥。五日不雨。則高田告病。十日不雨。則雖膏腴之壤。亦索然矣。今自穀雨。以至于今。霽色彌旬。田之告旱。宜也。某濫尸郡綬。無善政以和陰陽。致此災沴。然罪在守而不在民。守誠有罪。不敢辭罰。若春種弗入。一歲之功。於是乎已。生靈之命。將委溝壑。是豈明神之所忍哉。吁嗟以祈。恭俟嘉應。謹告。

惠安縣管下聖妃宮祈雨祝文

乃者。穀雨以來。嘉澤弗繼。某旣徧祈郡望矣。雨意屢作。而未卽霑然。惠邑之士。有言龍官之山。聖妃之祠。靈響甚著。鄉人父老。方奉九座真如之像。就致禱焉。以郡守閔雨之誠。儻致瓣香。爲民有請。無不獲者。是用控露忱辭。遙伸懇款。且委邑尉。代謁于祠下。夫以聖妃之神靈。濟而以佛菩薩之慈悲。其視生靈之急。必將如拯焚溺。願不惜噓吸之力。使一雨十日。高原下隰。無不被優渥之施。闔郡七邑。俱爲豐年。則某之所以圖報者。其曷敢懈。謹告。

北山神祝文

聞者庚申。以閔雨有祈于神。繼是日登北塘之樓。望名山而控懇焉。荷神之慈。賜答如響。乙丑之脯。霑然而洽。平疇賴以滋溢。良苗爲之奮興。然謂之霑洽。則未也。是用再詣半山。稽首致祈。願先小滿。而潤澤豐。不待芒種。而播莖畢。庶哉一稔可期。而民免流莩。戴神之德。其敢弭忘。謹告。

惠安縣龍宮山聖妃祠等再祈雨祝文

某間者。以閔雨修祠。遣邑尉代禱祠下。而某拜于庭。以送之。鄉之士有馳報者。謂祝祠甫至。而甘淫隨霑。

不疾而速。有如此者。某不勝興敬。維瀕海之邦。厥壤剛燥。比雖得雨。而風日炎燦。潤澤易竭。種莖猶艱。一或失時。後雖甘霖相續。亦無及於事矣。十萬生靈之命。安危存亡。決於朝夕。豈細故哉。是用命邑宰。敬致菲儀。就屬鄉士。再伸忱禱。伏惟英烈之神靈。正覺之慈悲。實亟圖之一雨十日。俾土之瘠者肥。而苗之萎者茂。環地千里。俱爲豐年。則某之所以謝靈貺者。其敢或後。謹告。

東順正 西明烈 明德王祝文

城隍之有神。州郡之有守。幽顯雖不同。其食於民。則一也。夫既食民之食。則當憂民之憂。此某於今茲之旱。所以惶懼忱迫。而有求於神也。守之憂民如此。神之憂民。其可已乎。然守能憂之。而不能救之。能憂而又能救者。神也。今旱勢極矣。神於是焉而不救。則苗將枯槁以死。民既乏食。必將飢餓流離以死。神其忍之乎。夫人與天。未能無間者也。某之愚。猶欲籲天以掇之神。與天本無間。神爲有請于天。而賜之雨。顧不甚易乎。以神之靈之仁。必能哀恫斯民。而思所以掇之者。用敢頓首以請。謹告。

龍湖祝文

龍湖之神。迺者季春以來。雨弗時若。幾於靡神不舉矣。雖蒙響答。纔數刻而止。田疇之槁。猶自若也。謹按圖志。晉邑之南。龍湖在焉。淵渟瑩徹。周數十里。蓋有神物宅乎其中。湖上有祠。靈應夙著。某以城鎗之守。弗克躬造。而命邑尉。往致祈焉。謹拜于庭。遙致忱悃。伏願油然而雲興。霈然而雨注。以震耀龍君之威靈。俾歲有秋。而人弗告病。則某之所以圖報者。其曷敢忘。謹告。

龍潭

龍潭之神。同前謹按圖志常逮之里龍潭在焉赤虬之異著自疇昔某以城鎗之守。餘同前

朋山廟祝文

朋山威寧王。同前謹按圖志朋山清源實爲此土之望天降時雨則雲氣必退於二山之顛屬茲旱暵宜控忱請某以城鎗之守弗克躬造而命邑官往焉謹拜于庭遙致悃悃伏願油然而雲興霈然而雨注以彰爾神之威靈俾歲有秋而人弗告病哉某之所以圖報者其曷敢忘謹告

紫帽山

紫帽山威靈顯應王。同前謹按圖志紫帽之山實爲此邦之望而神食其地靈應夙聞屬茲旱暵宜控忱請某以城鎗之守。同前

飛陽廟

飛陽廟顯應王。同前謹按圖志飛陽之廟靈響夙聞屬茲旱暵宜控忱請某以城鎗之守。同前

同安縣昭應廟祝文

勅封善澤侯。善濟侯。善貺侯。善利侯。善惠侯。善祐侯。迺者季春以來雨弗時若幾於靡神不舉謹按圖志昭應之廟神龍宅焉洞穴深沉杳不可測昔者命書之始至也乘雲擎空衆共覩焉屬茲旱暵宜控忱請某以城鎗之守。同前伏願油然而雲興霈然而雨注以彰我龍君之神靈俾歲有秋而人弗告病則某之所以圖報者其曷敢忘謹告

南峯潭祝文

南峯龍潭之神。同前 謹按圖志南峯有潭神龍宅焉昔在淳熙有令嘗禱雨于是隨獲甘霖靈響著聞屬茲早曠宜控忱請某以城鑰之守。同上 伏願油然而雲興霈然而雨注以將我龍君之神靈俾歲有秋而人弗告病則某之所以圖報者其曷敢忘謹告

龍潭祠之神

同前 謹按圖志佛嶺有祠下瞰龍潭靈應彰灼屬茲早曠宜控忱請某以城鑰之守。同前 伏願油然而雲興霈然而雨注以震耀爾神之威靈俾歲有秋。同前

石鼓神祠

石鼓神之祠。同前 謹按圖志石鼓之祠靈應彰灼屬茲早曠宜控忱請某以城鑰之守。同前

白馬仙祠

白馬仙之祠。同前 謹按圖志白馬之祠靈應彰灼屬茲早曠宜控忱請某以城鑰之守。同前

古潭五龍廟

古潭五龍廟之神。同前 謹按圖志古潭之側故有神祠實曰五龍靈應彰灼屬茲早曠宜控忱請某以城鑰之守。同前 謹按圖志古潭之側故有神祠實曰五龍靈應彰灼屬茲早曠宜控忱請某以城鑰之守。同前

龍湖廟

龍湖廟之神。同前 謹按圖志麗碧之山龍湖在焉白雲覆顛則雨立至屬茲早曠宜控忱請某以城鑰之守。同前

謹按圖志麗碧之山龍湖在焉白雲覆顛則雨立至屬茲早曠宜控忱請某以城鑰之守。同前

佐溪潭

佐溪潭之神。同前謹按圖志。佐溪之潭。石寶窈深。神龍攸宅。屬茲旱暵。宜控忱請。某以城鎗之守。同前

福遠廟祝文

福遠廟諸位龍王。乃季春以來。雨不時若。幾於靡神弗舉矣。而旱氣彌烈。竊意廟貌之靈。有當躬禱而未及者矣。考按圖志。惟神之居於方爲東。所主者生於位爲辰。其象爲龍。紹興中。守臣因旱以請。又有變化飛騰之異。某昔在嘉定。亦嘗致禱。而有獲焉。昨者。僅命官僚。而未果親謁。此某之罪也。是用涓日之良。頓首庭下。願廟雖有號。而封爵未崇。願神昭示威靈。隨禱立應。霈然大雨。盡起欲稿之苗。轉凶爲豐。活我黎庶。則某當顯白于朝。袞服命圭。以爲神之報。茲言弗爽。天日實臨。謹告。

祠山祝文

正佑昭顯威德聖烈王。同前考按圖志。惟王聖德神功。被于遠邇。四方郡邑。莫不有祠。而泉之祠尤闕。且麗民之恃王爲命也久矣。間者。僅命官僚。而未克親謁。此某之辜也。是用涓日之良。頓首庭下。惟王哀憫斯民。而亟救之。俾無餓莩流離之厄。則吏與民均荷王之賜。其敢有忘。

廣佑廟祝文

明應威信廣佑福善王。同前惟王嘗守茲土。遺愛在人。雖大振厥靈于樵川。然惓惓此邦。必有不容釋者。

僅命官僚山。餘同祠

北山神

某自仲春之六日。以閔雨有祈于神。信宿之間。賜答如響。及季春以來。懇祈者再。而賜答乃若少緩焉。然所謂當小滿而潤澤豐。未芒種而播藝畢。則亦未嘗不如所禱也。荷神之休。拯此民命。謹再拜以謝。且將相攸吉壤。以麗壇壝之奉焉。惟神益彰厥靈。俾梅雨時至。載優載渥。載沾載足。使高原下隰。無不稔之田。則某之所以敬事神者。其曷敢有已。謹告。

社稷四位 三城隍謝雨祝文

聞者。以早暵有禱于神。越翼日。遂雨。又彌旬而雨大摯。遂告足焉。種藝之事。得以及時。是用俯伏壇壝。以謝神之貺。惟閩之俗。以梅雨多寡。而占歲之豐儉。願神哀矜斯人。而幸賜之。俾芃芃之苗。賴以蔭養。方苞穎粟。迄于有成。神之惠也。民之福也。某之大幸也。其曷敢忘報。謹告。

諸廟謝雨祝文

比以早暵。有禱于神。會未逾旬。雨遂告足。種藝之事。得以及時。是用祇遣掾屬。敬伸謁謝之禮。梅黃而雨。茲惟厥時。願神之仁。錫以終惠。俾大田之稼。迄獲有秋。報事有常。其敢不恪。謹告。

祠山 廣佑王 福遠廟謝雨祝文

聞者。以早暵有禱于王。是夕之雨。霰沐達旦。又彌旬而雨大摯。遂告足焉。下同城隍祝文。

福遠廟改云神之惠也。封爵之請。其敢或渝。

外縣諸廟及龍潭祝文

比以早暵。有禱于神。下同諸廟祝文。內改掾屬作邑僚。

祈風文

惟泉爲州。所恃以足公私之用者。蕃舶也。舶之至。時與不時者。風也。而能使風之從律。而不愆者。神也。是以國有典祀。俾守土之臣。一歲而再禱焉。嗚呼。郡計之殫。至此極矣。民力之耗。亦既甚矣。引領南望。日需其至。以寬倒垂之急者。唯此而矣。神其大彰厥靈。俾波濤晏清。舳艫安行。順風揚颿。一日千里。畢至而無梗焉。是則吏與民之大願也。謹頓首以請。

聖妃祝文

天下之至嶮者。莫如海道。而至不仁者。莫如盜賊。以至不仁之徒。而憑至嶮之地。其爲生靈之害。可勝計哉。某再忝郡符。方將與民相安於無事。而自春徂夏。寇至再焉。前者自北而南。僅能小挫其鋒。今復自南而北。儻不大懲艾之。則方來之患。未有窮已。是用糾合熊虎之旅。俾往殄鯨鯢之羣。惟聖妃神靈烜赫。凡航海之人。賴以爲司命。是用有謁焉。導王師以必勝之機。而擠狂寇於必敗之塗。如前日之所禱者。非聖妃其誰望敢。俯伏以請。謹告。

社稷神風雨雷師壇祈雨祝文

六月之雨。春秋書之于冊。蓋喜之也。以六月之雨爲可喜。則其不雨之可憂。明矣。比自甲寅以來。雨之弗繼者。兼旬于此。芄芄之苗。無以膏潤。其憂顧不大矣乎。旣以籲于天。又將懇于神。而河酌未伸。嘉澤已霈。蓋爲之喜而不寐。明發夙興。敬拜于壇壝之下。爲民而謝。且爲民而禱焉。浙玉炊薺。數日以俟。惟神終此大惠。俾吾民均遂一飽之樂。豈不休哉。謹告。

社稷神風雨雷師城隍諸廟祈晴祝文

春秋之交。雨以時至。此豐年之祥也。然適中則爲美。過度則爲災。矧早稼在田。刈穫方興。而霖淫弗止。豈不妨良農之功。而損嘉穀之實乎。是用祇命官僚。赴愬于神。伏惟賜以兼旬之霽。使畢收成之事。而後錫以嘉澤焉。某之望也。邦人之幸也。敢頓首以請。謹告。

北山神祈晴祝文

昔者。稻方播而雨不時。屢以愬于神。神不以爲瀆。而賜之雨矣。今者。稻方收而雨過度。舍神其誰愬乎。是用冒霖淫而陟嵯峨。爲民有禱焉。惟口口之靈。開闔陰陽。卷舒雲雨。直噓吸間。爾伏惟察其爲民之誠。而卽賜之霽。非惟大田免淪沒之患。而斯民亦道昏墊之虞。荷神之施。豈有涯哉。俯伏以請。謹告。

社稷神風雨雷師城隍諸廟祈晴祝文

迺者。陰霖不止。岌岌乎害稼之憂。賴神之靈。隨禱而霽。是神有大造于斯人也。繼自今。願終其賜焉。訖處暑而晴。入白露而雨。晴不過於亢。雨弗至於淫。則大有之年。指日可待。若時秋報。其敢不虔。謹告。

北山神祈晴祝文

間者。禱霽于神。邇蒙響應。今茲又闕雨矣。捨神其安愬乎。片雲鬱興。霈澤千里。神之所易易者。敢頓首以請。謹告。

秋賽諸廟祝文

歲事告登。民獲一飽。嘿回造化。絜神之功。報祝以時。不敢不恪。尙祈全護。俾成厥終。

慈濟廟

日春以來民鮮疾癘。導蘇去沴。繫神之功。下同

惠安成應寧濟廟祝文

惟神正直聰明。默佑一邑。聖朝嘉獎。申錫贊書。威靈益章。遐邇蒙福。某假守于此。密藉神庥。敢薦菲儀。具昭誠意。

謁姜相公墓祝文

嗚呼。建中貞元之相。垂二十人。而以清名直道。標表百代者。公與陸宣公而已。公諡于泉。陸諡于忠。皆不果召而沒。天豈無意於忠臣乎。何其厄窮至是也。嗟夫。靈均弗遷。瓊辭孰傳。曲江既死。勁節愈偉。是則天之厄公也。乃所以榮公也歟。巍巍姜公。巉巖東峰。峰以姜名。千古並崇。我再來思。而再謁公。酌以一卮。懷哉清風。

倪尚書祠堂安奉祝文

嗚呼。維此桐城。實公桐鄉。民奉嘗之。沒世弗忘。畢方何知。乃煽其毒。曾是仁人。而不遺以數楹之屋。鞠爲廢壤。過者嘸呻。迨其旣復。小大欣欣。蓋可燔者屋。而不可燔者斯民。愛公之心。歷吉安靈。官僚儼列。式瞻德容。共挹馨烈。追惟平生。猥辱深知。而於公心。粗察其微。蓋嘗竊謂其清如水。而澄之不已。其直如矢。而端之不止。昔者范公。以頌溫國。吁嗟惟公。有此二德。德如溫公。而不大施。施之此邦。九牛一毫。棟宇告新。薌火載設。爲民者。如復奉其教條。爲士者。當有以師其風節。我行天下。落落少同。顧獨仰公。屹如山崇。蓋

不惟懷子產之愛。且深慕汲直之忠。舉觴慨然。爲三太息。百歲之後。儻或有知。尙願配秋菊寒泉之食。尙饗。

北山祝文

北山之神。間者仲春之辛巳。以閔雨有禱于神。壬午遂雨。而雷亦發聲。自是之後。連日皆雨。而丁亥之旦。迅雷驟雨。尤極霽霈。辛卯又雨。丙申以至戊戌。如丁亥焉。至是而一犂始足。霽色逾旬。農方跂望。穀雨之旦。又如丙申。嗚呼。非吾北山之靈。大芘茲土。願何以獲茲。敬卜休澣之辰。再拜以謝。繼今有望於神者。非一日神之始終芘民者。亦嘗如一日焉。是則某區區之願也。謹告。

又

詩以龜蒙爲魯邦所瞻。惟時泉山亦此方之龜蒙也。某兩叨假守。每旱溢輒禱于神。無不響答。前後四年。歲皆告豐。是神有功于民。且有造于某也。增墻將新。而某遂去。惜不睹其成。卽日登涂。回瞻巍峩。不忘起敬。出爲雲雨。潤澤千里。俾歲以屢熟。某尙有望焉。

福州謁先聖祝文

惟孔門高第。若由之果。求之藝。聖師固嘗許之以從政矣。而求之所願者。方六七十。知五六十里而已。由以千乘自許。則夫子哂之。蓋地廣則難治也。民衆則難安也。自子路之賢。猶未易勝此。況於一介之未學。而遽叨一道七八州之寄。豈不甚可懼哉。惟修己以敬之一言。乃先聖示人之要指。某也其敢不朝夕恪共。以期無負於大訓。有臨在上。其曷敢渝。

謁先賢堂祝文

惟閩邇在南服。而詩書文物之盛。軼于中州者。以有牧守爲之作興。鄉賢爲之表倡故也。茲堂所祠。爲位十有八。或以符竹。或以枌榆。要皆有功於士類者也。其間經術之淵邃。德行之超卓。名節之巍峨者。尤使人瞻慕而起敬焉。某叨恩來守。緬懷前哲。釋菜訖事。祇謁于庭。高山仰止。庶幾萬一。

濂溪伊川明道三先生祝文

濂溪先生周元公。明道先生程純公。伊川先生程正公。惟三先生之道。實嗣鄒魯不傳之統。凡今學者知尊經術。知慕聖賢。知天理人欲之分。知吾道異端之辨。其功有自來矣。某叨恩來守。敢祇謁于祠庭。高山仰止。凜然興敬。

晦翁先生祝文

晦翁先生朱文公。比歲以來。先生之祠。徧于寓內。某應符所至。必敬謁焉。假守三山。實忝師帥之責。方將推崇先生之道。以興起士風。而采諸衆言。以爲勉齋黃公。續承師訓。以淑其徒。當侑食焉。涓辰奉安。不敢不告。

勉齋祝文

勉齋先生黃公。惟公之在考亭。猶顏曾之在洙泗。發幽闡微。既有補於學者。繼志嗣事。又有功於師門。采諸衆言。奉以侑食。英靈未泯。必樂於斯。

諸廟祝文

恭惟明天子躬攬大柄。誕降詔書。一洗積年貪濁之弊。選用牧守。分洩庶邦。而某不材。首叨親擢。付以全閩。當端平之元。始和之令。肇領厥事。其敢不朝夕兢兢。精白一心。無負選任之意。然正身以率下。節用以愛人。在某所當自勉。若夫時雨暘。弭蓄沴。則惟明神是賴。非不肖所能及焉。是用祇謁于廟廷。控此忱禱。惟神其幸。惠察之。

南臺廟祝文

惟王之功德顯於漢。而祠立於唐。凡閩之人。尸祝而社稷之者也。某昔守泉山。猶展敬廷下。以乞靈於王。況今叨鎮于此。覆護而扶持之。將惟王是賴。用不敢委諸僚屬。而必親拜謁焉。今之所祈於王者。大略有二。旱盜頻年。人匱於食。徠千艘而平市估。時甘雨而兆豐年。此其一也。江右之盜未平。而泉建之師遠戍。戎功早捷。而振旅以歸。此其二也。若夫區區一心。所欲爲鄉鄙之民。興悠長之利者。亦惟王有以相之。使志得以行。而事得以宜。使後之人曰。以閩人爲閩帥。而不孤閩人之望者。某也。是王不獨有大惠於某。而且有大造於閩。豈不休哉。敢再拜以請。

東嶽祝文

古者諸侯祭其境內之山川而已。巍巍岱宗。邈在東夏。而今之郡國。莫不致祠。毋乃與古異乎。蓋其位在東。其德爲仁。所以佐天地之發育者也。覆冒郡生。其功大矣。故雖不在封城。亦得祀焉。閩山有祠。靈響夙著。臣奉詔作牧。敬謁于庭。布宣上恩。臣之責也。若夫時雨暘。弭蓄患。使一道元元。各有生生之樂。則惟帝是賴。非臣所能及也。用敢再拜以請。

炳靈王祝文

惟王佐岱宗以芘方夏。猶六子佐天地以生萬物也。某既朝于帝。因以謁王。願推仁恩。均被一道。則區區之至望焉。

諸處祈晴祝文

維南山之詩有曰。既優既渥。既沾既足。生我百穀。蓋雨之生物也。惟足是求。既足而過多焉。適足以爲物之病。此某之所以危懼。怵迫而有祈於帝^{神王}也。夫苗方穉而窘於寒。麥將實而病於濕。皆至切之憂。願王^神帝^神之仁。以一噓吸之力。拯而救之。開麗象之清明。掃積陰之沈滯。俾穉者以長。而實者以成。某與斯民。戴帝^神王之恩。其何有極。

春祈慈濟廟祝文

惟神之與春祈。自某焉始。今茲再叨假守。思所以爲民蠲除苛癘。匪神疇依。是用以不腆穀蔬。將此誠意。自春徂秋。寒暑風雨。晦明或過其度。則疾癘生焉。惟神哀痼斯民。有以潛弭於未病之先。俾皆躋于仁壽之域。則其有功於生靈大矣。某之所以圖報者。其曷敢忘。

辭先聖祝文

某仰惟先聖嘗言。朞月而已可也。三年有成。夫以神聖功化之妙。猶必遲之三年之久。況某之末學乎。故自蒞事以來。孜孜汲汲。日惟民隱是求。嘗白于朝。願久其任。而上恩錫召。弗容固辭。凡所欲爲。一一有媿初心多矣。然洙泗格言。則佩服惟謹。既不獲盡施以及民。則當恪守以事君。勿欺而犯。其敢不勉。

辭濂溪先生以下祝文

某自少伏讀諸先生之書。亦欲見之行事。三山鄉部也。方朝夕區區。勤求民瘼。如理家事。未能毫髮及人。而以予環去矣。然諸先生所以教人事君者甚備。謹當佩服。不敢弭忘。願畢此身。不渝素節。

焚黃祝文

某月日。某謹以清酌庶羞之奠。并贈告二軸。使弟某昭告于先考某人之墓曰。嗟維先君。無何蚤世。積善之慶。其延後人。肆某不才。兩塵科目。遂玷朝行。歲在己巳。夫子有事於明堂。某以攝太常卿。立樂垂下。越歲壬申。天子有事于南郊。某以攝吏部侍郎。奉匏爵。六年之間。兩遇大慶。既叨膳之賜。又推恩以及其親。於是我之先君。始贈爲承奉郎。再贈爲宣教郎。漏泉之澤。光賁存歿。豈曰小子實能之。蓋我先君種德獲報之明驗也。自頃以來。屢祈郡紱。冀獲一酌墳土。躬展燎黃之儀。既未賜俞。且叨柱史之擢。久稽祭告。晨夕歉然。南望松楸。心始飛旆。謹令某代伸敬于墓下。明靈未泯。尙鑒右之。

又

維嘉定十年。歲次丁丑。三月戊寅朔。二十三日庚子。嗣子具位。謹以清酌庶羞之奠。昭告于先考奉義府君墓前。日者。天子有事于合宮。祭澤之頒。覃及中外。某以將漕陪部。弗獲預駿奔走之列。而湛恩下逮。不以踈迷而獨遺。肆我先君。由通籍而有陞朝之贈。所以發潛德之光。而爲敬忠之勸也。被命南泉。遂有過家上冢之幸。謹以詔黃燎于隧道。惟明不泯。膺受命祉。蓋蕃衍其慶。以庇于後之人。謹告。

又

年月日具位敢昭告于先考二十五朝奉之墓者。歲在戊寅。聖天子有事于明堂。湛恩敷錫。我先考實有朝奉郎之賜。今五載矣。迄今乃始獲燎黃于墓下。併修拜掃之禮焉。惟靈益垂庇佑。使我後人。浸以光顯。則告策之恩。將極其寵榮而後已。追想慈範。不勝愴然。謹以清酌庶羞。恭伸薦享。

家祭祝文

仲夏之祭。以日至禮也。某以趨召之迫。不獲已。先期而舉焉。且因展告。而辭之禮。伏惟尊靈。陰相此行。俾上有益於國。而下不辱其身。則某之幸也。

告先考妣加封祝文

某比者。國有禋祀。覃慶萬方。我先考自郎位。進三等而爲大夫。先妣亦有碩人之命。其品數益崇。而寵光益盛矣。迫於召旨。未克燎黃于墓下。始卽家廟而致告焉。伏惟尊靈。膺此愍冊。益昌厥後。以迓無疆之休。謹告。

崇興祝文

嗣皇帝御極。覃慶多方。我先室由其宜家之名。進令善之號。可謂美矣。惜其早同於艱難。不及生被榮寵。此告命之詞。所以嘆其窮達之不一也。茲叨召擢。入筵從班。告謁來歸。用燎黃于墓下。伏惟祗膺新渥。益佑于後之人。褒封之典。方沓來而未已。敬陳菲奠。少寓厥誠。

附 疏語

(據王胤元重刊詞堂本補)

清源洞謝雨疏

冬者四時之畢。雖不厭於常暘。麥爲五穀之先。又正資於時雨。肆越故常之典。特伸祈懇之誠。仰荷至仁。邇臻嘉應。雲陰條布。旣收潤澤之功。日耀旋開。復免霖淫之害。曲成至此。忻幸何窮。顧當粟冽之期。尙乏嚴凝之氣。雪飛到地。固南土之所稀。露結爲霜。在化工而甚易。敢因祗謝。併控愚衷。儻陰陽無偏勝之愆。則民物有安生之樂。瀆煩是懼。謹罰敢詞。

清源洞祈雨疏

戊寅十一月十日

歲以稔聞。方惟多稼之喜。雨弗時至。又深無麥之憂。蓋當播殖之期。正賴沾濡之澤。今高田欲種。而無水以耕。下田雖種。而無水以溉。戚休所係。愁歎相聞。況夫風高氣燥。則居者用虞。泉竭井枯。則汲者告病。皆民生之甚患。豈守上之敢安。是用奔走乞靈。虔共請命。寸雲觸石。願倏變於陰威。三日爲霖。庶均沾於德施。

安奉真人誥命疏

當州伏爲冲應善利昭靈博濟真人顯膺寵命。加進徽名。謹率官僚。虔神奉安者。仙聖以濟物爲心。初豈靳於褒寵。朝廷惟有功是報。顧何間於幽明。旣大庇於含生。宜進膺於顯號。恭惟真人清虛體道。湛寂凝神。昔游戲人間。以卻疾蠲疴而自任。今翺翔天上。猶禦裁捍患之不忘。瞻此邦人。夙依道蔭。或農或賈。咸獲堵安。曰雨曰暘。殆猶響應。爰徹九重之聽。增崇八字之封。綸告鼎來。輿情咸慶。涓辰安奉。愈增耀於名山。有衆阜康。更永祈於靈貺。

清源洞祈雨疏己卯閏月初一日

麥正刈而欲晴。既荷曲成之造。稻方秧而渴雨。敢輸虔禱之誠。蓋農事所係非輕。而春早最爲可畏。儻少稽於潤澤。將立見於焦枯。不勝危迫之情。願賜生戍之力。霈然甘澤。活此良苗。俾播種之及時。庶豐穰之可望。鞠躬以俟。從欲是期。

清源洞謝雨疏東嶽同閏月初五日

兩辰之間。曰閏。適農事之正殷。三日以往。爲霖。荷化工之邁答。臣職叨作牧。志極念民。屬甘澤之少愆。懼良苗之易槁。戴星而出。甫伸踏地之恭。零雨其濛。亟沐隨車之澤。連朝昏而相續。極高下以均霑。但深扞蹈之私。難報穹窿之施。輒憑淨醮。冀達微忱。所欲又必從之。已拜曲成之造。自今歲其有矣。願斬終惠之仁。

東嶽清源洞祈晴疏

三農之望。有秋。賈云至切。六月而得甘雨。願以爲憂。蓋南邦田事之最先。而閏歲天時之尤蚤。瞻乎疇之綺錯。蔚多稼之雲連。父老相誇。謂積年之未覩。妻帑共喜。幸一飽之可期。儻未息於霑霈。將有妨於刈穫。垂成而毀。茲豈造物者之心。轉戚而忻。特煩彈指頃之力。願賜兼旬之明霽。庶償終歲之勤勞。瀝懇輸誠。鞠躬俟命。

寺觀設醮謝晴青詞疏六月十日

雨以潤物。過乎度則爲蓄。天維子民。哀其窮而必拯。疏云甘霖。本以潤物。過則爲蓄。諸佛切於念民。窮斯

必球比以陰雲之沍。凜乎害稼之憂。奔走有祈。顧瞻如響。劃重雲而見白日。六合清新。弭駭浪而爲安流。百川順聽。仰至仁之易感。戴鴻施以何窮。屬當收穫之期。不厭晴明之久。崇墉斯積。願克保於歲功。擊壤均權。其敢忘於帝力。疏作佛力

寺觀謝晴青詞疏

嘉穀告登。既卜有年之慶。連陰不已。遽爲積潦之苗。不勝朝夕之憂。亟扣乾坤之造。賴神功之密運。俾富景之過開。波漲平疇。昔幾壞於垂秋之頃。雲屯高廩。今獲全於將失之餘。愁嘆頓舒。歡忻相告。用是肅陳淨供。觀云淨祇薦微忱。曰雨曰暘。願益臻於時若。有稷有黍。更期遂於秋成。疏云不勝忱迫之情。亟扣慈悲之造。賴威神之密運。

祈雨疏

治郡無堪。致亢旱悛焚之虐。籲天有請。荷如來矜恤之仁。起羣龍於潛伏之時。摧妖魃於熾張之日。拜恩甚溥。思報何從。惟水陸之名齋。罄幽明而蒙澤。衆生苦惱。猶渴望泉。諸佛慈悲。如雨濯熱。願均此施。普及有情。脫煩冤於沈淪幽滯之中。遍大地作快樂清涼之境。併斬終惠。迄畀豐年。無愆陽。無伏陰。永協冲和之氣。有遺秉。有滯穗。曲全鰥寡之生。

祈晴疏

百穀仰雨。久蒙大造之曲成。九月築場。茲幸舊功之將畢。日覲茨梁之積。迺惟霪潦之憂。言念三農。備嘗耕耨之苦。政須一稔。少寬饑餒之虞。使垂就而復隳。在隆慈其安忍。輒披誠悃。仰冒明威。冀陰翳之過開。

俾陽光之不煥。百里而半九十。獲全永路之艱。莆田之取十千。迄遂有年之喜。

上元祈禳醮疏

歲方更始。仰盛德之主生。職在長人。懼匹夫之失所。輒伸丹悃。仰瀆蒼旻。某猥以迂愚。繆司牧養。幸千里粗安於無事。而三農共慶於有秋。俾吏責之少寬。荷神休之罔極。屬上元之錫福。爲下土以祈恩。爰被公堂。恭陳法醮。冀垂皇鑒。加憫蒼生。幹元化以調雨暘。敷至和而除疾癘。祝融息警。各安棟宇之居。風伯戢威。咸適帆檣之便。勤拳有禱。孚格是期。

東嶽祈雨疏文

伏以溫陵在昔。僉曰樂郊。歷載于茲。浸非舊觀。蓋生齒蕃。而可耕之土狹。故良農寡。而逐末之俗成。政使有秋。尙虞乏食。況下溼之地。甫以澇聞。而高邛之田。今復旱告。儻遂失嘉穀收成之望。將立見細民捐瘠之憂。蚤夜以思。寢食幾廢。仰惟靈嶽。俯庇羣方。願推造化之仁。曲軫生靈之命。興油雲於膚寸。浹膏澤於邇遐。嘉與邦人。共霑德施。

開元寺祈雨疏

伏以嘉穀方華。甘霖未浹。屬茲蒞事之始。尤深艱食之虞。當及是時。蚤爲之計。是用瀝丹誠而有請。冀皇覺之垂慈。憫此邦新罹洪水之苗。而今者復苦驕陽之虐。大需及時之澤。以成登稼之功。一飽有期。民相安於鼓腹。百廢且舉。吏亦得以究心。矢言弗諛。願佛昭鑒。

諸廟疏

某叨綰郡符。蒞事伊始。周視原野。黍稷方華。而其霖愆期。人情狼顧。近雖一雨。而高邛之地。猶有可憂。惟神廟食此邦。同民休戚。願需三日之霖。以遂有秋。則某始得以究心摩撫。維吏與民均沐大賜。再拜以請。神其聽之。

張大帝廟疏

某頃在江東。凡弭菑拯患之事。一惟明神設賴。神亦鑑其微誠。其應如響。謁來此邦。適以旱告。奔走羣祀。僅獲一雨。而高邛之地。猶有可憂。方將設神之位。以致懇祈。乃有以東湖之祠告者。踴躍欣幸。而今而後。得赴愬之所矣。敬持瓣香。俯伏以請。惟誠察其歸仰之素。閱其憂勞之切。丕降膏澤。俾克有年。豈惟不肖之責。藉以少寬。民亦永永事神無怠。

安奉清水疏

伏以維盛夏實司長養。久闕甘霖。與此邦有大因緣。莫如清水。肆迎法馭。來駐梵宮。昔混迹世間。不憚曝身而救旱。今遊神天上。豈難翻手以爲雲。願垂慈閱之仁。亟降滂沱之澤。與情共矚。響應是期。

安奉諸佛疏

伏以服田力穡。誰無望歲之懷。閔雨爲民。尤重承流之責。旣靡神而不舉。捨我佛以嚆依。方伸迎奉之恭。遽沐感通之速。興慈雲於瞬息之頃。莫測我神。需惠澤於枯槁之餘。悉霑法施。然而滲漉之恩。雖廣。旱乾之患已深。更異寬慈。亟終大賜。俾獲有秋之願。敢忘善救之仁。

送諸佛歸山疏

伏以慈悲救物。我佛願心。旱暵爲災。斯民何罪。控忱辭而有請。勞法馭以來臨。一雨霑濡。四野膏沃。幸少慰雲霓之望。其敢稽龍象之留。飛錫浮盂。雖去來之無迹。驅雷叱電。尙浹洽之有期。

東嶽清源洞寺觀祈晴疏

嘉澤以時。實謂豐年之兆。良苗方穗。又虞積潦之傷。忝任撫摩。交深喜懼。矧月逾既望。正潮汐之轟。應儻雨不亟晴。將田疇之冒沒。輒殫誠款。祇扣嶽洞聖靈。寺觀慈仁。昭揭陽烏。遄臻開霽。指麾河伯。毋使沸口迄成。登稔之功。亶荷龐鴻之施。

東嶽疏語

親闈奄弃。悵懿範之莫追。靈襯來歸。卽私庭而暫駐。處大邑浩穰之地。當亢陽乾燥之時。每終夕以深憂。恐融風之易扇。敬穗危懇。仰瀆聖聰。果蒙覆燾之仁。遂免鬱攸之警。迨旣卽安於吉壤。亟圖展謝於殊庭。屬以抱痾。幾成廢禮。惟至明之無外。察恐悃之不恭。寬其逋慢之誅。賜以存全之慶。

告斗卜地疏語

伏以罔極恩深。莫效劬勞之報。送終事重。方求宅兆之安。雖博訪於名山。猶未諧於吉卜。念造化機緘之至妙。豈凡庸心目之可窺。是用瞻斗極以諭誠。瀝肺肝而控請。願垂矜憫。顯發祕藏。山水濼洄。兼備冲和之氣。子孫昌熾。永爲忠孝之家。

南嶽正廟疏文

癸未春初
五潭州

天下之嶽凡五。封守各殊。南方以衡爲宗。威神最盛。矧國家素嚴於尊事。豈臣子可怠於欽承。願惟草芥

之微。繆玷藩垣之重。俶開幕府。方祗畏於簡書。渺望靈宮。未克伸於謁拜。謹憑掾吏。虔奉瓣香。仍省眡於山林。且譏呵於樵牧。輒杼枕懇。冒徹聖聰。載念三湘。獨雉諸鎮。然而土田多瘠。野無盡力之農。旱澇相望。里乏厚儲之室。杼袖空於科率。擾鉏習於鬪爭。臣猥以凡材。驟茲臨長。孜孜訪問。冀利病之獲聞。汲汲拊摩。若恫瘝之在己。顧人力易窮於有限。惟神功獨妙於難名。仰覬深仁。俯矜凋俗。雨暘叶序。俾充詹庾之藏。田里奠居。永息鼓桴之警。庶民生之各遂。亦吏責之少寬。稽首投誠。鞠躬望賜。

天慶觀等處祈晴疏文

春而多雨。本非厭敷之時。職在長民。當軫深長之慮。蓋氣數乘除之可畏。而陰陽偏勝則爲菑。況是良農。日期登麥。至於紅女。尤急條桑。儻積澇之相仍。懼全功之或失。雖有心於憫俗。愧無術以召和。爰遣屬僚。控陳忱悃。冀慈仁之垂憫。俾昏翳之遄開。霽景熙暘。亟改崇朝之觀。甘滋美澤。留爲後日之儲。庶二氣之均調。斯百嘉之蕃庶。控誠以請。從欲是求。

仰山靈濟王生辰疏

伏以聖靈挺出。本太極之同初。世俗相傳。乃誕辰之有紀。雖變化莫窺其妙用。然依歸可驗於衆心。蓋以事親之誠。寓諸獻壽之禮。幽明雖異。愛敬則同。某繆綰州符。密依神庇。循比年之彗。則演大法於真乘。仰冀弘慈。俯垂鑒相。五風十雨。永銷乾溢之虞。三相九嶷。共洽和平之化。

天慶觀等處祈雨疏文

十七日祈
十八日雨

伏以農家占歲。常敢決於分龍。郡守憂民。敢先期而請雨。念此湖湘之凋俗。異乎江澗之樂郊。縱遇豐年。

猶多愁嘆。雖名巨室。類乏蓋藏。苟惟一穀之弗登。立見羣生之告瘁。撫摩是任。休戚寔同。輒豫控於微衷。冀曲垂於大造。寸雲觸石。頓收炎赫之威。三日爲霖。丕降沾濡之澤。迄成一稔。用弭百憂。

天慶觀等處謝雨疏文

伏以節名龍會。實惟望雨之誠。職忝虎符。亟致籲天之請。荷共慈之易感。俾甘霖之隨霑。雖未臻三日之霖。亦少蘇五月之暑。其爲祈戴。實倍故常。然壬戌之朝。欲雨而遽晴。甲子之晝。旣晴而復雨。繇秕政之多。有且愚誠之未孚。竊自省循。敢忘祇懼。願言大造。加惠小民。潛銷乾溢之虞。迄畀豐穰之慶。二十二日謝雨。二十四日謝雨。至次日巳午而後止。入謂二十五日。正分龍日也。

天慶觀等處祈晴疏文

伏以萬民之天。所資者食。六月之雨。膏著于經。方竊幸於應期。可遽憂其過度。蓋長沙之卑濕。自昔所傳。儻積潦之霖淫。寔民之病。矧平疇之綺錯。有多稼之雲連。數日以須。正切良農之望。垂成而毀。必非造物之心。佛曰大覺。輒控忱辭。冒干穹聽。冀慈仁之深軫。俾陰翳之遄開。霽景熙陽。亟改崇朝之觀。甘滋美澤。留爲後日之儲。奔走有祈。敬共以埃。

天慶觀等處謝晴疏文

伏以分龍甫屆。旣霽雨而雨隨。鳴鶴弗休。復謁晴而晴應。繇浩浩至仁之易感。豈區區涼德之敢期。仰戴殊恩。亟伸祇謝。惟憂民之誠切。故望賜之日長。願言七八月之間。時霑嘉澤。庶俾千萬人之聚。共樂豐年。

天慶觀等處祈雨疏文

伏以億萬人之生。惟食是仰。七八月之旱。從古所憂。粵繇邇日以來。頗愆時雨之潤。雖早稻已臻於收穫。而晚苗正急於沾濡。得之則生。若嬰兒之需乳哺。閔焉以望。甚渴暑之待壺漿。敢瀝衷忱。仰于聖造。寸雲觸石。冀倏變於陰威。三日爲霖。俾均霑於膏澤。庶遂豐穰之願。敢忘覆燾之恩。

天慶觀等處祈雨疏文

伏以兌離異治。最忌相干。雨惕以時。尤虞偏勝。自履素商之序。浸愆嘉澤之期。比雖霖沐之屢沾。猶苦滂沱之未應。高原下隰。政深涸竭之憂。炎日燥風。又極蘊隆之虐。誰謂九秋之半。迺如三伏之中。某職在牧民。心勤望歲。愧亡善政。可召陰陽之和。嘿訟多愆。始忘寢食之節。輒彈忱懇。洵扣隆慈。霈然三日之霖。滌茲千里之旱。苟有衆安生之可望。雖以身塞咎而敢辭。瀝悃投誠。鞠躬聽命。某無任。

迎東明觀音及諸龍湫水齋疏

繆政干和。盍正守臣之罰。亢陽爲沴。迺貽農畝之憂。念拯救之無階。亟奉迎而有禱。惟慈悲廣大。莫如諸佛。而變化迅速。莫如郡龍。既來會於一堂。諒垂憐於百姓。興雲致雨。特顧盼之可爲。飛電奔霆。惟指麾之所向。忍闕神功。而弗露坐觀妖魅之肆行。今則埴未鶴鳴。田將龜坼。儻數日之間。尙遲霑洽。則一年之計。遂墮渺茫。願哀斯民。亟霈之澤。灑楊枝之露。瞬息十方。散天瓢之泉。涓滴萬里。僣躬以俟。從欲是期。

奉送神位聖水疏

慈悲廣大。莫如諸佛之尊。變化飛騰。莫若神龍之妙。比以亢陽之沴。凜乎害稼之憂。奉瑞像以來臨。叩靈湫而遍請。果蒙矜憫。俯賜感通。油雲密布於九霄。膏雨盪周於四境。其爲訢荷。未易名言。三日以往。爲霖。

願頌臻於霑足。八政之一曰食。庶獲遂於豐穰。仰冀隆私。敢忘昭報。

祈晴疏九月

民之可憫。無若良農。物之難成。莫如嘉穀。今歲將大熟。而雨則過多。人皆相顧以隱憂。天獨何心而弗球。繇始耕以至今日。不知幾朝夕之功。轉積潦而爲晴空。特出一咄嗟之力。寺改特出爲願賜。在化工而甚易。幸慈憫之亟施。寺云庶收成之不失。漑愴以祈。得請乃已。某無任激切懇禱之至。

謝南嶽行宮等處疏文

荆楚之郊。繆塵委寄。黔巫之地。實在統臨。繇郡政之靡臧。致戎行之弗靖。初喧誼於官府。繼剽掠於民居。自郵報之蜚馳。姑權宜而撫定。載念國家之制。灑豈容卒伍之亂常。期亟正於典刑。遂密加於規畫。顧人謀之難恃。惟神理之可憑。輒控忱祈。南嶽云果蒙宏造。首正鯨鯢之戮。盡空狐鼠之妖。軍律頓張。物情胥快。匪惟四境獲全。有衆之生。抑俾庶邦潛弭。未形之患。粗塞曠瘼之責。悉繇覆露之恩。爰卜良辰。敬伸謝悃。尙靳蔭佑。永底奠安。臣無任激切感荷之至。謹疏。

天慶觀等處謝雪疏文

伏以冬者四時之畢。實兆來年。雪爲五穀之精。日需嘉應。方涓辰而致禱。俄飛霰之效祥。茫乎宇宙之間。恍若瓊瑤之飾。仰神功之至妙。佩恩施之何窮。輒露寸丹。上瀆穹窿之聽。更斬三白。益昭豐稔之符。臣無任激切懇禱之至。

天慶觀等處祈晴疏文

好雨知時。豈其所厭。沉陰過度。則有可憂。蓋惟艱莫甚於農功。而至重無逾於蠶事。稗苗之出。既欲煖而惡寒。柔桑之求。又喜乾而畏濕。儻二者或乖其所望。則萬民何恃以爲生。況穀價之未平。而物情之方鬱。復久罹於霖滂。宜愈重於歎愁。職在撫摩。心如焦灼。竭丹誠佛云衷。而控懇冀洪造佛云慈。之垂憐。麗日冲融。煥晴光於甲子。惠風和暢。回淑景於莫春。庶開樂歲之祥。實慰亟生之願。

謝晴疏文

春無幾何。正田家之作苦。雨非所厭。懼寒氣之過期。亟奔走以控誠。荷慈憐之從欲。開麗景於崇朝之頃。轉疑陰爲三月之和。新秋之出如針。且將頓長。大繭之成若甕。抑又可期。矧當甲子之晴。實兆豐年之慶。用伸祗謝。併露忱祈。言念細民。方茲艱食。蓋以豪強之牟利。居然睥睨。以蒞時。惟氣令弗愆。歲有必登之望。斯蓋藏畢。出人無貴糴之憂。仰覬穹旻佛曰真。俯矜凋俗。曰暘曰雨。俾永臻時若之休。若富若貧。庶咸遂安居之願。臣無任。

祈雨疏文

民之爲生。莫先於足食。雨以潤物。尤貴於及時。況甫更芒種之期。且將屆分龍之日。必梅霖專澤。相望彌月之間。斯穡寶懷新。可必豐年之望。此農畝推占之常驗。而守臣傾僎之至情。爰詣殊庭。僭干大造。自今以迄。夏至願數霑優渥之仁。指日以蒞秋成。庶少蘇凋瘵之俗。

謝雨疏文

時方仰雨。寔豐稔之攸占。志切念民。豈禱求之敢後。荷至仁之易感。俾嘉應之亟隨。始沾濡於芒種之辰。

旋雩淫於會龍之日。破鉅室閉藏之吝。慰良農傾篋之勤。仰戴天恩。俯從人欲。用嚴祇謝。併控忱祈。蓋嘉穀之方苗。正資蔭潤。猶嬰兒之得乳。迺克生全。矧是窮忙。久茲艱食。共蕪一稔。以解倒垂。雨施雲行。時賜豐腴之澤。家給人足。永銷愁嘆之聲。

祈雨疏文

民既病而後憂。孰若軫憂於將至。旱爲裁而有禱。寧如致禱於未然。瞻言龍會之期。方極鸛鳴之喜。甫逾旬而弗繼。已望雨之至深。蓋方烈日之如焚。重以炎風之交煽。故雖平壤。僅存膚寸之滋。矧在高原。宜如卦兆之坼。念羣生之久瘁。賴一稔以少瘳。儻登場之望少愆。則擠壑之虞立見。用披丹悃。虔扣鴻慈。三日爲霖。願崇朝之亟應。烝民乃粒。庶一飽之可期。

南嶽正殿祈雨疏文

亢旱將成。竊懷憂於農畝。至仁可籲。敢歸命於帝庭。睠是窮忙。久茲艱食。斗升之價。旣方踊而未平。倉庾之儲。又所餘之寧幾。惟蕪一稔。以解百憂。願嘉穀之方苗。乃驕陽之甚熾。間雖沾灑。寧敵歛炎。儻歲事之或傷。則民生其安仰。遙瞻靈嶽。披瀝丹衷。伏願與祝融之寸雲。敷爲六合之蔭。施雷池之勺水。大作三日之霖。使生靈之命獲全。則覆幬之恩何極。控誠以告。得請是期。

南嶽正殿疏文

歲事是祈。方苦赫赫炎官之虐。聖靈可怙。孰如巍巍神嶽之尊。比檄尉曹。恭趨帝闕。慮悃誠之未徹。復簿正之遺行。蓋驕陽愈熾於中天。而亢旱有加於前日。其爲望賜。殆甚揅焚。惟帝至仁。察臣忱請。興寸雲以

敷六合之蔭。散勺水而爲三日之霖。用昭響答之月。庶解倒垂之急。

祈雨疏文

佛力無邊。能救大地衆生之苦。龍神至妙。實司上天利澤之權。迺膺此邦。適罹亢旱。念孰拯悒。焚之厄。爰並伸迎奉之恭。蓋佛之爲佛。與天心相爲貫通。而龍之爲龍。於佛法最爲欽重。願同垂於矜惻。亟共濟於焦枯。大興慈雲。丕降法雨。示剎那頃神通之廣大。全億萬人性命於阡危。疾首痛心。虔竚慈悲之施。剝肝瀝血。敢陳迫切之詞。

離明殿奉安疏

煌煌執法之星。最尊列曜。奕奕明離之殿。近在殊庭。顧久虧繕治之功。懼莫稱欽崇之意。旣庀工而告畢。爰取日以奉安。載念此邦。適罹亢旱。良苗方茂。旣憂甘澤之不時。列棟相望。復慮融風之易煽。敢抒丹悃。虔敬鴻慈。願推覆燾之仁。潛弭赫炎之氣。豐隆專陰。大爲三日之霖。回祿收威。永熄一方之警。

太乙殿醮疏文

亢陽爲沴。懼莫保於豐穰。羣望遍祠。迄未霑於潤澤。瞻言淨宇。夙奉高真。旣此邦蒙福之孔多。且往歲致祈之亟效。爰肅陳於清醮。用披瀝於丹衷。蓋難安者。田里之情。而易動者。湖湘之俗。連年獲稔。猶或歎咨。一旦告饑。將奚拯拯。仰冀高明之監。俯推覆育之仁。霑三日之霖。盡甦嘉穀。全萬民之命。永載鴻恩。

送諸佛諸神諸龍疏

七月初四日

集神靈而求潤澤。庶有感之必通。舍清淨而就囂塵。或又虞於不肅。涓良辰而敬餞。卽邃宇以虔祈。嗟乾

亢之已深。非滂沱而莫濟。輿寸雲於衡麓。倏遍九天。挹勺水於洞庭。遂浹千里。在衆聖幹旋之甚易。尤羣龍噓吸之所能。願體上帝好生之仁。以拯下民垂死之厄。不勝忱扣。仰冀矜從。某無任。

東明疏同前

早魃如熒。焚嗟損傷之已甚。觀音妙智力。欲拯濟以奚難。願久駐於公庭。乃未均於惠澤。竊意卽囂塵之地。不如還清淨之居。挹玉甃之寒泉。涓滴能蘇於千里。灑楊枝之甘露。須臾遂遍於九天。願興一念之慈。憐速救萬民之苦惱。某無任。

湘山疏

直上天關。曾見零陵之夢兆。能蘇旱歲。具存王氏之記文。願靈蹟之甚彰。實湘人之共敬。茲伸迎奉。虔致懇祈。何久駐於公庭。乃未均於惠澤。竊意卽囂塵之地。不如還清淨之居。大雄大力大慈悲。願軫羣黎之苦惱。旣優旣渥。旣霑足。亟蘇千里之歎愁。控誠以求。得請乃已。某無任。

南嶽諸處祈雨疏文

早魃爲虐。將貽卒歲之凶。昊天曰明。爰軫斯民之苦。屢錫霏微之潤。少寬枯槁之憂。仰載恩憐。不勝感涕。願乾亢之期已久。而涵濡之澤未深。時節侵尋。事勢迫切。儻甘霖卽沛。則蚤稼猶不盡傷。若畏景彌驕。則晚苗亦將告瘁。此歲功豐歉之決。實民命存亡之分。敢存扣於鴻慈。願嘿回於妙造。先立秋之氣至。俾大雨之時行。庶俾億萬人之生。有以自活。若時二千石之臬。則不敢辭。臣某無任。

天慶觀等處祈雨三清殿疏文

寶穡將成。適苦旱乾之虐。璇穹非遠。屢殫哀籲之誠。荷大造之好生。拯細民於垂死。粵繇癸卯。以泊甲辰。倏興觸石之雲。旋沛傾盆之雨。昔焉龜坼之壤。今遂沾濡。向者狼顧之氓。莫不訢喜。粟直之騰。遞損。稻苗之瘁。頓蘇。仰戴隆恩。敢稽祗謝。顧赫炎之尙熾。而滲漉之未深。矧當立秋處暑之間。正需時澤。願下屏翳。豐隆之敕。亟運神功。俾膏液之滂流。庶良疇之充足。迄成一稔。用濟羣生。臣無任。

天慶觀諸處祈雨疏文

歲其有矣。日需收斂之期。雨以潤之。迺曠沾濡之澤。念早稼既傷於夏旱。賴晚苗可冀於秋成。庶償南畝之勞。且補東隅之失。忽兼旬而愆亢。極中液以憂思。爰瀝忱詞。仰干大覺。願軫困窮之苦。亟垂溥博之恩。白水盈疇。式慰下民之望。黃雲被野。迄全上熟之功。

嶽洞寺觀謝晴疏

大田多稼。幸一稔之可期。淫雨害苗。乃連朝而屢作。亟輸危懼。遽荷深慈。回大造於杳冥之中。劃重陰於呼吸之頃。坐免橫流之患。益昭善利之仁。假守何能。唯虔依於化育。真誠有請。願迄畀於豐穰。寺改大造。作妙造。橫流作洪流。善利之仁。作慧日之光。化育作法施。豐穰作豐年。嶽觀改善利。作徧覆。

保安赦至告白聖祖殿疏文

聖主御圖。甫越三十年之久。宸衷念治。每勤一二日之幾。積煩德覽之勞。致爽起居之節。雖天人信順之助。當即獲於清安。而臣子忠孝之心。自不勝其迫切。用嚴精禱。式迓殊休。仰祈善應之仁。亟臻勿藥之喜。皇極玉福。永綿寶歷之期。長沙一星。益煥璇穹之照。

南北井 翠峯疏

伏以蕉峯萬仞之山。上摩層漢。靈湫一勺之水。中有神龍。靜而淵潛。所以存身。動而天飛。則能濟物。合乾道變化之妙。猶聖人出處之時。顧念此邦。久罹亢旱。爰協心而控請。願驥首以出游。浮雲滄輿。大雨滂霖。三秋萬頃。獲爲中熟之年。百姓羣黎。共荷更生之造。

西山先生真文忠公文集卷五十一

祭文

祭趙制置文

故制置端明尚書趙公之靈。惟公剛毅之資。清修之節。堂堂山立。爲世偉人。臥護荆襄。追迹羊陸。獨當一面。迨逾十年。如虎在山。如熊當道。種會遠遁。邊塵弗驚。近世儒帥。殆鮮其匹。宜陞樞筦。遂督戎師。星隕中營。聞者驚嘆。鷹揚牧壘。弗究厥成。某之於公。欽鄉惟舊。茲來假守。實在寓鄉。緬懷英風。遽隔泉壤。載陳薄奠。慨然于懷。

祭譙大卿文

嗚呼。維乾之元。實始萬物。化育流行。終始惟一。存而在人。則謂之仁心。發之於政。則謂之仁術。上而有國。有家。所以維天命於延洪。下而有民。有社。所以遂羣生於寧密。未有不由此焉出者。何歟。譙公世之德人。溫溫其容。則惠風愛日。抑抑其儀。則威鳳祥麟。作牧于江。民瘼以蘇。按刑于浙。繆囚以虛。歲行在亥。旱魃爲孽。大江之東。蓄患尤烈。維我與公。並將斯指。戮力一心。拯民於死。公尤切切。終食靡遑。挽之溝壑。寘之康莊。聿來吾閩。亦帥是道。飫饑藥羸。醒喝滋稿。侈養爲娛。臚仕所同。獨安澹泊。殺羞靡豐。燕游相夸。薄俗所尚。獨劬其躬。不少怠放。持牒在廷。紛綸旁午。康色使前。若語兒女。公之庇民。如視其身。民之安公。如怙

其親疾既瀕危。猶勉自力。朝牘方披。暮簣已易。仁哉譙公。死不忘民。世非無人。誰有是心。爲政一年。未究設施。閩人思公。則無窮期。嗚呼哀哉。昔公之來。吊我倚廬。今我來思。哭公喪車。酌此一觴。千古之訣。悠悠寒雲。相我愁絕。嗚呼哀哉。

祭慶元張知縣墓文

惟公英邁之姿。嶷乎其山立。潔白之操。凜乎其淵澄。發之於文。則粹然義理之正。施諸有政。則藹然豈弟之稱。奈何進不獲踐清華之廡。仕退不獲享耆艾之修齡。豈福善甌淫之訓。有時而不可必。抑天之與人。或殊其好惡之情。嗚呼哀哉。某之與君。情深義厚。而遺奠之行。不得執其紼。臨穴之際。不得以撫其柩。此所以慊焉于中。而不勝自咎也。雨露既濡。愴然懷傷。何以薦誠。唯此卮酒。雖欲見君。掀然捧腹。一笑舉白。而不可復得。徒想像其平生。有哀涕其如溜。嗚呼哀哉。

祭蕭穎仲文

嗚呼我之女弟。實歸于君。三十年間。親好是篤。我仕□達。女弟遽亡。我懷之悲。迄今未已。猶喜君在。庶慰予心。云胡不留。奄復颺逝。追念疇昔。黯然魂驚。一罇陳前。有涕如鴻。嗚呼哀哉。

祭葉夫人文

近故□國夫人葉氏靈筵。嗚呼人生。誰獨無親。全美備福。莫如夫人。手教其子。蚤魁斯文。入從出藩。蔚乎名臣。距美聞孫。一枝重春。森其拜後。雜遝芳芬。居中歷外。輕軒重茵。歲時歸來。宴其親姻。燁如金母。髮鶴齡椿。綵衣爛班。垂秉國鈞。肩輿內朝。儀形妃嬪。倏焉委蛻。厥恙何因。卷我霖雨。爲淚雰雰。訃告之聞。疇不

酸辛。緘辭往奠。尙鑒忱恂。

祭楊宮幹文

嗚呼。昔歸自泉。公逝于途。及歸自洪。公吊于廬。今茲來歸。親故滿巨。問公何在。埋玉幽谷。七十之年。從古所稀。況又過之。公其何悲。死於布衣。虛度此生。木簡綠裳。公歸何榮。紛紛鄙夫。惟利是計。一錢之捐。如割肌體。顧詹通衢。昔跌而傾。今實爲誰。猶砥之平。視粟如沙。視金如土。迄成口功。繁盛德故。貪口怛化。其孰不然。公於將亡。有琅語言。割田分貲。以收出子。家事井然。孀悉有紀。我之於公。遊從有年。公亡我歸。能不慨然。有馨斯肴。有清伊醕。魂兮歸來。尙克我顧。嗚呼哀哉。

祭果州李郎中文

維年月朔日。具位某。謹以清酌之奠。致祭于故果州使君兵部李君貫之之靈。嗚呼哀哉。仲冬辛卯。晨興徬徨。覺中情之弗怡。若冰炭之堆腸。粵有趙子之書。來從九江。發而視之。則吾貫之使君之訃也。輟子食而驚嗟。沾予襟而淋浪。胡斯世之不幸。而若人之云亡。嗚呼哀哉。君之天資。清明純粹。君之問學。深潛篤至。氣夷且溫。而毅然有難犯之色。行峻且方。泊然亡近名之累。昔在芸省。交情最親。及使江東。同心拯民。我或君違。君弗以爲忤。君雖我從。我豈以爲恩。君舟西旋。我旆南下。相與夜宿金山之上。江濤轟騰。風鐸震撼。偉勁論之英發。旁森羅乎鬼神。至於天理人欲。消長之機。吾道異端。正邪之辨。嚴毫釐之剖析。極涇渭之區分。方且自視欲然。念窮格之未精。舉措之多戾。期舍舊而圖新。蓋其用志之剛。進德之勇。俛焉孳孳。而弗自己者。直欲古人之與鄰。嗚呼哀哉。以君之忠誠。鯁亮。使見用于時。而居正君澤物之地。則上將

有補於主德。下將有功於生人。借獲不用。猶當著書立言。闡幽揚遠。遠以遡西洛之淵源。近以續紫陽之緒業。尙有光於斯文。亦孰知二者之不一途乎。徒庸志而沉淪。嗚呼哀哉。薰蕕不並。柄鑿難入。豈今獨然。繇古一律。當衆口斷斷之餘。其與君者甚寡。而予獨以爲可恃者。繫蒼旻與白日。又孰知天理之靡常。亦若人情之難必。嗚呼哀哉。澹乎無欲。君性實然。至若食大微而學大苦。則某嘗以爲言。乃者鼈背之遊。深衣大帶。形臞而神秀。超然山澤之仙。而其飲不濡唇。飯不盈掬。意者咀道德之華。悅義理之象。復何纂乎。庸擅慘別幾時。凶問尋至。豈他疾之爲祟乎。將以斯而損年。君於死生幽明之故。妖壽不貳之理。講之素矣。獨齋咨而弗置者。爲清時而惓惓。嗚呼哀哉。君今已矣。某之罷鴛。亡復警策之望矣。唯夫平生之言。垂別之贈。所以丁寧教我者。敢不佩服而周旋。西望隆山。眇在天末。欲拊襯一哀而不可得。空實涕其如泉。嗚呼哀哉。尙饗。

祭趙經略文

謹以清酌之奠。致祭于某官之靈。嗚呼哀哉。惟忠定公。爲國元臣。如且在周。如摯在殷。君之爲子。伊陟伯禽。謂宜詔格天之功。嗣建侯之寵。扶尊安於廟祏。垂光耀於琳珉。而乃官止選曹郎。位裁桂林伯。彼蒼者天。其難知耶。何以俾忠臣之有後。其可恃耶。抑何遽奪於斯人。嗚呼哀哉。君之修身。義以爲質。端直自持。襮裏惟一。其嫉惡若仇。其與善若昵。其遠利若滄。其辟寵若疾。思昔從游於羣玉之上。春容於杯酒之間。開口論心。抵掌劇談。凡所以發予之衷。而作予之懦者。真益友之言。距今十年。而君偉然之正論。毅然之勁氣。猶若鏗乎其在耳。凜乎其在顏也。辛未之夏。君守潞城。載酒江澌。以祖其行。顧詹同僚。莫非俊英。若

仲章若貫之。與吾履常父。尤磊落而崢嶸。然當是時。曾未知其可樂也。歲月幾何。而三君子者。相尋而皆逝。遂掩恨於泉扃。然後知若人之不易有。此樂之不再得。前世之士。是以當懼而感慨。惜別而傷情。嗚呼哀哉。自我來南。□□□□□□清修玉立泥滓。於惟德門。□比昆帝。遂締姻盟。以永百世。君寓于越。我家□與相□幾何□□之程。謂當異時。千里命駕。何悟一朝。君遽于舍。善人云亡。吾黨益孤。我懷之悲。豈爲私乎。聞君之喪。邈在海隅。往奠一觴。聲與淚俱。嗚呼哀哉。尙饗。

祭倪尙書文

維年歲六月戊寅朔二十九日丙午。持服真某。謹顯人以薌茗之奠。致告于歿故寶學尙書倪公先生之靈。嗚呼。□流西來。盟泊萬里。孰櫻其有。柱中恃雪。壓風催。凡卉一空。惟柏蒼然。不改厥容。□□□□□世之哲。出入三朝。壯老一口。政在私門。掉臂莫從。追時更化。亦弗苟同。瑣□□□昌言□□曾未幾時。諫書盈篋。亦旣弗□□懷而歸。婆娑丘林。以燕以嬉。世涂紛夸。生□權利。有鴻冥冥。孤人雲際。我觀先朝。惟清獻□□□□略與同。南臺嘉謬。西土遺愛。晚□□□□□惠公在朝廷。懇懇正君。公在藩□□□□□旣賦歸。塵滓萬物。靜融天光。幽□□□□□□□所玩心。且其超然得喪。莫□□□□□鄙有書在奩。有誨在誨。在耳我□□□□□□還公吊以書。其辭辛酸。聞公是□□□□□□□憂而我焉恤。嗚呼。此意其曷可忘。訃書踵來。痛攪我腸。我親之生。歲直于卯。公年實同。歿亦先後。哭親之淚。轉而哭公。豈私是懷。惟國之□汲直弗存。孰讐姦究。楊公遽奪。孰洗貪侈。謂天孔仁。胡正是仇。北望潛然。莫知我憂。嗚呼哀哉。尙饗。

祭倪通守文

繼年歲月日□□真某謹專人以香茶清酌之□□□□□□榮通守大夫倪君靈。嗚呼。□□□□
□□□□□府我實何能。賴子云補□□□□□□利害之□權其短長。語無□□□□□子
之心相期者遠。我麾南下□□□□□□以書奚其治泉。文昌之仁。民曰□□□□□我以故書來
媿媿。本末具陳□□□□□□□□毋崇燕□毋豔琛貨。民以□□□□□□雖不敏□蹈茲言。免我
于郵□□□□□□行子在劍浦。載酒客亭。促膝□□□□□□東歸子趨唁我。憂行色辭□□
□□□□□□節其抑。毋或過瘁。既別□□□□□□之愛予。疇復□倫。梁壞山頽□□□□□□
□□隨以訃告。我聞驚嘆。隕涕失聲。胡爲德門。大禍是并。豈其摧傷。致此彫耗。昔嘗戒予。顧復自蹈。嗚呼
哀哉。歲在龍蛇。賢人所嗟。昔疑其誕。今果然耶。堂堂文昌。天旣奪之。有子而材。復夫闕之。巖巖蒼官。風雨
拔之。猗猗碧桐。霜雪折之。子榮已矣。無復見期。往酌一觴。大抒我悲。嗚呼哀哉。尙饗。

祭劉房州文

□□□故官使知府大夫劉公之靈。嗚呼。忠肅□□□□□□之學。貫于天人。爰暨順寧。□□□□
□□□書可想芳烈。我自少小。卽聞□□□□□□始識公。環堵蕭然。不蔽風雨。□□□□□□溢宇
二頃之田。僅給粥餽。獻歌□□□□□□□□利溺人世所汲汲。一罇可投□□□□□□清淚橫空。
豈以區區。爲子□□□□□□□□之子展也。如是。公肖是似。□□□□□□期天胡忍予。而遽奪之。
書來□□□□□□□□奏功已屬斯續。嗚呼已矣。□□□□□□□□其我規者。有醴斯馨。有□□

口慟之悲。口古之訣。嗚呼哀哉。尙饗。

祭諫議龔公國正

新天子有事于合宮。推恩宇內。凡忠臣義士之名蹟顯著者。俾長史二千石致祠焉。所以風勸臣節也。惟公昌言直道。照映青史。馬蠶之封。近在城隅。曰忠與義。疇出公右。是用躬致天子之命于墓下。而不敢諉之有司焉。嗚呼。公之南遷。坐論蔡氏也。方公持扇乞錢之日。實彼秉鉤顯國之時。榮悴殊塗。亦既甚矣。歲月幾何。是非大定。流芳遺臭。兩俱亡窮。咄彼兇渠。埋骨茲土。樵蘇尤唾而弗顧。而過公之墓者。莫不裴回太息。想像其遺風。是果孰爲榮辱耶。嗟夫。天不使公還葬河間。而葬于此。又不使蔡斃于異邦。而斃于此。其殆欲一正一邪。昭然並列。爲世之法戒乎。雖然。使君之言行。則王室不至於中微。蔡氏亦免於誅。儻是公之論蔡也。不特忠於蔡氏。而蔡之害公也。不惟禍國。祇以自禍也歟。敬仰之餘。併陳梗槩。公之英烈。尙聞斯言。

忠節廟

忠節有祠。自太守朱公始。然公之既請于朝也。命未頒而遽去。其後牧臣。鮮或加意。故祠室之立。苟簡爲甚。而其從祀之位次。亦有可議者焉。某蒙恩此來。首修謁款。裴回顧省。慨然久之。謀諸同僚。遂徙斯宇。庀工命役。煥然一新。或出或升。惟義之比。至於近世。將臣捐軀犯難之死。弗顧者。皆附而祀之。下至戎行。亦許緞食。嗚呼。是足以彰朝廷表勵之美。而成朱公建白之本志矣。像設告成。肆陳薄奠。英威未泯。其鑒此誠。

祭王侍郎母夫人

嗚呼夫人其古之賢母歟。方來嬪德門之初。宗伯之年未冠也。保惠之至。其猶護驪龍之珠。鞠育之切。又如字丹穴之雛。然能養而不能教者。母道之常也。而夫人獨知徙隣之深意。欲勉經訓之舊。奮迺瞻岳麓。羣英所廬。前則有五峯之遺風。後則有南軒之宏摹。顧謂嗣賢。汝游汝居。挹靈峯千仞之秀。以助汝胷中之奇偉。吸長江萬里之澗。以滋汝筆端之芬腴。豈晨昏之弗懷。蓋深惜於居諸。然其始也。或以爲迂其子。若於慈爲未足。迨乎上天。延之大對。魁薄海之羣儒。厥聲赫然如霆之迅。如日之起。然後知爲教子之力。蓋於慈而有餘。嗚呼夫人其古之賢母歟。方蘭陔之娛侍。極綵服之驩愉。謂耆齡之未艾。奄長夜其云徂。某也從宗伯游。獲聞懿範之一二。欲揚厲鋪張。以待後世。乏太筆之椽。如意嗟兮。今晨。娶稱兮在塗。朔風凜兮號空。嚴霜慘兮冽膚。悵莫留於仙馭。徒泣錢於輓車。

祭趙侍郎

嗚呼我公。遽止斯邪。始疑弗信。今果然耶。維莫之春。拜公于都。樽酒笑談。神閑氣舒。退語於人。公壯且碩。謂當百年。爲國柱石。越夏四月。告別于公。公時孔安。有睟其容。居亡幾何。郵命相踵。乃尹神臯。乃正法從。善而不寐。泚筆作書。書在于涂。而公歸歟。時止時行。孰非天命。謂公安之。不以爲病。御書親賜。訊公安否。將命東歸。迺以疾告。維公德人。勿藥以瘳。川逝颺馳。奄其弗留。位非不崇。志則未究。命非不通。年則弗壽。開闔抑揚。果誰爲之。茫茫太空。孰其問之。嗚呼茲歲。老成殄瘁。梅巖云亡。公亦隨仕。鄉之學者。其將誰師。鄉之仕者。其將疇依。矧惟餼生。最辱知己。別去幾時。遽隔生死。冥冥長夜。公今何之。乘雲往來。與汗漫期。

鈞天清都公樂無苦。唯在人精。寧免嗟慕。隕涕如泉。莫將我悲。不忘者存。尙或鑒之。

祭詹大卿

嗚呼。天乎。予公以卓異之才。而位不究其用。賦公以醇明之德。而生不假之年。方彊場多虞。宵旰太息之日。而奪此老成之彥。經濟之賢。詩所謂人之云亡。邦國殄瘁者也。有志之士。所以蓋然而傷痛。拊膺而問天。蓋公之爲人。得諸天者既異。而充之以學。又深造其淵源。自羣經百氏。閎深奧衍之旨。靡不心融而神會。下至陰陽卜筮。幽微幻眇。往往探頤而忘筌。惟其所造者高明。自養者剛大。故雖踐歷清華。不以爲泰。屏居林泉。不以爲辱。更榮悴而無二色。禍福不爲之遷改。迨公道開明。善類登進。乃復分太守之符。持王人之節。識者知公之將用。莫不訢然而相賀。奈何人事之乖兮。口驛朝而馳。訃音莫傳。豈民之無祿。不獲被公之澤乎。抑厭世之溷濁。寧輕舉而高騫。公於幽冥之故。死生之說。旣灼然昭融而洞徹。宜其臨絕之音。琅然不亂。啓手足而全。蹉吾鄉邦人物之盛。蓋自昔而蟬聯。比口以來。諸老淪謝。惟公僅存。若靈光之巋然。後生小子。尙得窺儀刑而興起。奉教訓而周旋。若某之不才。顧何足以語上。而公獨以爲可教。每更以留連憶初筮之別。公辱臨分之贈言曰。盡心則無愧。平心則不偏。蓋拳拳服膺。不敢失墜者。五年于此。若几杖而韋弦。謂公年之未衰。尙克拜於堂筵。冀鄙吝之獲鋤。甚沉疴之待痊。孰謂公奄然而逝乎。曾不及乎華顛。想音容其若存。冀親炙而無緣。悼前志之不修。涕泣下而淪漣。繼自今其何如。惟砥礪而稱堅。誓名節之不渝。以報公於九原。

祭陳北山

嗚呼維公。世之偉人。有德有才。有武有文。閩洛之緒。弗絕如線。巍巍紫陽。是續是演。靜涵一本。動貫萬微。隱顯相因。德用弗離。公游其門。見謂巨擘。溯流窮源。研幾探頤。蘊而蓄之。既粹以精。發而舒之。亦大以宏。非如世儒。沉溺訓詁。非如詞人。聯緝毫縷。平居穆然。色下言徐。遇事剴然。氣陵萬夫。破賊東堆。震霆電激。袖手北山。窈若深嘿。能開能闔。可縮可伸。嗚呼維公。舉世執倫。經濟之謀。戡定之略。悞塞通施。遁藏自樂。思豪力雄。空涌厥辭。駕風犇雲。而與並馳。尊俎春容。淋漓筆墨。踞視冰澌。爲我僕役。先天之秘。人所莫闕。公獨玩心。皇義是師。聞者書來。辱以告我。誰歟共談。緊子其可。千里相望。數遺以詩。學失傳訛。形于嘆咨。觀公之志。勇於任道。將扶微言。俾後有考。我云斯文。寄實在公。紫陽之志。盡成厥終。云胡弗淑。奄忽長逝。朔風怒兮。助我悲涕。幸而有子。公爲不忘。靈兮來思。舉我一觴。

祭趙提舉

嗚呼。維我聖朝。天枝蕃衍。號爲磐石之宗。三百年間。英林輩出。然德著于家者。未有如篤行之行。功施于國者。未有如忠定之忠。蓋父子相承。世濟厥美。事親盡孝。則庶幾乎曾子。事君盡道。則無慙乎周公。惟其純誠大節。昭格於上帝。故賜以峻明哲艾之嗣。轍高陽之八龍。公之稟於天者。旣挺然其特異。而自少暨長。沈涵漸漬。不離典訓之中。凡師門之指授。與家塾之磨礪。義利取舍之端。必致嚴於決擇。古今成敗之變。亦洞究其初終。故材之成者日楹。而識之邃者闕充。節靡累持。宗盟載泣。介潔自將。則冰壺秋月之瑩。剛果立斷。則大阿龍泉之鋒。踣繫姦彊。凜乎其霜肅。惠鮮悖獨。熙然其春融。雖憤世疾邪。常若過於激烈。而尊賢友善。則未始不極其溫恭。凡聲猷之可紀。皆學問之餘功。環輒雖類。不自悼其鬱。握蘭雖寵。不自

賀其逢。惟及物之是期。曾靡計乎痺崇。早掛冠於神虎。獨抗志於冥鴻。有冕山兮峨峨。有罄湖兮溶溶。將卒歲以優游。胡遽罹於鞠凶。嗚呼哀哉。我昔與公襟期實同。辱媼盟之我締。永世好於無窮。聞拂衣而遄返。思命駕以相從。未巾車於北道。已洒涕於西風。今公之葬。莫能躬絮酒之奠。徒目斷乎層空。想英靈之不泯。冀胙蠻之潛通。

祭左翼軍吳將

嗚呼。汝之年垂老矣。討賊之役。主將不欲汝。而汝請行。忠也。同列具旺。以一舟而當賊五舟。他人不援。而汝獨援之。義也。旺獲全而汝死。豈不哀哉。然人誰不死。汝之死以忠義。可謂得其所矣。渠魁不日就擒。當令剗肝以祭汝官。汝之子。卹汝之家。而廟于海瀕以祀汝。忠死之士。皆從享焉。汝雖云亡。必能爲厲以擊賊也。

西山先生眞文忠公文集補遺

春秋衍義後序

右春秋大義二十二卷。衍義三卷。建陽虞君知方復之所著也。初西山蔡先生以道學名當世。有子三人焉。長伯靜。次復之。又其次仲默。復之雖出後虞氏。而其學固蔡氏之學也。先生於經無不通。而未及論著。嘗語三子曰。淵汝宜紹吾易學。曰。沉汝宜演吾皇極數。而春秋則屬知方焉。旣而易皇極二書成。獨春秋未得要領。居一日。讀易豁然有悟。曰。夫易之一卦一爻。爲義各異。而謂春秋以一例該衆事。可乎。學者以義求經。而不以例求經。庶幾得聖人之意矣。久之讀書。又豁然有悟。曰。道心者。理義之正也。人心者。血氣之私也。正者。易晦而私者。易流。大舜所以有危微之戒也。春秋二百四十餘年間。諸侯大夫行事。其發於道心者無幾。而凡毀彝倫。基禍亂者。皆人心之爲之也。故經于贈仲子。納郤鼎。皆據大義以止私欲之流。一書綱紀。大率在此。吾聖人之心。卽舜之心也。夫易書之與春秋。其爲教亦不同。而君於是得春秋之指。蓋天下之理無二致。故聖人之經亦無異指。昧者析之。而通者一之也。西山於是乎得所托哉。君又將爲三綱竊統一書。明王道所由廢。與霸權所自起。使萬世人主知履霜堅冰之戒。尤有功於世教云。

據朱彙尊經義考補入。

論語意原序

東谷鄭公之學。本於伊洛諸君子。而沈潛玩繹。必求至於深造自得之地。易與論語。皆其用力書也。德秀於翼傳已序其篇末矣。至讀意原。則以其己意而逆聖人之志。蓋多得之於八佾篇。謂其傷權臣之僭竊。

痛名分之紊亂。大指於春秋相表裏。於子賤章謂其爲人沈厚簡默。非魯多君子。不能取其爲君子。於聞韶章謂以揖讓之樂。作於僭竊之國。聖人蓋傷之。於三仁章謂微子之去。爲去王朝而之國。非歸周也。若是者不可殫書。其言雖若異於先儒。而未嘗不合於義理之正。有微顯闡幽之益。而無厭常求異之過。蓋信乎其爲自得也。前輩問學之不苟如此。可以爲法矣。

據朱彝尊經義考補入。按原意二卷。鄭氏汝諧著。汝諧字舜舉。官吏部侍郎。

賀盛察院啓

誕頒芝檢。分糾柏臺。言路置六察官。實司公道之脉。聖朝用一正士。可立太平之基。漢詔風馳。周行霜凜。恭惟某官。英姿挺特。素節高嚴。卓爾不羣。行庶幾乎大雅。倅然見面。望而知爲吉人。自登百辟之聯。浸結九宸之眷。容臺禮樂。甫參議論之官。憲府紀綱。兩任抨彈之寄。方將龜鏡國家之治亂。涇渭天下之是非。爲正論之指南。斥儉朋於有北。坐令海內。如慶歷嘉祐之隆平。肯使吳中。獨敬輿希文之專美。某曩陪駿武。夙仰賢猷。切聽鳳鳴。深爲清時而喜。敢同燕賀。獨因大廈之成。

賀江東譙憲啓

中詔起家。外臺抗節。民懷遺愛。昔嘗敷惠澤於畿東。帝瞻舊人。茲俾按祥刑於江左。寬條一布。屬部高欣。恭惟某官。敏識造微。英猷邁往。班香宋豔。文推行遠之工。夷清惠和。行有適中之懿。自適巍峩之第。兩儀清切之聯。七寺爲丞。朝論稱其端靖。九江作牧。政聲播於歌謠。自陞蘭省之高華。旋總瑤編之筆削。禁廷甚邇。方共僊於平登。風操獨高。乃徑成於勇退。蓋志本及人而謀身則緩。故官雖在外而行道則同。星輝

婺女之躔。霜肅會稽之野。暫奉真祠之佚。良深當宁之思。吳越之壤。八九州。咸屬按臨之會。雲漢之章。千萬軸。重新寓直之光。願無緩於平反。庶不妨於趨覲。某揆能甚下。席寵過隆。八年鶴序之遊。六稔鼇坡之直。愧大恩之難報。乞偏郡以自程。敢謂綸音。驟頒使指。外唐何有。內省靡寧。同夢均天。曾未忘於曩契。並驅原隰。願無斬於良規。

答張總管啓

護細柳之屯。屈司亞旅。告及瓜之戍。愧辱先施。載戢高情。可稽報牘。恭惟某官深雄而有立。整暇而善謀。橫槩賦詩。雅嫻儒術。輕裘緩帶。克紹家聲。鏘鳴賓闈之聯。清肅臚傳之句。自違九陛。數總伍符。顧我連營。已改旌旗之色。抑君雋武。會看旄節之傳。某甚幸同寅。已欣快覩。典型猶在。仍尋射圃之盟。氣槩相期。預寄烹魚之素。

以上三啓據啓雋類函稱入。

謝賜御書張九齡千秋金鑑錄故事表

節值千秋。輒獻芻蕘之論。恩頒一札。獲瞻奎壁之光。俯拜難勝。襲藏有耀。伏念臣慚無寸技。幸際兩朝。昔瑞慶方臨。膏豫陳永命之戒。今天基有屆。敬復據曼壽之言。蓋謂錦囊效貢之徒勤。不若丹辰獻箴之有稱。經帷入侍。天語垂褒。觀倦倦進說之辭。真懇懇愛君之意。既下軒墀之拜。甫還蓬藿之居。賜雲章一人。幾類邇英之故事。上金鏡五卷。有懷開元之諍臣。不圖螻蟻之微。驟覩龍鸞之妙。恭遇陛下性全淵懿。學懋緝熙。博考舊聞。審萬古忠邪之判。緬懷遺直。係一時治亂之分。爰灑宸豪。以勵臣節。臣猥繇愚拙。誤沐

褒嘉百祿是宜。敢第述商頌降生之瑞。三宗可法。願益遵無逸之規。
據宗四六選本補入。

